






Early European Books, Copyright © 2012 ProQuest LLC.  
Images reproduced by courtesy of the Biblioteca Nazionale Centrale di Firenze.  
CFMA01 2.6.213







Early European Books, Copyright © 2012 ProQuest LLC.  
Images reproduced by courtesy of the Biblioteca Nazionale Centrale di Firenze.  
CFMAGL 2.6.213





Early European Books, Copyright © 2012 ProQuest LLC.  
Images reproduced by courtesy of the Biblioteca Nazionale Centrale di Firenze.  
CFMAGL 2.6.213




Early European Books, Copyright © 2012 ProQuest LLC.  
Images reproduced by courtesy of the Biblioteca Nazionale Centrale di Firenze.  
CFMAGL 2.6.213













2.6.213






















216-213

A

MAIEM.

ut COMP.






2.6.213

B.






2.6.213

c

2






2.6.213

D







2.6.213

EL

HEBRÆORUM  
DE  
CONNUBIIS  
JUS CIVILE  
ET PONTIFICIUM:

SEU  
EX R. MOSIS MAJEMONIDÆ  
SECUNDÆ LEGIS  
SIVE  
MANUS FORTIS

Eo libro, qui est de re uxoria,  
TRACTATUS PRIMUS.

*Quem tractatum ex Hebræo Latinum fecit*  
LUDOVICUS DE COMPIEGNE DE VEILLE.



PARISIIS,


Apud F. MUGUET, Regis & Archiepiscopi Typographum,  
viâ Cytharæ, ad insigne adorationis trium Regum.



M. DC. LXXIII.  
CVM PRIVILEGIO REGIS.

2.6.213









ILLUSTRISSIMO VIRO  
JOANNI BAPTISTÆ  
COLBERT,

MARCHIONI  
DE SEIGNELAY,  
Regi ab omnibus Consiliis &  
Secretis, Ærarij Moderatori,  
summo regionum ædificiorum  
Præfecto, sacrorum Ordinum  
Quæstori, &c.



**P**XQUISITUM quoddam  
& minime vulgare mu-  
neris genus offero tibi,  
VIR ILLUSTRIS-  
SIME,  
ex R. Mosis Majemonidæ præstan-  
tissimo illo opere; quod Secunda Lex

ā ij



## EPISTOLA.

*inscribitur, tractatum de connubiis, qui  
Hebraeorum de re uxoria jus utrumque  
complectitur. Namque in eo de ratione  
sponsaliorum & nuptiarum cum novâ,  
tum antiquâ, de dote & donatione pro-  
pter nuptias, item & de jure heredi-  
tario copiosè disputatur. Magna sanè  
quæstiones, & dignæ, ut mihi quidem  
videntur, quæ in tuo nomine appa-  
reant. Præterea autem accuratè ex-  
plicatur quo animo inter se conjuges,  
quâ pietate erga liberos esse conveniat:  
quibus tu laudibus adeò præstas, adeò  
abundas; nihil ut ad eas addi possit.  
Etenim multi multa ornamenta, egre-  
giasque virtutes tuas suis scriptis cele-  
brabunt, ingenium perspicax, judi-  
cium acre, memoriam admirabilem,  
animum celsum & fortunâ longè ma-  
jorem, patientiam in labore pene incre-  
dibilem, industriam in agendo, consilium  
in providendo. Porro autem in mor-  
talitati tradent à Rege, ex quo te suis*



## EPISTOLA.

III

consiliis interesse, ærario præesse voluit,  
 palatia multifariam excitari ampla,  
 magnifica, & novo prorsus artificij  
 genere expolita: vicinos & longè dis-  
 sitos populos & principes huic imperio  
 amicos pecuniâ & armis adjuvari:  
 terrâ marique bella confici ea, quibus  
 gerendis Roma quondam terrarum do-  
 mina se imparem esse sensit: maria  
 nec ullo obstante discrimine committi,  
 ac diversos, ut ita dicam, orbes com-  
 mercio jungi: tum longinquas in regio-  
 nes emitti illustres ingenio adolescentes,  
 qui multorum populorum linguas ad-  
 discant, mores & rationes perspiciant,  
 & iidem benignitatis regie totidem  
 veluti obsides tam fœderibus cum re-  
 motissimis quibusque nationibus, quàm  
 commerciis faciendis inserviant. cum  
 his simul unâ omnium bonarum artium  
 accademias institui sumptibus extraor-  
 dinariis: arcem illam Vranie extrui:  
 componi bibliothecam ex omni parte

ã iij



## EPISTOLA.

regiam : ubique gentium viros aliqua arte præstantes largis muneribus quotannis donari. Enimverò sicut Mecænatem ab Augusto , ita te alterum à Rege propagatorem ingenuarum artium latè per orbem prædicant. Quo minus quisquam mirari debet tuam illam insignem ac prope singularem in liberis educandis curam atque industriam : quos cùm ab ineunte ætate magistris in disciplinam tradideris vitæ & scientiâ claris , tum eorum exercitationibus tute , quantæ quantæ sunt occupationes , frequens interesse cupis ; ut laborem ex te verum , veramque virtutem discant. Nimirum & in hoc etiam pietatis & officij munere Regis maximè rationibus consulis ac prospicis , cui ut te totum , sic & liberos tuos singulari curâ eductos , omnibus rebus instructos & ornatos , atque adeò ad maxima quæque munera obeunda imprimis idoneos dedi ac consecrari expetis.



# IV EPISTOLA.

Sæpe ego tuum coram intueor, observo,  
 & alloquor filium, qui sacris se se  
 addixit. O juvenem egregium! O sin-  
 gulare virtutis specimen, dignum quod  
 Deo devoveretur! qui id ætatis rerum  
 divinarum interiori quadam & recon-  
 ditâ doctrinâ excellit: in te semper  
 tanquam in speculum inspicit, ut tuam  
 velut effigiem, sic & virtutem, quoad  
 ejus fieri possit, exprimat: viros claros  
 amore prosequitur: humanitate ad se  
 allicit: officiis sibi devincit. Ad meum  
 autem ut redeam munusculum, id con-  
 fido tibi pergratum fore, perque jucun-  
 dum, utpote quod ex eo fuit deliba-  
 tum opere, quod semel atque iterum  
 jussisti, imperasti; ut in latinum sermo-  
 nem ex Hebræo converterem: neque  
 enim tu es is, qui pati possis quidquam  
 cognitione dignum diutius delitescere.  
 Atque hac de causa cùm antehac Regis  
 in me liberalitatem derivasti, tum verò  
 magnam mihi otij litterarij spem in  
 a iij



## EPISTOLA.

posterum ostendis. Supereſt igitur, ut,  
mihi ne egomet ipſe deeſſe videar, elaborem & enitar, ut in me tua beneficia rectè collocare exiſtames. Qua in re me omnem curam meam, ſtudium, diligentiam, induſtriam & operam conſumpturum proſiteor ac polliceor. Vale,  
Lutetia Pariſiorum XIII. Kalendas  
Iulij M. DC. LXXIII.







# PROŒMIUM INTERPRETIS.

**D**E vita R. Mosis Majemonide, atque adeò de præstantia hujus scriptoris pluribus egit J. Buxtorfius in præmio libri ejus qui DOCTOR PERPLEXORUM inscribitur. Nos autem de Judæorum doctrina illa, quam aliis alij quasi de manu in manum perpetuò tradiderunt; in libellis his quos antehac in lucem emisimus, sanè quàm diligenter explicavimus: præsertim verò de R. Majemonidæ præstantissimo illo opere, quod SECUNDA LEX, item



*Proæmium Interpretis.*

& MANUS FORTIS inscribitur. Is enim hoc opere universam Judæorum traditionem repudiat rejectisque fabulis sine ulla controversia magis emendatè, magis purè, magisque concisè edidit, quàm scriptorum quiscumque, qui ante vel post hunc adhuc extiterint. Itaque & rationem operis ejus, & ordinem exposui, & divisionem in libros atque tractatus, & subjectam cuique materiam: quarum rerum notitia ex superioribus libellis meis petenda est. Multis enim hoc opus & variis temporibus ac formis excusum est, idque Venetiis, non alibi, quod sciam. Ego verò ad hunc tractatum ex Hebræo latinum faciendum his duobus usus sum exemplaribus: quorum alterum cùm duobus commentariis & nonnullis etiam ani-



*Proæmium Interpretis.*

madversionibus in folio magno editum anno 1524. in volumina distribuitur duo : alterum item cum commentariis duobus & quibusdam animadversionibus in folio parvo editum anno 1574. fere in Volumina distribuitur quatuor. Quorsum igitur ista dixerit aliquis ? Quia in hac exemplarium varietate non ita rarò contingit, ut textus à textu discrepet : hîc mutila videas quædam & quasi decurtata : illîc productiora & quasi immoderatiùs excurrentia : hîc emendata, illîc depravata lectio; quorum ego multa multis locis ad marginem in eo, quem jam nunc in lucem mitto, tractatu annotavi : multa etiam iudicio lectoris permisi, & diligentia : unum sit è multis exemplum, quod quoties horum duorum exemplarium in altero occurrat vo-



*Proæmium Interpretis.*

cabulum illud *gentium*, quo Christianos homines solent appellare Judæi, toties in altero substitutum videas nomen *Cuteorum*, metu credo, magistratum, qui reip. illi præerant tunc temporis, quo fuit horum exemplarium posterius excusum. Moneo igitur hos qui libellum istum sument in manus, ut si forte versio mea cum textu minus congruere videatur, adeant ad horum exemplarium utrumque, fiet satis, scio. Jam huic de connubiis tractatui materies est subjecta sanè multiplex, ut in quo disputatur de ratione sponsaliorum, de nuptiis legitimis, & earum contrariis: de conjugum mutuis inter se officiis, de potestate viri in uxorem, & ejus fortunas: item & de potestate patrum in liberos: de universa ratione hæreditatum, de dote & donatione



*Proæmium Interpretis.*

propter nuptias, & sexcentis aliis  
quæstionibus è medio jure petitis,  
quas in subjecto elencho nomi-  
natim perscripsi. Atque harum  
cognitio quàm multum ad sa-  
crarum litterarum intelligentiam  
condukerit vel ex una quæstione  
intelligere licet. Lex erat He-  
bræis, ut ex sua quisque tribu du-  
ceret uxorem: atqui summæ vir  
sanctimonix David, cujus ex  
stirpe Christus erat oriundus, in  
matrimonium ex infima tribu du-  
xit Micol Saülis filiam: idem &  
alij multi fecerunt viri boni. Ni-  
mirum hoc illud est, quod hîc  
copiosè disputatur: puellis nihil  
quidquam à parentibus hæredi-  
tario jure veniebat ubi relinque-  
rentur & pueri: rursus eadem  
hæreditatem capiebant omnem  
si solæ superstites essent: atque  
in his denique locus erat supe-



*Proæmium Interpretis.*

riori legi; ut possessiones ex alia tribu ne moverentur in aliam. Itaque Mariæ Virginis genus præclare ostenditur ostenso genere conjugis: hanc enim cum alio, quàm tribuli suo nubere non licebat ideo, quia familiæ suæ erat ex asse hæres: neque enim quidquam referebat, utrùm magna, an parva, aut etiam nulla relinqueretur hæreditas, si modò jus esset hæreditarium. Nam in hoc tractatu sæpenumero commemoratur de divortiorum litteris, de contractu nuptiarum, de calceo leviro detrahendo, & fratria jure affinitatis ducenda, de potestate renuendi virum, quæ potestas ei demum fuit concessa mulieri, quam mater, frater, aut alius è propinquis nuptum dederit ante pubertatem: quorum formulas esse tum cognitione di-

gr  
ria  
nin  
cis,  
ex di  
ut ap  
lio a  
transf  
tracta  
institu



VII  
*Proœmium Interpretis.*

gniffimas, tum ad juris pruden-  
tiam perutiles quis neget? Ete-  
nim has ego partim verbis Syria-  
cis, partim Chaldaïcis conceptas  
ex diversis locis hujus operis sic,  
ut apud editionem in parvo fo-  
lio anni 1574. extant in unum  
transtuli, atque ad calcem hujus  
tractatus apposui. Ac de ratione  
instituti nostri satis dictum est.






### Errata.

### Correctiones.

Page 4. l. 27. alieno viro, tum lege, alieno viro tum,  
Pag. 8. lin. ult. u tetiam, l. ut etiam  
P. 16. l. 29. ritè viro conjuncta, l. conjuncta.  
P. 40. l. 4. repetitio nulla defit, l. repetitio illa defit  
P. 46. l. 28. in quo fossæ fit, l. in quo fossæ sint  
P. 87. l. 5. ad panem adhibeat, l. ad panem adhibeat.  
P. 138. l. 29. risumac, l. risum ac  
P. 172. l. 1. Et si, l. Et si  
P. 194. l. 31. norint singulos, l. singulas.

ELENCUS





# ELENCHUS

## HUJUS TRACTATUS.

Cap. I. **P** Ræscriptum à Lege esse, ut  
 uxor, ante quàm ducatur do-  
 mum, à viro certis quibusdam rebus ema-  
 tur, qua emptione facta jam tum mu-  
 lierem emptoris esse propriam, atque  
 adeo sponsam, seu viro dicatam appel-  
 lari: cum meretrice rem habentes verbe-  
 ribus coërceri: aliter appellari mulieres  
 quarum à congressu Lex viros prohibet  
 & exitij pœna coërcet; aliter eas qua-  
 rum conjunctione Lex interdicit quidem,  
 non item exitio coërcet. Et propinqui-  
 tatis gradibus, & certis quibusdam ho-  
 minum generibus aliis Lege, aliis insti-  
 tuto majorum interdictum esse.

Cap. II. Fœminam ab ortu usque ad  
 quoddam ætatis spatium parvam &  
 pupulam; dein ab hoc ad aliud puellam  
 vocari: tum si pubertas appareat,  
 puberem; sterilem, si signa sterilitatis  
 existant. Et masculum ex quo editur  
 ē



## ELENCHUS.

*in lucem ad tempus præfinitum dici parvum & pupulum ; posthac si pubertas emerfit , majorem appellari & virum. Qui omnino pubertatis signa nunquam edat , eum vocari spadonem : hunc enim ab execto differre : androginum verò , & hominem prorsus obthuratum neque viros , neque fœminas ; sed ambiguos haberi : porrò dementes atque surdos , eos videlicet quibus nec est loquendi potestas , non esse cæterorum hominum instar.*

Cap. III. *Quasdam legitimas esse uxoris dicendæ formulas , easque solas à solo viro adhibendas , alioqui nullas esse. Filiam in potestate patris esse ad ætatem puberem. Totum hoc despondendi , seu dicandi negotium mandare procuratori non nefas esse : verùm enim melius esse multo , ut vir & fœmina rem contrahant ipsi. Quibus negotium mandetur idoneos esse omnes , præter surdos , qui iidem & aurium sensu carent , dementes , & ethnicos : illi , quia non sunt mentis compotes ; hi , quia non sunt fœderis participes : atque post pactam mulierem & gratulationem Deo factam denique ad dicandi rationem procedi.*



ELENCHUS.

Cap. IV. De multis ac variis rationibus ac viis, personis, aetatibus, locis ad dicandum aptis, & de contrariis, atque his intermediis, id est, incertis & dubiis.

Cap. V. Si quis aut rapto, furto, praeda, aut re interdicta, aut re aliena sibi dicarit uxorem, ratane sit dicatio? Quid si quis mulierem sibi dicasset deposito, debito, credito? Quid porro si quis dono, arrhabone, pignore, opera, opere? &c.

Cap. VI. Mulier cum sit dicata sub conditione quandenam rata sit dicatio? tum quia incidit de conditione mentio queritur in rebus contrahendis à quo, qualem, quando, quibus modis oporteat conditionem institui, ut firma & fixa sit? Etenim & conditionis instituendae formam à Legis illo ipso latore expressam esse, cujus ad similitudinem dirigendas esse quaecunque in rebus contrahendis instituantur conditiones.

Cap. VII. Subjiciuntur multa & varia exempla dicandi sub conditione: mulier si dicata fuerit sub ea conditione, ut votis non obstringeretur, dicationi aliàs omnino obstare vota tria, aliàs omnia. Si conditio dicandi vitia corporis exclu-



## ELENCHUS.

deret, opus esse ut absint ea, quibus mulieres temerantur, vitia. Si quis conditioni dicandi prodiderit aliquos dies, quomodo & quando firma sit dicatio? tum si interea loci vir alius eandem sibi mulierem extemplo dicarit, utra harum dicationum rata sit? Denique dicationes multas multis de causis aut esse dubias, aut omnino nullas.

Cap. VIII. Vir si dicandi pretium promiserit aliud, aliud dederit, dicationem esse nullam: similiter statuendum de quacunque circumscriptione seu viri, seu mulieris. Quem hominem doctum, quem Legis peritum, quem sacri codicis intelligentem, quem fortem, quem divitem appellari conveniat?

Cap. IX. Colliguntur dubia varia ad quaestionem de dicatione pertinentia, atque enodata exponuntur.

Cap. X. Sponsum prohiberi rem habere cum sponsa necdum à socero domum deducta: eadem ad thalamum deducta frui usque licere: antequam nuptiae fiant preces solemnes, quae subjiciuntur, fundendas esse. Nuptias etiam ante concubitum perfici. Etenim decretum à Sapientibus esse, ne quisquam sponsam pro



ELENCHUS.

*uxore habeat, quin ei pro donatione propter nuptias quandam perscripserit denariorum summam, aliam videlicet virgini, aliam mulieri: denarij verò aliud alio tempore fuisse pretium: uxorem qui ducat, cum ex instituto Sapientum cunctis occupationibus se relaxare dies aliquot nuptias proximè consequentes, quos eosdem cum uxore consumat hilaritate, letitia, jucunditate, atque oblectatione: nuptiis nonnunquam moram produci, unde, cur, quando, qualem?*

Cap. XI. *Et ad donationem propter nuptias, & cætera ad omnia quasdam virgines pro mulieribus haberi: & quibusdam nihil pro donatione propter nuptias dari: viro nonnunquam in uxorem esse virginitatis actionem: virginitatis signa esse duo.*

Cap. XII. *Virum cum uxorem ducat conditionibus adstringi decem, ut ejus sumptibus etiam postquam ipse de vita decessit uxori præbeatur victus & vestitus ad præfinitum tempus: item & habitatio: alimenti modum atque habitationis accommodari ad facultates viri: ut statis diebus præstet officium conjugale, &c. Mulierem autem adstringi*

ē iij



## ELENCHUS.

*conditionibus quatuor: ut quidquid ipsa labore quaeritet, quidquid fortuito reperiat, viri sit: idem ex ejus bonis fructus omnes capiat quoad ipsa vivat: sin eam efferat, ejus hereditatem, capiat praecunctis. Et quemadmodum vir uxorem, item oportere ut liberos ex ea susceptos ad certam aetatem alat. Vir cum peregre exierit unde, quomodo, quando subministrentur ejus uxori & liberis quae sunt ad vitam necessaria?*

Cap. XIII. *Quid uxori vir debeat vestimenti, suppellectilis, habitationis, mundi muliebris? Quid idem vestitus, suppellectilis, tecti debeat liberis? Quid fieri oporteat mulier, si per se aut per virum sit voto obligata, ut ne his utatur? Mulierem deceatne convivia agitare, parentes & amicos visere; rursusque ad se recipere? Vitandam esse vicinitatem impuram: uxorem ex alio loco in alium asportare viro licere, neque tamen quovis gentium.*

Cap. XIV. *Statum illud tempus, quo vir cum uxore consuetudine communi consuescat, pro conjugum numero & suis cuique viribus definiri: nefas esse uxorem stato tempore defraudare: mulierem si*



## E L E N C H U S.

XII

*in officio jugali viro adversetur primum reprehendi, deinde pœna coerceri. Similiter & viro, si officium jugale detrectet, multam irrogari. Quod si vir & mulier mutuo se accusant de negligentia & omissione jugalis officij quid statuto opus sit? Officium viri esse mulierem agrotantem curare, captivam redimere, mortuam sepelire, & justa funeris pro facultatibus solvere.*

*Cap. XV. Concessu uxoris statum illud tempus virum rectè omittere, siquidem præcepto illi propagandi generis satisfacit: præcepto illo teneri non mulierem, sed virum ut ætatis annum attigit decimum & septimum: verum ob divinæ Legis studium retardare conjugium non esse nefas: functum esse præcepto propagandi generis cui puer & puella nati sunt: uxorem ad gignendum inhabilem amittendam esse. Si vir in uxorem impedimentum gignendi, uxor in virum conferat cui sit habenda fides? post præfinitum temporis spatium si nulli sint procreati liberi, mulieri esse in manu, ut fiat discessio: aliquem uxoris zelum esse laudabilem. Vel uxori suæ vim inferre minime decere: ad extremum quo*

ē iiij



## E L E N C H U S.

*animo inter se conjuges, quibusque moribus moratos esse conveniat?*

Cap. XVI. *A donatione propter nuptias differre bona dotalia: horum genera esse duo: nec donationem propter nuptias uxori quovis tempore solvi, nec de quovis fundo, nec sine dato jurejurando: quod ad argenti rationem attinet conditione mulierem esse pejori: ex edicto Sapientum etiam de re mobili persolvi cum donationem propter nuptias, tum cetera pacta dotalia: nunc verò donationem ex quodam pacto solvi de re mobili: ex auctoritate Sapientum uxori pro denariis centum donationis propter nuptias oppignerari bona viri universa. Mulierem velut reliquos creditores cum donationem propter nuptias exigat sacramento adigi, aut voti sponsione obligari: à quo, ubi, quando? Donatio propter nuptias veniatne hæredibus mulieris quando hæc diem suum obiit ante, quàm sacramentum dixit? Quod ad tempus suam possit uxor donationem propter nuptias exigere? Quid de donatione propter nuptias statuendum sit, si hoc in contentione ponatur, uxor utrum sit ducta virgo, an mulier?*



## E L E N C H U S.

XIII

*Si contentio sit inter virum & mulie-  
rem de remisso repudio, quid decernatur?*

*Quid si mulier divortij litteras afferat,  
non afferat perscriptionem dotalem?*

*Quid porro si perscriptiones dotales af-  
ferat geminas, geminasque divortij lit-  
teras? An mulier virum suum à vita  
discessisse prædicanti habenda sit fides,  
dandaque licentia nubendi alteri.*

**Cap. XVII.** *Post obitum viri, qui plu-  
res in matrimonio habuerit uxores, his  
donationem propter nuptias ex ordine  
collocationis persolvi: item & uxoribus  
creditores tempore antecedentes inter-  
dum præferri: totumque in expendendis  
nominibus jus antecedendi edisseritur:  
inde de his, qui donationem propter nu-  
ptias uxori pro viro aut spoponderint,  
aut in se receperint: cum viri bona uni-  
versa pro donatione propter nuptias mu-  
lieri oppignerentur, fieri tamen posse,  
ut vir si quid de suis vendat, venditio  
rata sit: mulieri licere ut in suam dona-  
tionem propter nuptias prædia viri di-  
vendat: quando, quomodo? Denique  
explicatur de donatione propter nuptias,  
quam mulier aut vendidit, aut viro  
remisit.*



## ELENCHUS.

Cap. XVIII. *Post viri mortem ab hæredibus hujus viduæ victum & cultum, habitationem & supellectilem suppeditare: ubi, quamdiu, quomodo? Ægro- tantem viduam curare interdum esse ho- rum, qui viri hæreditatem crevere, & sepultura afficere mortuam: interdum illorum ad quos pervenit mulieris hære- ditas: parum abesse quin vidua mulier operam eandem atque viro hæredibus ejus navet: ad quem dos viduæ mulie- ris morte redeat, & illius amplificatio quæ vivente viro facta sit? An vidua, quem vir ipse vivus fundum vendidit, hunc ab emptoribus ad usum & vitam suam possit recuperare? Si quis viduas reliquit plures, hisne ad victum sit an- tecedendi jus? Quæ vidua in leviri po- testatem incidit utrùm de viri extincti, an de leviri bonis sit alenda? Si certum quid vir moriens in victum destinavit mulieris, quænam sit ejus conditio? prius à muliere jusjurandum exigere, quàm ei quidquam decernatur ad victum. Consi- lium interdum viduæ sicut victum, item & decernere laborem. Viduæ, nisi per- scriptionem dotalem proferat, nullum decerni victum. Si mulier unà cum viro*



## E L E N C H U S.

XIV

peregre exierit, tum autem dicat redux virum è vita discessisse, aut nuntium sibi remisisse, habendane sit ei fides? An ob rem dubiam viri ab hæredibus etiam quid exigatur? ad exigendum victum aliud præfiniri tempus inopi, ac locupleti viduæ: sortis & accessionis donationis propter nuptias ad omnia rationem esse prorsus eandem.

Cap. XIX. Ex pacto dotali donationem propter nuptias & dotem à matre liberis masculis hereditate venire, siquidem mater ante obitum iuravit: atque pacto isto non tolli hereditatis æquationem, quam sancit divina Lex. Et patris hereditatem pervenire ad filios: puellas autem fratrum sumptibus tolerari ad præfinitum tempus: multum tamen interesse inter victum viduæ & puellarum: litteras dotalis proferri oportere ubi has perscribi moris est. Si quidquid fundi à patre relictum est, id totum ad victum puellarum requiritur, hereditate excludi pueros: quod si quis viduam simul & puellam reliquit, nec reliquit rei satis ad usum & vitam ambarum, puellæ præferri viduam: ubi nullus est puer superstes, hereditatem



## ELENCHUS.

*illico inter puellas majores & minores ex  
aquo partiri.*

Cap. XX. *Scivisse Sapientes, ut suæ quis-  
que filiae de re familiari impertiretur  
aliquid ad nuptias: id cultum appel-  
lari. Quid suæ quemque filiae ad cultum  
tribuere conveniat? An hoc filiae tribui  
oporteat tum, cum hæc eadem pater-  
nam hereditatem capiat? An viduæ  
superstitis victus obstet, quin puellæ  
suus tribuatur cultus? Si puella minor  
nubendo nihil de cultu suo significavit,  
anne perdiderit? An perdiderit puella  
major quia non petiit cum viro nupsit,  
aut à fratribus ali desita est?*

Cap. XXI. *Vxor quidquid fortuito re-  
perit, quidquid labore & manu efficit  
ad virum pertinere: mulierem enim  
quavis divitiis abundantem manu sua  
quid efficere necesse esse: genus laboris  
ad consuetudinem loci dirigi, assiduita-  
tem ad facultates: mulier ut ancillas  
habeat bene multas, nihilo secius opor-  
tere quædam officia viro per se ipsa  
præstet, plura inops, dives pauciora.  
Cum mulieri sit repudium remissum,  
huic nihilominus in manu esse, ut quos  
ipsa viro pueros peperit ad sextum æta-*



## E L E N C H U S.

xv

*is annum domi suæ secum retineat, atque interea loci virum his omnia ad usum & vitam suppeditare oportere: puellas enim à matre nunquam discedere.*

**Cap. XXII.** *Ex possessionibus uxoris, dum ipsa vivat, fructus omnes percipere virum, & hos eosdem ab emptoribus etiam, si quid mulier vendidit, recuperare: & recuperare solum quoque, si tamen eveniat, ut uxorem efferat: nam viro superstiti rem uxoris universam jure hæreditario obvenire præ cunctis, etiamsi ante, quàm venisset ad thalamum uxor morte occumberet. Quid statuendum de bonis fratriæ, quæ necdum venit in leviri potestatem? Quid de re mariti, qui sine liberis decessit? Quid porro de mulieris hæreditate si diem suum obierit ante, quàm sit leviro deducta domum? De vario genere honorum ad mulierem pertinentium: de horum venditione, donatione, & quacunque alienatione: de rebus à muliere clam viro depositis: idem de deposito servi, aut natu minoris.*

**Cap. XXIII.** *Vir si quid ante nuptias mulieri de jure suo nominatim concessit,*



## ELENCHUS.

*idemque perscripsit, ratum esse: Quas vir in rem uxoris egit impensas, alias aliter compensari: esse dotis aliam in aliis regionibus consuetudinem, eamque maxime servandam. Quidquid filio, filiaeque promissum à patre est in primas nuptias, id verbo adquiri: secundarum autem nuptiarum atque reliquorum etiam propinquorum aliam esse rationem: aliter esse statuendum si sponsæ pater genero quid in nuptias pollicitus peregre abisset, aliter si sponsa quod ipsa promisit præstare nequeat: item & interesse utrum sponsa quid ipsa promisit natu major, an natu minor: esse dies quosdam, quibus uxorem ducere omnino non liceat: præterea locis aliis alio die duci virginem, alio mulierem.*

Cap. XXIV. *Si quis duxisset uxorem aut sterilem, aut vetito interdictam, eamque non satis cognitam, hanc multis rebus multari: multari & eam, quæ virum renueret: pluribus etiam rebus multari mulieres istas, quæ viris propter mores suos post nuptias interdicantur: viro enim propter mores suos interdici mulieres, quæ fœdus conjugiale violarint, quæ contra Legem Moysis,*



## E L E N C H U S.

XVI

*contra morem Iudaeorum commiserint, quibusque infamiae nota iniusta sit. Qui sit ille mos? Quae sit infamiae nota?*

Cap. XXV. *Vxorem bona fide ductam si postmodum reperiatur aut certorum sponsione votorum obligata, aut quodam vitiorum genere temerata, uxorem illam quoque multari donatione propter nuptias. Et propter quaedam vitiorum genera virum invitum cogi, ut cum uxore divortium faciat.*

## PRIVILEGE DV ROY.

**L**OUIS par la grace de Dieu Roy de France & de Navarre, A nos amez & feaux Conseillers, les gens tenans nos Cours de Parlement, Maistres des Requestes ordinaires de nostre Hostel, Prevost de Paris, Baillifs, Senechaux, leurs Lieutenans Civils, & autres nos Justiciers & Officiers qu'il appartiendra, Salut. Nostre cher & bien amé LOUIS DE COMPIEGNE nostre Interprete ordinaire des Langues Orientales, Nous a fait remontrer qu'il a composé un livre intitulé, *Rabbi Mosi Majemonida secunda Lex sive Manus sortis*, lequel il desireroit faire imprimer & donner au public; Mais il craint qu'en ayant fait la dépense, d'autres le voulussent imprimer à son préjudice, s'il ne luy estoit pourvû de nos Lettres de Privilege sur ce nécessaires, qu'il nous a tres-humblement fait supplier de luy octroyer. A CES CAUSES, voulant favorablement traiter l'Exposant, & luy donner moyen de recueillir les fruits de son labeur, Nous luy avons permis & accordé, permettons & accordons par ces presentes, de faire imprimer ledit Livre par



tel Libraire ou Imprimeur, en un ou plusieurs tomes, volumes, marge, caractere, ainsi & autant de fois que bon luy semblera, pendant le temps de sept années consecutives, à commencer du jour qu'il sera achevé d'imprimer; iceluy vendre & debiter par tout nostre Royaume. FAISONS défenses à tous Libraires, Imprimeurs, & autres, d'imprimer, faire imprimer, vendre & distribuer ledit Livre sous quelque pretexte que ce soit; mesme d'impression estrangere & autrement, sans le consentement dudit Exposant, ou de ses ayans cause, sur peine de confiscation des exemplaires contrefaits, amende arbitraire, dépens, dommages & interests: A la charge de mettre deux exemplaires en nostre Bibliothèque publique, un autre en nostre Cabinet des Livres de nostre Chasteau du Louvre, & un en celle de nostre tres-cher & feal Chevalier Chancelier de France le sieur Seguier, avant de les exposer en vente, à peine de nullité des presentes; du contenu desquelles vous mandons & enjoignons faire jouir l'Exposant & ses ayans cause pleinement & paisiblement, cessant & faisant cesser tous troubles & empeschemens au contraire. V O U L O N S qu'en mettant au commencement ou à la fin dudit Livre l'extrait des presentes, elles soient tenuës deuëment signifiées; & qu'aux copies collationnées par l'un de nos amez & feaux Conseillers Secretaires foy soit ajoutée comme à l'Original. Mandons au premier nostre Huissier ou Sergent sur ce requis, faire pour l'execution des presentes toutes significations, défenses, saisies, & autres actes requis & nécessaires, sans demander autre permission: CAR tel est nostre plaisir. Donnè à Paris le 20. jour de Janvier l'an de grace 1669. Et de nostre regne le vingt-sixième.

Signé, Par le Roy en son Conseil, G A R N I È R.

*Et ledit sieur de Compiègne a cédé son Privilege à François Muguet, Imprimeur du Roy & de M. l'Archevesque, pour le Traité De Connubiis, suivant l'accord fait entre eux.*

Registré sur le Livre de la Communauté des Marchands Libraires & Imprimeurs de cette Ville, suivant l'Arrest de la Cour de Parlement du 8. Avril 1653. le 25. Janvier 1669. A. SOUBRON, Syndic.

*Achevé d'imprimer pour la premiere fois le 5. Aoust 1673.*

E X





EX SECUNDA LEGE  
SEU  
MANU FORTI  
RABBI MOSIS  
MAJEMONIDÆ  
TRACTATUS  
DE CONNUBIIS.

CAPUT PRIMUM.

I. **A**NTE datam Legem sicubi viro  
mulier occurrisset, atque eo-  
rum consensus ad matrimo-  
nium conspiraret, eam illico  
vir domum ducebat, atque solus solam am-  
plectebatur, tum deinde uxor ejus erat: ubi  
verò fuit data Lex, Israëlitis quidem præce-  
ptum est, ut si quis eorum ducat uxorem, is

A



## T R A C T A T U S

2.  
sibi primùm eam testibus adhibitis emat:  
tum pro uxore habeat. Namque hoc est,  
quod scriptum legitur: *Cùm emerit vir uxore,  
& ingressus fuerit ad eam, &c.*

*Deut. 22. 13.*  
Conclusionis  
ratio tota in  
hoc uno verbo

*np̄* vertitur,  
cujus ea vis  
est, ut etiam  
emere signifi-  
cet.

\* neque abhor-  
ret ista loquen-  
di ratio à con-  
suetudine La-  
tina: Nam &

Junonem ita loquentem facit Virgilius; *Connubio jungam stabili propriamque di-  
cabo.* Et Terentius scripsit: *Hanc operam tibi dico.*

II. Atqui hanc emptionem jubendo Lex  
sancit. Tribus igitur rebus uxor comparatur,  
argento, instrumento seu perescriptione, at-  
que congressu: congressu quidem ac perscri-  
ptione ex dicto Legis: argento autem insti-  
tutis Sapientum. Atqui hæc emptio passim  
\* *Dicatio* dicitur, vel *Sponsalia*: & quæ mulier  
harum trium rerum aliqua fuit empta, hæc  
vel dicata, vel sponsa dicitur.

III. Jam ubi fuerit empta mulier atque  
dicata, quanquam nondum est viro conjun-  
cta, nec deducta domum, tamen emptoris  
sit uxor; & si quis præter illum cum ea cor-  
pus miscuerit, hunc morti Judices addicun-  
to: atque emptor eam si repudiatam esse ve-  
lit, repudij libello opus esto.

*Vide Deut.*  
*22. 23.*

IV. Item ante datam Legem cùm in virum  
mulier uspiam incidisset, hic illam, siquidem  
cum eo concordaret, mercede data subegis-  
set vel in media via, & abisset: data Lege  
porrò meretrix interdicta fuit: scriptum est  
enim: *Non erit meretrix è filiabus Israël.*  
Quisquis igitur cum muliere cubuerit, non  
dicandi, sed scortandi nomine, verberibus  
à Lege multatur, quippe qui meretricem ha-  
buerit.

*Deut. 23. 17.*

V. Quarum à congressu mulierum viros



# DE CONNUBIIS.

3

Lex prohibet, atque etiam excidij pœna coërcet, quæ nominatim perscribuntur ea Legis sectione, cui nomen est, *POST MORTEM*, hæ videlicet illæ sunt, quæ cùm *incesta* nominentur omnes; tùm illarum unaquæque incesta nuncupatur. Hujus generis sunt mater, filia, soror, & harum similes.

Hoc mihi vocabulum occurrit, quo Aristot illa quæ dicuntur ad Latinam consuetudinem interpretarer.

VI. Præterea autem sunt aliæ quædam mulieres, quas traditione accepimus interdictas esse, nimirum ex Sapientum institutis, quæ utpote ab incestis illis alteræ, *Secundaria* vocantur, atque earum unaquæque *secundaria*. Hæ sunt numero viginti, quæ hîc describuntur. Avia materna & perpetua ista linea: nam & proavia, abaviaque ad infinitum interdictæ sunt. Avi materni mater unica. Avia paterna & perpetua ista linea, proavia atque abavia ad infinitum interdictæ sunt. Avi paterni mater una. Patris noverca, cujus est etiam indefinita linea. Itaque & Jacobi uxor, patriarchæ illius nostri, cuique nostrum interdicta sit. Noverca matris una. Uxor patrui, ejus videlicet, qui patris fuerit uterinus. Uxor avunculi, nec quidquam refert utrùm hic sit matris uterinus, necne sit. Nurus filij & continua linea, nurus quoque pronepotis, abnepotis ad infinitum interdicta sit, ut uxor cujusvis nostri *secundaria* fuerit Jacobo illi gentis nostræ parenti. Nurus filiæ sola. Filij è filia sola neptis. Filij è filio neptis sola. Itemque sola neptis filiæ è filia. Sola neptis filiæ è filio. Privigni

A ij



# TRACTATUS

4  
sola neptis è filia. Privignæ sola neptis è filia. Soceri sola materna avia. Socrus sola paterna avia. Socrus avia materna sola. Soceri avia paterna sola. Secundarum igitur quatuor omnino sunt, quarum interdictio nunquam & nunquam desinit. Avia materna & superiores ad infinitum: Avia paterna & superiores ad infinitum: Noverca patris & superiores ad infinitum. Filij nurus & inferiores ad infinitum.

VII. Quarum verò conjunctione Lex interdicit quidem; verum enim excidij pœna non coërcet, hæc *vetando interdictæ* dicuntur. Item & interdictæ sic, tanquam \*meretrices: atque hujus generis sunt novem istæ. Primum summo sacerdoti vidua muliere interdicitur: deinde muliere repudiata, meretrice, temerata interdictum est tam summo, quam privato sacerdoti. Israëlítico viro fœmina spuria: spurio viro Israëliticæ fœminæ. Et Israëliticæ fœminæ viro Ammonita, Moabitate. Et Israëliticæ fœminæ viro cujus sint vulnerati, comminuti testes, atque etiam prorsus execto. Rursus viro interdictum est muliere jam à se repudiata, si secundum repudium alteri nupserit. Fratria quæ nupserit alieno viro, tum cum esset etiam in potestate leviri: tum fœmina quæ levirum disscalceavit, ea repudiata instar habetur, atque sacerdoti interdicitur, nempe ex Sapientum institutis. Jam spuriorum numero & loco ducuntur Nethinæi, tam viri, quam fœminæ, quorum connubio Israëlitis inter-

\* Ista vox Hebraica paululum corrupta est in editione Veneta in folio parvo, cum duobus Interpretibus, quæ excusa fuit anno Do. 1574. & fere in volumina quatuor distinguitur. Eadem pura & integra extat in editione altera, item Veneta in folio magno, cum duobus similiter commentariis, quæ excusa fuit anno 1524. & fere in tomos distribuitur duos. His ego duabus editionibus usus sum ad converten-



DE CONNUBIIS.

dictum est à Sapien-  
tibus. Nam tractatu de  
concubitibus vetitis explicabimus Nethi-  
næos, qui sint.

dum hunc tra-  
actatum. Ita-  
que Lectorem  
velim esse mo-  
nitum, ut si

forte versio non respondeat harum editionum alteri, alteram consulat: neque enim  
ita raro has inter se discrepare; nec ita leviter, quod exemplis deinceps aliquot  
confirmabo: porro autem iudicio permittam Lectorum & diligentia.

VIII. Porro sunt quorum connubio à Le-  
ge interdictum est non prohibendo, sed im-  
perando: horum sunt tria genera. Ægyptio-  
rum enim atque Idumæorum stirpe una &  
item altera, seu mascula, seu fæminea uni-  
versis Judæis interdicitur: & summo sacer-  
doti mulieribus virum expertis: atqui nec de  
illis est in Lege scriptum: *Non veniet, &c.*  
neque de his, *Non accipiet*: quoniam verò  
est in Lege, *Generatio tertia hisce venito in*  
*congregationem Dei*, inde colligitur primam  
ac secundam istorum stirpem non esse ad-  
mittendam. Item quia de summo sacer-  
dote in Lege dicitur: *Virginem ducet uxo-*  
*rem*, hinc efficitur, ut quæ fæmina virgo  
non sit, ab hoc non ducatur: quod autem  
elicietur è jussu vetitum, id pro jussu habe-  
bitur.

Deut. 28. 8.

Levit. 21. 13.

CAPUT SECUNDUM.

I. **F**œmina ab ortu usque dum comple-  
verit duodecim annos ipsos, parva, pu-  
pula dicitur: cui id ætatis quamvis multa  
pubertas extiterit, nihil aliud, quam verru-  
cam ducitur esse. Eadem annos duodecim &

A iij



diem unum nata, vel eo plus, si locis inferioribus ad pubertatem constitutis pilos ediderit duos, puëlla vocari cœpit.

II. Nam hac ætate duos pilos efferre dicitur signum inferius. Post editum hoc inferius signum, puëlla vocatur in menses sex totos, quibus exactis porro vel die primo pubes appellabitur: nihilo enim plus, quàm menses sex à puëritia ad pubertatem intercedit.

III. Quæ eadem si duodenos annos atque diem unum jam compleverit, necdum extulerit duos pilos, cùm sterilitatis appareant signa, pro parva tamen habetur vicesimum ad ætatis annum: quo si hosce duos pilos efferat, etiam puëllarum erit in numero sex menses totos, quibus elapsis demum pubes appellabitur.

IV. Si nata videnos annos, triginta diebus minus, necdum fudit hos duos pilos, & omnia præbet sterilitatis signa, hæc quidem ad gignendum erit inhabilis: sin autem sterilitatis ei signa non extiterint omnia, pro parva sit habenda, vel usque dum produxerit hosce duos pilos, vel quinque & triginta egerit annos & diem unum.

V. Sin hanc ætatem attigerit, necdum hos produxerit duos pilos, cùm nullum extiterit prorsus sterilitatis signum, tamen sterili appellanda sit: unde cognoscitur huic sterili nullum esse puëritiæ tempus; quippe quæ protinus è parva pubes existat.

VI. Ergo in fœmina sterilitatis signa sunt ista: Si mammis sit destituta: si concubitus



ei sit difficultas : si desit illa muliebris alvi declivitas : si sit densa vox , ut à voce viri non internoscatur. Jam puëlla , pubes , sterilis pariter unaquæque major appellatur.

VII. Sunt etiam in partibus fœminei corporis superioribus signa puëritiæ , quæ propterea superna dicuntur : en illa. Ut uberum loco rugam contrahit , si manum in dorso reponat : ut mammarum summa nigrescunt : ut papilla uberis cùm fuerit digito depressa , tardiùs redit in locum : ut uberis summa papilla rimas agit , atque efficitur in hujus extrema parte parvus globulus ; at ab his , quos ego audiui , doctoribus ita definitur , ex quo nasi diffunditur extremum : Item ubi declinant ubera : itemque ex quo mammæ se se collidunt : ut circundatur corona , id est , ut contra ventrem existit supra partem pudibundam tumens illa caro : ut caro hæc eadem compressa mollescit.

VIII. Hæc igitur octo signa fœminæ duodecim annos , aut eo minùs natæ cùm extiterint seu singula , seu universa , nihil omnino movent : sed parva habetur. Ubi duodecim annos & diem unum exegit , si compareat signum illud inferius , nullum istorum porrò curæ sit. Sin autem inferius non extitit , & extitit unum ex istis , incertum est puëllane , an parva sit , atque ad omnia in severiorem partem judicatur : sin autem hæc existant omnia simul , ista quidem sine dubio major erit , ut signum inferius non appareat : neque enim fieri potest , ut cuncta illa cùm

A iiij



existant, hoc nondum emerferit: verum ex-  
ortum continuo excidit.

IX. Fœmina si post exactos duodecim an-  
nos nullum omnino neque supernum, neque  
infernum edidit signum; sed enim peperit,  
major fuerit. Nam signorum instar sunt li-  
beri.

X. Masculus autem ex quo editur in lucem  
usque dum complevit annum ætatis decimum  
& tertium, parvulus appellatur, item & pu-  
pulus. Atque hoc temporis curriculo quam-  
vis ei multa pubertas extiterit, non signum,  
sed verrucam esse putandum erit. Cum verò  
partibus illis infernis ad pubertatem consti-  
tutis duo pilos ediderit natus decem & tres  
annos & diem unum, vel eo plus, major ap-  
pellari cœpit atque vir.

XI. Qui si id ætatis attigit, necdum hosce  
duos pilos extulit, tamen si spadonis signa præ-  
bet, tamen parvus habetur dum viginti na-  
tus sit annos, triginta diebus minus. Nam  
hanc ætatem ut attigit, & duos pilos non  
extulit, neque ad illam partem corporis infe-  
riorem, neque ad barbam, si vel unicum  
præbeat spadonis signum, spadonum erit nu-  
mero: Cæterum jure majorum ad omnia. Sin  
nullum præbeat spadonis signum, etiam par-  
vorum erit in numero tamdiu dum inferiori  
corporis idonea parte duo pilos ediderit, aut  
quinque & triginta annos, insuper & diem  
unum exegerit.

XII. Hoc enim ætatis spatio qui non pro-  
duxit hos duos pilos, is spado sit; u tertiam spa-



donis signum præbeat nullum. Jam natus annos viginti, triginta diebus minùs, si duos pilos inferiori parte non ediderit, atque hos ediderit ad barbam, is cùm præbeat unum è signis spadonis, tamen non ducetur spadonum numero, sed parvorum: idque tamdiu, dum cuncta extiterint spadonis signa, aut quinque annos exegerit & triginta, insuper & diem unum.

XIII. Hæc igitur sunt spadonis signa, si quis imberbis sit, pilo tenui, levi carne: si facit urinam nihil spumantem, eandemque reddit non fornicatam: si semen obscurum est, urina non acefcit: si lavet die brumali, nec caro vaporem exhalat: si vox sit adeo mollis, ut à fœminea non internoscatur.

XIV. Atque iste quidem vulgò spado dicitur: puërum verò, cui penis, aut testes sunt execti, disrupti, contusi, ita, ut sit à gentibus, eum hominum manu castratum vocant. Is natus tredecim annos & diem unum, majorum est in numero, quippe cùm nullum editurus sit signum unquam.

XV. Puër tredecim annorum atque unius diei, si necdum tulit signum illud inferius, cùm superiora emerferint omnia, incertum est sitne major, necne sit. Quòd si locus inferior non sit spectatus cùm appareant superiora pubertatis signa pro majori habetur.

XVI. Jam qui in puëro, puëlla, passimque requiruntur duo pili, eorum iste modus est, ut ad radicem flectatur extremum. Atque ex quo sic creverunt, ut tolli forficis acie



possint, dum eò veniant, ut ad radicem flecti queat extremum, quovis loco de ipsis in severiorem partem judicatur. Itaque in severitatem etiam tam mares quàm fœminæ majores habentur, si his illi pili duo creverunt eò, ut forficis acie possint tolli, & iidem etiam in severitatem minores habentur, siquidem non eò venerunt pili, ut eorum ad radicem possit contorqueri caput.

XVII. Atqui hi duo pili corporis ut in parte pudibunda existant, necesse est, quæ quidem ad exhibendum signum tota est idonea supra, infra, atque etiam membro seminis in ipso. Jam hi duo pili simul loco sint in uno necesse est: item ad radices ut lacunæ sint: quanquam si lacuna sint in una ambo, signum est satis idoneum. Quòd si lacunæ duæ existant, altera propter alteram, quanquam nullus in ipsis pilus inest; nihilominus certum est signum: constat enim lacunam sine pilo esse nullam: verùm pili qui fuerant in illis, exciderunt.

XVIII. Fœmina si duos pilos edidisset intra duodecimum ætatis annum: si mas intra decimum & tertium, in utroque, sicut ante posui, pro verruca habetur. Iidem igitur post annum decimum & tertium in masculo, in fœmina post duodecimum si loco remansissent, signo non essent.

XIX. Tum videlicet cùm intra præfinitum tempus inspicerentur, atque verrucam esse, exploratum atque compertum esset. Si verò postea demum inspiciantur, atqui hi duo pili



reperiantur, vero pro signo ducantur. Nam fortè venerunt ante tempus, atque adeò veru-  
ruca est, id verò nunquam dicitur.

XX. Fœmina cùm perlustratur, sive intra tempus, hoc est, duodecimo anno toto, vel eo citius, sive post tempus illud constitutum, mulieres adhibeantur idoneæ & dignæ quibus credatur. Etenim vel uni mulieri hac de re fides habeatur in utramque partem.

XXI. Jam anni qui commemorantur in masculo, fœmina, æstimationibus animantium, atque hominum dedicatorum, catervisque locis merè lunares, aut solares non sunt: sed quales in ratione fastorum abs Senatu constituuntur, simplices atque intercalares sic, ut tractatu de CONSECRATIONE CALENDARUM disputavimus. Nam huiusmodi anni numerantur in omni ratione Legis.

Ex Hebræo in Latinum conversus hic est à nobis, atque in lucem editus.

XXII. De annorum verò numero nec mulieribus, neque propinquis creditur: creditur autem viris alienis duobus, si modo sunt idonei, qui testimonio dicendo adhibeantur.

XXIII. Patri, cùm ita dicat, filius iste meus natus est novem annos & diem unum, vel hæc filia mea tres annos & diem unum nata est, creditur pro ratione sacrificiorum: pro verberum, reliquarumque pœnarum non creditur. Idem cùm ait filius iste meus egit tredecim annos & diem unum; vel filia ista mea duodecim annos & diem unum habet, creditur ei quidem ad rationem votorum,

Neque enim ad facienda sacrificia, & pœnam subundam apta est omnis ætas, quæ de re alio loco agetur.



æstimationum, anathematum: ad verberum & reliquarum pœnarum non item.

XXIV. Cui virilis simul & natura fœminea existit, is androginus ferè vocatur, atque incertum est utrùm vir, an fœmina sit: neque enim signum est ullum, unde certum cognoscatur unquam sitne vir potiùs, quàm fœmina.

XXV. Et cui neutra existit natura, sed est omnino obthuratus, is obstructus dicitur, qui itidem ambiguus est. Jam si discedat obstructio pro viro si vir inveniatur; si fœmina, pro fœmina habebitur. Atque obstructus ille atque androginus duodecim annos & diem unum nati, majorum in numero ducuntur: de quibus ego ubique disputo.

XXVI. Jam surdus & surda, de quibus passim agitur, homines sunt muti juxta atque furdi. Nam captus auditu si loquitur, contra ve si loquendi facultate carens habet sensum aurium, cæterorum hominum est instar. Vir & fœmina mente integri, id est, qui neque furdi sunt, neque dementes, sani vocantur.

XXVII. Itaque numero viginti sunt ea, quorum significationem hisce duobus capitibus exposuimus nomina: nempe Dicitio, Incesta, Secundaria, interdicta Verito, interdicta Jusso, Parvula, Puëlla, Pubes, Sterilis, Major, Signum inferius, Signum superius, Parvulus, Spado, manu hominum Castratus, Major, Androginus, Obstructus, Surdi, Sani. Hæc igitur nomina tibi proponas semper, atque omnem eorum significa-



tionem diligenter attendas, ut quo loco cunque aliquod eorum commemoremus, non explicatu opus sit usque.

---

### CAPUT TERTIUM.

I. **U**T igitur mulier dicabitur? Nimirum si quis eam argento sibi dicarit, id quidem minus non erit, quam aut argenti nummus, aut quod valet tantundem. Et huic vel ita ducturus est, Ecce tu mihi dicata sis; vel, Ecce tu mihi desponsata sis; vel, Ecce tu mihi sis uxor hac re, atque illam ei dabit testibus adhibitis. Jam vir erit proferens ista verba, ex quibus intelligatur eam sibi mulierem in uxorem emere. Item argentum illi dabit ipse.

II. Nam argentum istuc si dedisset viro mulier, simul & ipsa viro diceret, En ego tibi dicata, En ego tibi sponsa, En ego tibi uxor, vel quamvis emendi formulam, nequaquam dicata sit. Item si viro dedisset argentum mulier, & verba illa vir proferret, nulla sit dicatio: Sin autem vir argentum dederit, & verba sit effata mulier, dicatio sit incerta.

III. Si quis autem perscriptione sibi dicarit, is in charta, testa, folio, vel quavis alia re scripserit, Ecce tu mihi dicata, Ecce tu mihi sponsa, & horum similia: tum præsentibus testibus id ei dederit.

IV. Et tanquam repudij libellus, sic hoc etiam ejus, quæ dicatur, mulieris nomine



scriptum esse necesse erit : porro autem nisi voluntate mulieris non scribatur. Quod si scriptum præter voluntatem mulieris fuerit, aut non fuerit ejus nomine scriptum, tamen si postea volenti dedit coram testibus, dicata tamen non erit.

V. Jam qui conjunctione sibi fœminam dicaverit, hic ei dixerit, Ecce tu mihi dicata; vel, Ecce tu mihi desponsata; vel, Ecce tu mihi uxor hac conjunctione fueris, aut quid horum simile : tum testibus præsentibus aliquò se cum ea receperit, continuòque conjunxerit. Etenim qui sibi fœminam ista ratione dicarit, is fere conjunctionem perfectam esse cupit : itaque cum fuerit istæ absoluta conjunctio, tum demum uxor erit dicata.\* Et cuicui modi conjunctio fuerit, seu secundum, seu præter consuetudinem ritè mulier dicata sit.

\* Hinc usque ad proximum articulum quæ consequuntur extant in eo exemplari quod Venetiis 1524. excusum est in folio magno : Desideratur in exemplari quod ibid 1674. editum est in folio parvo.

VI. Atque verba quæ dicando vir effatur, ea oportet ita sonent, uxorem esse viro emptam, non contra emptum uxori virum : ut si quis mulieri aut dixisset, aut in illo, quod dedit, instrumento scripsisset, En ego sum maritus tuus, En ego sponsus tuus, En ego vir tuus, & horum similia, omnino dicatio nulla sit. Si dixisset, scripsisset, En tu mea uxor, En tu sponsa mea, En tu emptam mihi, En tu mea, En tu ducta mihi, En tu desponsata mihi, En tu in potestate mea, En tu conjuncta mihi, & horum similia, ista quidem ritè dicatur.

VII. Sin ita dixisset, vel scripsisset, En tu



propria mihi : En tu addicta mihi : En tu adiutorium meum : En tu contra me : En tu costa mea : En tu seclusa mea : En tu loco meo : En tu vineta mea : En tu captiva mea , ista de dubio dicata sit : modò tamen de dicandi consilio priùs cum fœmina egerit ; alioquin ista quidem verba nihil moveant.

VIII. Atque hoc viro concessum est , ut mulierem , quo illa cunque sermone utatur , eo sibi dicet , & verba ejusmodi proferat , ex quibus intelligatur hanc sibi mulierem emptam esse sic , ut supra posui. Si quis de dicatione cum muliere egerit , eamque annuentem protinus sibi dicarit , non quod huic quidquam explicarit , dixeritve : sed quod in manum quid dederit , aut cum ea corpus miscuerit , siquidem hac de re inter se egerant , fatis sit : neque porrò opus est quidquam explicari. Eadem est ratio testium , qui aut ad dicationem adhibeantur , aut ad repudium : nihil enim necesse est , ut hisce dixeris , vos appello testes ; sed si præsentibus illis aut tibi dicaris mulierem , aut repudiaris , ritè dicata , repudiataque sit.

IX. Si quis mulieri dixerit , esto dicata dimidio mihi , ritè dicatur ; quippe quod idem est , ac si dicat , esto uxor mea , tu , & item altera : ita fit enim , ut duntaxat dimidia viri pars ad ipsam pertineat. Sin autem ita dicat , esto pars tui dimidia dicata mihi , nullatenus dicata sit : id enim omnino fieri non potest , viris ut duobus simul eadem mulier uxori sit. Item si quis mulieri dixerit :



esto mihi dicata, item & huic alteri, nullatenus dicata sit.

X. Si quis mulieri ita dicat, esto pars tui dimidia nummo dicata mihi, & nummo dimidia pars altera: si dicat, esto dimidia pars tui dicata mihi dimidio nummi, & nummi dimidio pars altera dimidia tui, ritè dicatur. Quòd si mulieri quis ita dicat, esto dicata mihi nummo hodie dimidia, & dimidia nummo in crastinum: vel ita, duæ dimidiæ partes tui nummo: sint duæ filiae tuæ nummo duobus filiis meis: sit tua mihi nummo dicata filia, simul & empta bos: filia tua, fundusque tuus sint nummo mei, hisce formulis de dubio facta sit dicatio.

Deut. 22. 16.

XI. Filiam pater præter voluntatem ejus dicaverit dum parva sit; itemque dum puella dicitur in ipsius potestate fuerit: huc enim spectat Legis illud, *Filiam meam dedi viro isti uxorem*. Atque dicationis pretium patris est. Eiusdem est quod illa reperit, quod manibus exercet, quod pro donatione propter nuptias ei promissum à viro fuit, si post sponsalia repudietur, aut vidua relinquatur: omnia patris sunt dum filia pubes evadat. Itaque pater recipit dicationem filiae cum primùm nata sit usque dum pubes fuerit. Etenim pater si cui filiam dicarit surdam, insanam, ritè viro conjuncta sit. Atque nata tres annos & diem unum conjunctione dicabitur, si modò pater annuat. Minorem enim si pater alicui conjunctione dicasset, nullatenus dicata sit.

XII. In



XII. In filiam verò puberem patri potestas nulla. Hæc enim reliquarum est similis mulierum, quæ nisi voluntate sua non dicantur. Et quam pater collocarit, si videtur vivo patre, vel repudietur, ea quamvis adhuc parva sui juris sit : nam ut filia nupserit, nihil in eam porro patri potestatis erit unquam.

XIII. Si quæ dicaretur ante puberem ætatem insciente patre, nequaquam rata fuerit ea dicatio ; ut etiam posthac pater ei placatus efficeretur : Etenim si fuerit ab istiusmodi dicatione viduata, vel repudiata, non ideo sacerdoti sit interdicta. Atque etiam dicationem istam sustulerit tum ipsa, tum parens : sic enim quæ dicatur sive præsentem, sive absente patre, nullatenus dicata sit.

XIV. Filia cùm ambigitur utrùm pubes sit, tum sive pater eam dicaverit inscientem, sive se ipsa dicarit clam patre, de dubio dicata fuerit, atque adeo dubij ergo repudio opus est. Omnino viro est integrum mandare cuipiam, ut sibi uxorem dicet seu certam quandam, seu de cunctis aliquam : tum etiam fœminæ majori procuratorem constituere, qui id, quo dicatur, recipiat tum à certo quodam viro, tum etiam cunctorum ab aliquo. Porro patri licet etiam mandare cuipiam, uti recipiat dicationem filiæ quæ potestate in ipsius sit. Et filiæ parvæ pater dixerit, abi receptum dicationem tuam.

XV. Cùm igitur cuipiam mandetur dicationem recipere, præsentibus testibus mandetur necesse est : vir autem si cuipiam man-



dat, ut sibi uxorem dicet, nihil opus sunt testes. Nam in viri mandato nullus est alius testimonio locus, nisi rei veritas ut declaratur: ergo si rem profiteatur & is cui mandata fuit, & qui mandarit, sanè testes necessarij non sunt. Similiter judicandum erit de nuntio qui remittitur uxori, atque procuratore, cui sacra illa mandantur à frugibus segreganda, & horum similibus. Procurator enim hominis instar est ipsius, atque adeo testes non sunt opus.

XVI. Atque procurator ipse quoque testis erit idoneus. Si quis igitur uxoris sibi dicendæ negotium mandaverit duobus, iidem & procuratores & testes eam illi dicaverint: nec verò necesse sit, ut ad dicationem illam duo testes alii adhibeantur.

\* Dictum est ante de his agi furdis, quos loquendi vis pariter & audienti deficiat, qui passim Hebræis dementium sunt instar.

Deut. 28. 18.

XVII. Omnes sunt idonei, quibus negotium mandetur, præter \* furdos, dementes, parvos, qui non sunt animi compotes: & ethnicos, qui non sunt participes fœderis. Nam ex hoc Legis dicto: *Sic offertote vos quoque*, insuper discitur & procurator, ut sententia loci sit ista. Quemadmodum vos participes estis fœderis, ita procuratores quoque fœderis sint participes, sic; ut prorsus excludantur ethnici. Servis enim rei pecuniariæ procuratio committetur, non item dicationis atque repudiij; quippe quos repudiij, dicationisque leges non tenent.

XVIII. Cùm igitur viri procurator uxorem dicarit, huic ille ita dixerit, *Esto dicata huic argento isto, vel per scriptione ista*. Sin au-



tem procurator sit mulieris, qui dicationem recipiat, tum illi vir ita dicat: *Esto hac abs qua legatus es dicata mihi*: cui ille, *Hanc ego tibi dico*, vel, *Hanc ego tibi uxorem do*, & horum similia. Eodemque modo si quis sibi dicat uxorem per hujus patrem, patri dixerit, *Esto illa tua mihi dicata filia*: tum pater illi, *Hanc ego tibi dico*. Quod si pater, procuratorve respondeat, *ita*, satis erit: immo & si fileant: si quis enim patri, procuratorique, dum hac de re agant, dederit aliquid, idemque non modò nihil explicet, sed ne dicat quidem; tamen satis firma dicatio sit. Quod si quis per procuratorem vel patrem sibi dicarit uxorem per scriptione, hanc nisi sciente & volente patre procuratoreque non fecerit. Nam sic se habet totum hoc uxoris dicandæ negotium, ut cum uxore vir, ejusque procurator itidem, ut cum procuratore aut patre mulieris agat.

XIX. Multo verò vir melius fecerit si per se ipse, quàm si per procuratorem suum sibi dicarit uxorem: item & uxor si per se ipsa, quàm si per procuratorem suum dicata fuerit. Et quanquam patri concessum est, ut dicaret filiam adhuc parvam, sic facere neminem decet. Etenim sancitum à Sapientibus est, ut ne quisquam filiam parvam dicaret, nisi si jam adulta diceret, hunc ego virum volo: nec verò vir parvam sibi dicare putet decere: neque porro sibi dicarit uxorem, quin viderit, atque etiam idoneam repererit: ne forte posthac displicenti nuntium remittat;

B ij



aut etiam cum invisa sese jungat.

XX. Est quidem è lege dicare sibi mulierem concubitu: item & percriptione. Nam si percriptione repudium efficitur, quod quidem apertè Lex: *Et scribet ipsi libellum repudij*, percriptione itidem perficietur conjugium: Atque etiam argenti ratio est illa quidem è Lege: verumtamen datur hîc interpretum explicationi locus: hoc enim Legis dictum: *Cùm acceperit vir uxorem*, ita sunt interpretati Sapientes, ut vellent acceptiorem istam argento fieri, quoniam & in Lege habemus: *Dabo pecuniam, accipe eam à me.*

Deut. 24. 1.

Deut. 22. 13.

Gen. 23. 13.

XXI. Sic enim est ex rei veritate: verum jampridem hæc communis est omnium Israëlitarum consuetudo, ut argento, vel argenti pretio dicent mulierem, atque etiam percriptione, si libeat, non item concubitu si res sit integra. Quòd si quis sibi mulierem concubitu dicasset, verberibus coerceatur de rebellion: id adeo, ut Israëlitas ea res ne pronos ad libidines reddat: nec verò minus rata atque firma dicatio sit.

XXII. Nam si quis mulierem haud ante desponsatam dicaverit; item si quis in medio foro dicarit, cùm sit dicatio stabilis, nihilominus de rebellion verberibus multatur, ea re, ne via muniatur ad impudicitiam, neu dicata mulier meretricis sit similis ejus, quæ fuerat ante datam Legem.

XXIII. Si quis sibi mulierem dicarit sive per se ipse, sive per procuratorem, primùm pro solemnî præceptorum exequendorum



more aut ipse, aut ipsius procurator Deum veneretur necesse est: tum deinde dicabitur. Quod si quis sine prece dicasset, nullam sanè posthac adhibebit. Nimirum hæc est illa supervacanea precatio; siquidem tota jam transacta res est.

XXIV. Quænam igitur erit ista precatio? Nempe: *Laus tibi Domine, Rex mundi, qui nos initiasti praeceptis tuis, & jussisti nos ab incestis abstinere: idemque nobis interdixisti sponsatis, & concessisti nuptas thalamo, & dicatone: Laus tibi, Domine, qui sanctificas Israëlitas.* Nimirum hæc est illa sponsaliorum gratulatio, cui quidem faciendæ vini vel sicerae cyatum populus solet adhibere. Itaque ubi vinum suppetit, primùm de vino fiet Deo gratulatio: dein de sponsalibus: tum erit facienda dicatio. Ubi vinum & sicera desit, hæc separatim fiet sponsaliorum gratulatio.

#### CAPUT QUARTUM.

I. **M**ulier nisi volens nunquam dicabitur. Si quis igitur invitam sibi dicarit, dicatio nulla sit. Si verò sibi dicare mulierem vi cogatur vir invitus, firma fuerit dicatio. Viro licet, ut simul unà plures sibi dicet mulieres hac lege, ut illarum unicuique ex argento, si tamen argento fiat dicatio, nummus obtingat. Licet ut harum una procunctis, aut alius de voluntate ipsarum dicationis pretium accipiat.

B iij



II. Si quis sibi mulierem dicasset, idemque de hujus voluntate dicationis pretium mulieri cum ipsa consuetudine conjunctæ dedisset in manum, dandoque pretio huic ita diceret, Et tu etiam, vel, Sic & tu, vel simile quid, ambæ ritæ dicatæ fuerint. Sin autem cum pretium in manum daret, huic ita diceret, Et tu; ista quæ dicationis acciperet pretium, de dubio dicata sit: nihil enim fortassis aliud voluit, quàm pertentare animum ejus, qualis esset: ut hic esset ejus sensus, Et tu quid ais hac de re, ipsaque pretium dicationis accepit ideo, quia rogaret perspiciendi animi causâ: itaque de \*dubio dicata ista fuerit.

\* Horum verborum hæc est sententia, mulierem dubij causâ jugali vinculo teneri sic, ut nisi libello repudij exolvi nequeat, & alia porro dicatione opus sit ut huic eidem domum ducatur. Hoc ipsum in textu paulò post explicabitur.

III. Sin autem ita diceret, sis isto mihi dicata denario, eaque acceptum denarium aut in conspectum ejus projiceret, aut in ignem, aut aliò, ubi interiret, dicatione nulla sit. Eidem si mulier respondeat, da denarium patri, da patri tuo, viro illi, isque dederit, nequaquam dicata sit. Cum verò mulier ita dicat, da denarium huic, qui meo nomine accipiat, tum si dedit, ritè dicata fuerit.

IV. Sin mulier dicat, repone denarium in saxo, nullatenus dicata sit: eadem dicata sit, si saxum hoc ipsius fuerit: sin autem saxum hoc commune sit amborum, mulier de dubio dicata fuerit. Si quis mulieri dixerit, hoc tu mihi pastillo panis dicata esto, eique respondeat, hunc tu da pauperi, cum pauper iste propius à muliere sit, dicata tamen



non est. Nihilò secius si dixerit, tu cani da pastillum: Si verò mulieris sit propria canis, dicatio rata sit. Cùm verò mulierem morsura canis aliena persequitur, tum si dixerit, da pastillum isti cani, de dubio dicata sit.

V. Si quem fructus, vasa, & horum similia vendentem mulier adisset, eique dixisset, da mihi ex istis aliquid: tum huic ille, tu mihi dicata fueris si dederò, eaque respondisset, sic, atque ille dedisset, ista quidem esset ritè dicata: Sin autem mulier ei respondisset, ex istis da mihi, projice mihi, aut alia hujusmodi verba, quorum vis esset, ne tu hisce rebus ad ludendum me abutare; da tantùm, atque dedisset, nequaquam dicata sit mulier. Similiter si cui vina potanti mulier diceret, da mihi cyatum unum; & huic ille, tu mihi dicata fueris si dederò; si respondisset mulier, tu potandum præbe potum, vel potum da, porrige, nulla dicaretur: neque enim istis vocibus videtur esse subjecta vis alia, quàm hæc, tu mihi potum præbe tantùm, nec ullum alium ludum mihi ludere suscipias.

VI. Si quis sibi mulierem dicaverit uno duntaxat adhibito teste, nihil nos ejus dicatio moveat, cùm ambo rem profiteantur: multò etiam minùs si quis dicaret nullis adhibitis testibus. Si quis mulierem sibi dicarit adhibitis ejusmodi testibus, quibus Lege non est testimonij dictio, dicatio nulla fuerit: sin eos adhibet, quibus Sapientum autoritate non est testimonij dictio, aut quibus Lege sit testimonij dictio, necne, non liquet, is

B iij



si velit eam uxorem ducere, rursus coram idoneis testibus dicabit: Si nolit, repudij libellus ab eo mulieri opus est, vel propter incertam Legem, vel propter Sapientum certa vetita. Immo verò si dicationem mulier factam esse neget, aut arguat mendacij testes, nihilominus repudij libellum invita cogitur accipere. Atque eadem est omnium dicationum incertarum ratio. Si velit eam uxorem ducere, de integro firma dicatione fiet: si nolit, propter dubium mulieri ab eo repudij libellus opus est.

VII. Parvus si quam sibi dicarit, nulla dicatione fuerit: Major autem si sibi dicarit parvam, videlicet eam, quæ vel fuerit parentibus orba, vel patris è potestate excesserit, si pauciores quàm sex annos nata fuerit, quamvis sit *eloquij mystici gnara, prudens, intelligens*, nullus est dicationi locus, adeoque ne renuat quidem necesse erit. Sin annos habeat decem, aut eo plus, quamvis adhuc rudis, si quidem libenti & volenti facta sit dicatione, satis erit dicata ad renuendum. Verùm ab sexto ætatis anno ad decimum spectandus erit ejus captus, si rationem nuptiarum, atque dicationum penitus cognitam ac comprehensam habeat, renuat necesse est: sin minus, nec ad renuendum quidem satis erit dicata, nec verò renuat, necesse est.

VIII. Quid igitur sibi vult, satis erit dicata ad renuendum? Nempe si posteaquam sic fuerit dicata cum isto viro manere nolit, necesse est, ut præsentibus duobus testibus

Hæc Isaia  
Prophetæ ver-  
ba hic Scriptor  
noster à genui-  
no sensu defle-  
xit ad rem  
suam, ut his si-  
gnificaret vir-  
ginem par-  
vam, quæ vim  
his vocibus, di-  
cationi, spon-  
salibus, nup-  
tiis, matrimo-  
nio subjectam  
jam satis in-  
telligeret.



renuendo dicat, hunc ego nolo: quo facto & sine repudij libello discedit, ut tractatu de repudiis disputabitur. Atque hæc illa est renuens quæ vocatur. Quod autem sine repudij libello discedat, hæc est causa & ratio, quoniam ejusmodi dicatio è Lege quidem nulla sit: sed enim ex autoritate Sapientum suspenditur; ut si cum hoc viro maneat usque dum adoleverit, tum hujus incipiat stabilis uxor esse viri, nec adultam ei de integro dicari oporteat. Sin autem cum viro ætatem agere nolit, renuat, atque sine libello discedat.

IX. Surdus si duxerit uxorem sanam: si viro sano surda nupserit, itidem è Lege dicatio nulla fuerit: sed hanc fixam voluerunt esse Sapientes. Itaque si vir sanus hominis furdi sanam uxorem sibi dicarit, ista scilicet huic alteri propria, ritèque dicata fuerit; adeoque repudium hic ei renuntiabit, atque erit suo illi viro furdo licita. Demens autem homo si sibi sanæ mentis uxorem dicarit: rursusque uxorem si sibi dicarit insanam vir animi compos, dicationes istæ nullæ sint, nec è Lege, nec ex autoritate Sapientum.

X. Si sibi dicarit uxorem sive spado, sive hominum manu castratus: itemque si mulier ad partum inhabilis dicata fuerit, istæ quidem dicationes firmæ, ratæque fuerint.

XI. Obstructus, androgynus sive sibi dicarint uxorem, sive viro dicati fuerint, hæc sint incertæ dicationes, atque dubij causâ repudio opus est.



Quamvis &  
hanc ad tem-  
pus viro tan-  
gere non li-  
ceat,

XII. Si quis ex incestis aliquam sibi dicarit, infecta res esto: neque enim dicationi locus est in incestis. Non est ita de muliere menstruali: hanc enim si quis sibi dicarit, firma, fixa, rataque dicatione fuerit: verum ita facere non decet.

XIII. Uxor inspectante viro si manum porrexerit, atque receperit ab altero dicationem, hæc illi alteri dicata sit: habetur enim fides ei, quæ coram viro præsentem præsentem dicat, tu me missam fecisti: sic enim existimandum est non esse mulierem præsentem viro impudentem. Si quis autem uxorem alterius sibi dicarit absente viro, dicatione tamdiu sit irrita, dum illa probarit se fuisse repudiatam ante, quam dicationem istam recepisset. Etenim absente viro mulier verò facit impudenter.

\*Lex est enim,  
ut hæc emor-  
tui viri fratri  
nubatur.

XIV. Si quis sibi dicarit aut ex secundariis aliquam, aut ex his quæ sunt interdictæ vetando, jubendove: item levir si sibi dicarit æmulam fratriæ, istæ quidem dicationes ratæ sunt: verum \*fratria si viro sit alieno dicata, ejus est dubia dicatione: nimirum id Sapientibus non liquet, sitne tanquam in aliis vetando interdictis mulieribus, itidem in fratria dicationi locus; an velut incestæ dicatione prorsus excludatur omni. Cum igitur sit interdictum, ne ex istis ulla ducatur domum, tamen eas libello repudij missas facere necesse est.

XV. Si quis sibi mulierem dicarit ethnicam: item si quis servam, dicationes nullæ sunt;



ac post dicationem istæ mulieres eadem atque antea manento. Similiter homo ethnicus servus si dicarit sibi Judæi filiam, nulla sit dicatio. Si sibi Judæam mulierem dicarit Judæus apostata, quanquam sponte sua idola colit; nihilominus est ejus rata dicatio, adeoque \* mulieri repudium ab eo remittatur necesse est.

\* Cum hoc enim ætatem agere mulierem Judæam minimè convenit.

XVI. Si quis sibi dicarit mulierem eam, quæ sit dimidia serva, dimidia libera, non erit firma dicatio, usque dum mulier omnino sit manumissa: ubi verò fuerit, firma dicatio evaserit itidem, ut dicatio parvæ virginis statim, atque adolevit, neque eam opus est dicari rursus. Hanc eandem si post istam manumissionem sibi dicarit & alter, utraque dicatio dubia fuerit.

XVII. Atenim Lege commemoratur desponsata serva: scilicet ea, quam ex dimidia parte servam, & ex dimidia liberam sibi dicarit servus Hebræus: si quis autem ex dimidia parte servus, ex dimidia liber sibi dicarit liberam, ista dicatio libera fuerit.

XVIII. Homo ebrius si quam sibi dicarit, rata, fixa, firma sit dicatio, quanta quanta fuerit ebrietas. At verò si venisset eo ebrietatis, quò Lotus ille quondam, esset ejus irrita dicatio, atque hac re quiesceretur.

XIX. Si quis sibi mulierem pecuniâ minori nummo dicarit, nequaquam erit dicata: Si quis mulierem sibi dicarit cibo, vase, similibus re, cum sit minoris, quàm nummi; tamen est dicata de dubio, adeoque repudio



opus est, eam ob causam quia fortassis alio loco res ista numi sit. Ex quo facile cognoscitur si quis alia re, quàm argento sibi mulierem dicarit, ratam esse dicationem, si res ista in eadem regione nummo valeat: sin minus, dicationem esse dubiam. Ac mihi quidem ita videtur, si quis mulierem sibi dicarit cibo, olere, aut horum simili, quod durare diu nequit, id hoc eodem loco si non sit nummi, omnino dicationem esse nullam; quippe quia res ejusmodi non possit aliò deportari, quin corrumpatur & intereat, nec jam nummi sit. Quæ quidem est exquisita ratio, adeoque idonea, qua ducantur omnes.

XX. Si quis sibi mulierem pecunia minori nummo, vel nummo duas unâ mulieres sibi dicasset, quamvis lauta posthac eisdem munera misisset, nulla tamen esset dicatio. Eadem ratione si quis mulierem sibi dicasset parvus, cùm adultus ei munera misisset, nihilomagis dicata esset: munera enim ob antecedentem dicationem mitterentur, quæ nulla fuisset.

XXI. Qui mulierem sibi dicat argento, vel perscriptione, nihil opus ut ei det in manus: est enim, cui libeat, projiciendi potestas. Si quis igitur id, quo dicat, mulieri projiciat in manum, aut in gremium: si projiciat ejus in aream, aut in agrum, ritè dicata sit. Si quis cùm in loco fœmina staret eo, qui communis amborum esset, id, quo hanc sibi dicaret, volenti projiceret ita, ut mulieri nec in manum, nec in gremium veniret, ista esset dubia dicatio. Atque etiam tum, cùm viro fœ-



mina dixit, deponere mihi id, quo tibi me dicat, loco in isto, tum etiam erit dubia dicatio, siquidem locus is communis amborum fuerit.

XXII. Si mulieri vir, cum starent ambo vel in loco publico, vel in privato quidem; sed neutrius eorum proprio, projiceret id, quo illam sibi dicaret, nulla esset dicatio si res ea propius ad virum decidisset: contraque rata dicatio foret, si res illa accidisset propius ad fœminam. Quod si cecidisset in medium, aut incertum esset à viro, an à muliere propius abesset, tum etiam res ante perisset, quam mulieri veniret in manus, dubia dicatio existeret. Quid igitur sibi vult, si propius à viro, si propius à fœmina? Nempe quidquid vir custodire possit, non possit fœmina, id esse propius à viro censetur: contraque quidquid possit fœmina, non possit custodire vir, hoc esse propius à fœmina dicitur: in medium quod ambo ex æquo possint, vel non possint custodire.

---

### CAPUT QUINTUM.

I. **S**I quis uxorem sibi dicat ea re, cujus omnino omni fructu nobis interdictum est, ut pane fermentato ad pascha, lacteque condita carne, & cæteris, quorum itidem omni ratione fruendorum prohibemur, nequaquam erit dicata mulier. Et verò si res ea fuerit, cujus fructu interdicat tantum auto-



ritas Sapientum, velut eodem pane fermentato ad horam diei sextam decimæ & quartæ Martis, nihilo magis erit dicata mulier.

II. Etenim si quis ejusmodi rem, cujus omnino omni ratione fruendæ prohibetur, per nefas vendiderit, atque argento inde redacto mulierem sibi dicarit, ritè dicata sit. Excipe tamen rem idoli, cujus etiam argento si quis uxorem dicarit, nulla sit dicatio. Nam argento ex idoli re redacto item, ut ipsomet idolo frui vetamur. Vel ab idoli buculis stercore si quis uxorem dicarit, nequaquam dicata sit. *Deut. 13. 17.* Quidquid enim idolo sit, ejus interdictur usu: habemus enim in Lege, *Nec adhaerebit in manu tua quidquam de illo anathemate:* Si quis autem uxorem sibi dicarit stercore bovis ejus, qui lapidibus percutiendus est, ea verò dicata erit. Nam si bovis, qui lapide percutiatur, usus sit interdictus: at certè non est stercoreis ejus ideo, quia stercoreus ad bovem nihil est.

III. Si quis sibi dicarit uxorem fructibus anno sabbatico natis, aut cinere vaccæ rufæ, aut illis, quas mulieri menstrualis lustrandæ hauserit, aquis, ritè dicata sit. Jam si quis pecunia templo reficiendo sacra uxorem sibi dicaret imprudens, rata quidem esset dicatio: verùm hic sacrario sortem rependeret addita quinta parte; tum immolaret etiam hostiam pro delicto sic, ut Lege tenentur qui sacris abutuntur omnes. Si quis autem per contumaciam hac eadem pecunia sibi dicaret uxorem, dicatio nulla fuisset.



I V. Si quis sciens infciens decumis secundis sibi dicaret uxorem, nulla fuisset dicatio: neque enim licitum erat decumis secundis ad suam libidinem abuti ante, quam essent pretio redemptæ: etenim de decumis in Lege scriptum videmus, *Domini sunt.*

*Lev. 27.30.*

V. Sacerdos si sibi sua portione sacrificiorum seu sanctissimorum, seu minus sanctorum, uxorem dicaret, ea dicata non esset: his enim vesci modo Lege permissum est. Si verò sacerdos vel magno illo frugum sibi dato munere, vel de decimis soluto, vel fructuum primitiis uxorem sibi dicaret: si decumis primis homo Levita: si denique pauperum decumis sibi dicaret uxorem plebeius, sanè quidem dicata foret.

VI. Atque sacra illa frugum munera si oblata non essent, nihilominus pro oblatiis haberentur: ut si cui \* plebeio ab avo materno sacerdote fruges hæreditate venissent, unde necdum sacra illa munera essent exempta, & exemisset hic cùm munus hoc magnum, tum verò decumas, consimilia forent muneribus & decumis, quæ ab eodem avo materno hæreditate ipsi venissent. Is igitur hisce rebus sacris si sibi dicasset uxorem, ista quidem dicata esset. Res enim istæ si non sunt ipsi ad vescendum aptæ, at certè vendiderit eas \* cui conveniunt. Verùm plebeius si sibi dicaret uxorem munere sancto, quod ab propria exemisset area, dicatio nulla esset, quandoquidem isti munus id vendere non est integrum. Omnino datur ei gratificandi facultas, ut mu-

\* Hinc licet intelligere cuique licitum fuisse ut uxorem ex alia tribu atque sua duceret.

\* Est hic mendum in Hebræo editionis 1574. in parvo folio.



nus tribuat cui sacerdotum cunque visum fuerit : sed gratificandi facultas argentum non est.

VII. Rapto, furto, præda si quis dicarit uxorem, si legitimi rerum domini de spe recuperandi deciderunt, atque etiam desperatione dominorum bona jam raptorum esse propria compertum est, esto dicata mulier : contra si secus sit.

VIII. Si quis in ædes alienas ingressus vas aliquod, escam, atque aliud id genus sumpsit, eoque sibi dicavit uxorem, licet huic dominus postea domum reversus ita diceret, cur non id tu potiùs huic dedisti, quod sanè, quàm quod dedisti, multo melius, dicata tamen non est. Nimirum sic dominus eum est affatus, ut pudore ne suffunderet : atqui iste sibi dicavit uxorem bono alterius inscientis, quod verò raptum est, atque adeo non est dicata mulier : sin autem uxorem sibi dicavit ejusmodi re, quæ non sit domino curæ, ut dactylus, ut juglans, de dubio erit dicata mulier.

IX. Si quis esset, qui mercium societatem cum aliquo faceret, isque merces insciente socio partitus uxorem sibi parte sua dicaret, nequaquam esset dicata ; quippe quod mercium æstimandarum potestas omnis omnino judicum confessui sit tributa : neque enim hic sibi ipse carpet quidquid libuerit, & quod visum fuerit, relinquet.

X. Si quis ipsi mulieri quid aut palam eripisset per oppressionem, aut de bonis ejus clam



clam surripuisset, aut prædatus esset, tum eam hoc eodem ipso rapto, furto, præda sibi dicaturus ei diceret, tu ista re dicata esto: si prius inter se de nuptiis egerant, deinde suum mulier recepit & siluit, rata erit dicatio: sin autem cum ea nunquam egerat de nuptiis etiamsi siluit mulier cum ei reddita sunt sua nomine dicandi, dicata tamen non est: rursus erit ista rata dicatio, si modo respondit, *ita*.

XI. Et si quis apud mulierem aliquid depositurus primum ei, conde mihi depositum istud, post deinde, tu mihi eo dicata esto, dixisset: si postremum hoc ei dixit prius, quam accepisset depositum mulier, eaque depositum accepit & tacuit, dicata erit: sin postea quam mulier id accepisset ratione depositi, vir ei dixisset, eo mihi dicata esto, eaque tacuit, nihil inde sequitur. Etenim post datum argentum porro silentium nihil efficere potest. Eadem igitur dicata sit, si post acceptam pecuniam respondit, *ita*.

XII. Si quis suum mulieri debitum retributurus idem huic ante quam acceperit dicat, hoc tu mihi dicata esto, eaque silens id accepit, siquidem antea de nuptiis egerant, ritè dicata fuerit. Sin minus, non erit dicata, nisi ipsa responderit, *ita*. Quod si posteaquam debitum suum mulier recepit, tum demum hic ei dicat, hoc tu mihi dicata esto, cum responderit, *ita*; tamen non erit dicata, quando nihil ab illo, sed suum accepit duntaxat: etenim ex quo mulier argentum rece-

C



pit, solutum fuit debitum, nihil ut debiti rursus exigere posset.

XIII. Si quis mulierem sibi dicavit argento credito, non sit dicata, non, si argentum per singrapham sit creditum: ut si quis mulieri denarium crediderit, tum ei dixerit, esto mihi dicata illo denario, quem mihi debes, non sit dicata mulier: quippe quod argentum creditum est ad sumptus faciendos: nihil igitur superest, ex quo jam nunc quidquam commodi mulier percipere queat. Ea cum denarium expendit, jam tum præterit crediti commoditas omnis.

XIV. Si quis autem cum mulieri credidisset argentum accepto pignore, eam sibi hoc credito dicavit, atque reddidit pignus, ista quidem dicata est, quippe quæ jam nunc usum pignoris habet, adeoque commoditatem pignoris percipit.

XV. Si quis sibi uxorem dicat commoditate crediti, rata sit dicatio: ut si quis tum mulieri, cum ducentas commodet drachmas, ita dixerit, quam ego tibi do usuram temporis ad utendum hoc creditum, hac tu mihi dicata esto, scilicet retinebis hoc creditum tantum dierum numerum, neque id ego repetam à te ante diem illam, ista quidem dicata est. Nam ei jam nunc est ista commoditas, ut credito utatur ad præstitutam diem: sed id ne fiat, cautum est, quod ad usuræ similitudinem accedit. Etenim quibus ego dedi operam magistris, hi voluerunt illud *commoditate crediti* verbum esse quod omnino intelligi non potest.



XVI. Si quis mulieri dixerit, esto mihi dicata & isto nummo, & eo, quod tu mihi debes, ista quidem ritè dicatur: similiter si dicat, & eo, quod tibi credidi, argento, & nummo isto, ritè dicatur.

XVII. Si cui pecunia debeatur ab alio, isque mulieri dixerit, esto mihi dicata eo, quod iste mihi debet, argento, idque ei dixerit tum, cum simul unà tres consisterent, ritè dicatur.

XVIII. Si quis mulierem sibi dicat eo, quod aut apud ipsam deposuerat, aut utendum ipsi dederat, si modò depositus erat nummus, aut mutuo datus, aut certè si quod est nummi ex eorum altero mulieri superat, ritè dicatur.

XIX. Si mulieri quis ita dixerit, si tui causa cum rege colloquar, esto pro mercede dicata mihi, atque apud regem pro ipsa loquatur, tum rex mulierem relinquit, non requirit, nulla sit dicatio nisi si patronus ille nummum mulieri de suo dederit: quam enim mulier percepit ex ejus oratione commoditatem, ea crediti est instar: atqui credito si quis uxorem sibi dicat, dicata non est.

XX. *Item si quis mulieri*, esto mihi dicata hoc opere quod apud te facturus sum, & fecerit, non est ista dicata, nisi dederit de suo nummum: mercedem enim operarius usque à principio ad finem sensim acquirit; nimirum quamlibet operis particulam consequitur mercedis aliquid. Ergo tota merces argentum mulieri creditum esse reperitur, & cre-



dito si quis dicat, nulla est dicatio.

XXI. Viro si mulier dicat, da dono denarium huic, & dicabor ego tibi, isque cum dedit, tum mulieri dixit, esto dicata mihi propter tuum istuc commodum de dono, quod ego nunc tuo jussu do, hæc quidem ritè dicatur. Nam si nihil inde venit ipsi in manum; at certè satis cepit commodi ex eo, quod hujus ille voluntati obsequatur: tum etiam ejus beneficio commodum cepit hic: similiter viro si mulier dixerit, dono da denarium huic & dicabor ipsi, & cum ille dedit, tum mulierem sibi dicavit dicendo, esto mihi dicata propter tuum hoc commodum de dono, quod ego nunc tua voluntate accipio, hæc ritè dicatur.

XXII. Si quis mulieri dixerit, aufer istum dono denarium & dicabere huic, atque hic eam sibi dicavit ita dicendo, esto mihi dicata propter hoc commodum, quod tibi à me ortum est, hæc etiam ritè dicatur, ut ei nihil omnino datum à dicante sit. Si verò mulier, istum à me tu denarium accipe, & dicabor ego tibi, atque accipiendo hic mulieri dixit, esto dicata mihi propter hoc commodum de dono quod ego nunc à te accipio, siquidem vir iste clarus & honoratus est, mulier ritè dicatur: quippe quòd satis capit commodi si hic ei gratiam habeat, quo quidem se ipsa addixit illi.

XXIII. Si quis mulieri dixerit, esto mihi denario dicata, atque hoc relinquo tibi arrhaboni pro illo denario, donec eum tibi solvam,



non est dicata mulier: neque enim adhuc denarius ei venit in manum, nec pignus illud datum fuerat, ut sibi haberet. Si quis eo, quod à suo sibi debitore datum esset, pignore mulierem sibi dicat, etsi pignus proprium ejus non erat, mulier nihilominus dicatur; quippe quòd creditor ipsum pignus aliquatenus propriè possidet.

XXIV. Si quis mulieri dixerit, isto mihi denario dicata esto hac lege, ut eum mihi redditura sis, nullo pacto dicatur seu reddat, seu non: si non reddiderit, quia conditioni non stetit: si reddidit, quia nihil cepit commodi, nihil ei venit in manus.

XXV. Cùm aliquis fasciculum myrti, vel simile quid daturus mulieri dixerit, hoc tu mihi dicata esto, eoque accepto mulier respondeat, at hoc quidem nummi non est: tum huic ille, dicata mihi esto quatuor his drachmis, quæ in eo continentur, si respondeat mulier, *Sic est*, ritè dicatur: si fileat, non est hoc argento dicata: namque ita res est, post datum argentum omnino nihil efficit silentium: at de dubio tamen erit dicata: fasciculus enim loco fortassis alio nummi est.

XXVI. Si quis mulieri dixerit, esto mihi dicata dactylo isto, esto mihi isto, esto mihi illo, si nummi est horum aliquis, dicatur: Sin minus, non est dicata nisi de dubio, quod alibi vel unus forte dactylus nummo venit.

XXVII. Si mulieri dixerit, esto mihi dicata isto, hoc, & illo dactylo, si simul omnes nummi sunt, dicatur: sin minus, erit du-

C iij



bia duntaxat dicatio : Cùm verò primum quemque datum dactylum comedit illico mulier, tum extremus si sit nummi, dicatur : sin minus, erit duntaxat dubia dicatio. Nam quos primò comedit dactylos, hi crediti rationem imitantur : atqui credito si mulierem dicat aliquis, non dicatur : ergo solo in extremo dactylo relinquitur dicationi locus.

XXVIII. Quòd si mulieri dixerit, esto mihi dicata his dactylis, si simul unà nummi sunt, rata sit dicatio, ut primum quemque dactylum illico comedat ; suum enim jam comedit, ideoque dicatur.

XXIX. Cùm mulieri dixerit quis, esto mihi dicata hoc calice, si plenus sit aquæ, erit dicata mulier tum ipso calice, tum eo quod intus continetur : si vini plenus sit, erit dicata calice ipso, non eo quod continet : si sit olei plenus, dicatur eo, quod calix continet, non calice : Quocirca si nummi non est, quod continetur oleum, de dubio duntaxat dicatur : si verò nummi sit, pro certo dicatur, nec calicis habetur ratio.

## CAPUT SEXTUM.

I. **M**ulier cùm dicatur sub conditione, si fiat conditioni satis, rata dicatio ; sin minus, irrita sit. Nec interest, utrùm à viro, an à muliere sit instituta conditio. Nam in omni omnino conditione tam nuptiarum, ac divortiorum ; quàm emptionum atque



venditionum, cæterarumque rerum civilium, quatuor ista concurrant oportet.

II. Primùm igitur bis unaquæque conditio repetatur necesse est: deinde hujus ut affirmatio negationem antecedit: tum ut factum antecedit conditio: postremo ut ea sit conditio, quæ compleri queat. Ex his si desit unum, est irrita conditio sic, tanquam omnino instituta non sit: sed protinus rata dicatio, rata repudij renuntiatio, rata emptio, venditio, donatio ut si nulla sit instituta conditio, siquidem conditioni harum quatuor rationum desit aliqua.

III. Si quis igitur mulieri dixerit, si mihi drachmas dederis ducentas, denario isto dicata mihi fueris: si non dederis, non dicata fueris; & post institutam hanc conditionem idem mulieri dederit denarium, conditio firma sit, & mulier sub conditione dicata: ut si pependerit drachmas ducentas, rata dicatio: sin minus, nulla sit.

IV. Si quis autem cum mulieri dixisset, esto mihi dicata denario isto, atque hunc ei dedisset, tum demum hanc instituat conditionem, si mihi dederis drachmas ducentas, dicata sis, si non dederis, non dicata sis, irrita conditio fuerit ideo, quia conditioni factum antevertit, siquidem denarium mulieri dedit in manum prius, quàm pepigit, licet eodem tenore facta sint omnia. Quare continuo mulier dicata sit, nec quidquam dare necesse habeat.

V. Item si quis mulieri dixerit, si mihi

C iij



drachmas ducentas dederis, eris hoc mihi dicata denario, tum eidem dederit denarium in manum, conditio quidem ista nulla erit, quippe cui repetitio nulla desit: neque enim additum est, si non dederis, dicata non eris. Itaque mulier ista dicata statim erit, nec eadem illi quidquam pendat necesse est.

VI. Porro si quis mulieri ita dicat, si mihi non dederis ducentas drachmas, non eris dicata mihi, si dederis, eris dicata mihi isto denario, eumque deinde denarium mulieri dederit in manum, conditio nulla sit ea re, quia affirmationi negationem antevertit. Ergo mulier erit extemplo dicata, neque illi quidquam dare opus habet.

VII. Jam si quis mulieri dicat, si superscandas cœlum, si descendas ad abyssum, eris hoc mihi dicata denario; si non scandas ad cœlum, si non descendas ad abyssum, non eris mihi dicata, atque mulieri denarium det in manum, conditio nulla erit, atque adeo mulier extemplo dicatur. Id enim exploratum est ac cognitum, omnino fieri non posse ut ipsa conditionem istam compleat: nec ipse nisi *ὑπερβολικῶς* id dixit per jocum & ridiculum.

VIII. Si quis conditionem instituat, quæ quidem compleri queat: sed Lex id facere prohibet; ut si quis mulieri dicat, si adipem, si sanguinem comederis, hoc eris mihi denario dicata: si non comederis, non eris dicata mihi: item si comederis suinam, sit iste tibi repudij libellus: si non comederis, nullus sit;



denique secundum pactum mulieri seu denarium, seu repudij libellum det in manum, hæc quidem est firma conditio: ut si per nefas comederit mulier, dicata vel repudita sit: sin minus, neque dicata fuerit, neque repudiata: nec verò dicendum est, at iste contra Legem pepigit. Nam hoc in mulieris erit potestate, nihil horum comedere, atque adeo nec dicari, nec missam fieri.

IX. Atenim Sapientes sciverunt, ut si quis contra quàm quod Lege sancitum est paciscatur, pactum fuerit irritum, præter id, quod rem pecuniariam spectet: scilicet, si quis vel uxorem ducere, vel repudiare, si quis donare, vendere quid velit sub ea conditione, qua vel adipiscatur id, quo Lex eum non modò non donavit, sed etiam prohibet, vel rursus ea re se eximat, cui Lex addixit, huic verò id dicitur, est irrita conditio tua, adeoque quod fecisti factum atque ratum est, neque tu te eximas ea re, cui Lex addixit: neque porrò per te ipse consequaris id, quo te eadem prohibeat.

X. Ut si quis sibi dicarit uxorem ea lege, ut huic à se nec victus debeat, neque vestitus, neque mariti statum munus, isti quidem edicitur, ad victum & vestitum, quæ est pecuniaria ratio, conditio tua valet; non valet autem ad statum viri munus in uxorem; quippe cui te Lex addixit: hæc igitur tibi dicata est ita, ut statum officium ei præstare debeas: neque enim tibi in manu est, ut hoc munere tete tua conditione eximas. Atque eadem est



ratio hujus similium. Item si quis captivam eximia forma mulierem sibi dicarit ea conditione, ut eadem posthac ad quæstum abutatur, huic ista dicata est, & nihilominus hac erit ei nefas ad quæstum abuti. Etenim si quis cum ejusmodi muliere corpus miscuerit, eum posthac hanc eandem mulierem pro serva habere Lex prohibet: non igitur sua conditione consequetur id, quo Lex eum prohibet; sed conditio nulla erit. Similis est aliorum hujus generis ratio.

XI. Si quis mulieri seu dicando, seu repudiando conditionem instituat, ut ea cubet cum patre, fratre, filio, vel alio hujus generis, itidem ut si pepigisset uti scanderet in cœlum, aut rursus ad abyssum descenderet, conditio nulla erit: neque enim mulieri in manu est, ut incesti flagitium in se admittant alij, adeo; ut instituerit mulieri conditionem quam ipsa complere nequeat. Eadem est aliorum id genus ratio.

XII. Quod si cum muliere pepigit, ut hic ille sibi daret aream, aut cum filio suo gnatam connubio jungeret, conditio firma sit ideo, quia mulier istam complere potest: nempe potest huic, illi pecuniæ dare tantum, ut aream isti tradat, uti gnatam ejus filio collocet: namque in his nihil admittitur sceleris. Sic est de reliquis horum similibus.

XIII. Atque hasce tibi condiciones propone jugiter ante oculos, ut cum audieris, si quis sub hac illa conditione dicat, repudiat, item si quis sub conditione vendat, donet,



noveris quod in conditione requirantur hæc quatuor, de quibus modò disputavimus, ut ne singulis ea locis exponere necesse habeamus : tum etiam si quid horum conditioni desit, quod ea omnino nulla sit.

XIV. fuerunt recentioribus ex Sapientibus, qui docerent omnino in dicationibus, atque repudiis pacti repetitionem esse necessariam, in re pecuniaria non item : verum hæc in parte istos audire par non est. Nam & repetitionem & his è quatuor pacti rationibus reliquas Sapientes didicerunt ex hac quæ facta fuit cum stirpe Gad, & cum stirpe Ruben pactione. *Si transferint filij Gad & filij Ruben vobiscum Jordanem omnes armati, &c. Dabitur eis Galaad in possessionem : sin autem non transferint, &c.* Atqui illic nec de repudio pactio, nec de dicatione fiebat. Enimvero ista pactionum formula tradita fuit ab priscis illis doctoribus, & sic facere par est.

*Num. 32. 19.*

*Ibid. 30.*

XV. Quisquis uxorem sibi dicarit sub conditione, si conditio compleatur, rata fuerit dicatio, non ex quo dicata sit uxor ; sed ex quo conditio completa fuerit : ut si quis mulieri dixit, hoc anno si dederò tibi drachmas ducentas, fueris isto mihi dicata denario : si non dederò, non eris dicata mihi : tum ei denarium dedit in manum ad mensem Martium, & ex pacto ducentas drachmas consequenti mense Augusto, mulier ei demum ab mense Augusto dicata fuerit : eandem igitur si sibi dicaret alter prius, quàm princeps ille conditionem istam com-



pleret, huic alteri ritè dicata foret. Similiter  
judicandum erit de repudiis, & de rebus  
pecuniariis: conditio nuncupata cum com-  
plebitur, tum demum ratum erit repudium,  
rata emptio, donatio.

XVI. Nempe sic se res habet si sit instituta  
conditio, nec additum est, *ab hoc tempore*.  
Nam si quis mulieri dixerit, tu mihi isto de-  
nario dicata fueris *ab hoc usque tempore*, si  
post diem illam drachmas ducentas tibi de-  
dero, easque præstituta die dedit, ista qui-  
dem dicatio rata est ab ea retro hora qua facta  
fuit, ut multo post tempore conditio com-  
pleta sit. Qua de causa si alius eandem sibi  
dicaret priùs, quàm esset conditio completa,  
irrita esset ea dicatio. Par est ratio repudij,  
& rei pecuniariæ.

XVII. Et cùm additur *ab hoc tempore*,  
tum nec repetitam conditionem, nec ante  
factum institutam opus est: verùm cùm fa-  
ctum conditioni anteverteris, nihilominus  
firma sit. Atque eam oportet institui condi-  
tionem, quæ compleri queat: qui secus faxit,  
is *ἡσυχάζων* dixisse ducitur, ac conditio nulla  
sit. Jam conditioni instituendæ cùm adhibe-  
tur ista formula, *ea lege*, tum itidem, ut *ab  
hoc tempore* si sit adjunctum, nec repetitam  
nec ante factum institutam oportet condi-  
tionem.

XVIII. Ut si quis mulieri dicat, en tu  
mihi dicata ea lege si mihi pendas drachmas  
ducentas: en tibi repudij libellus ea lege si  
mihi pendas drachmas ducentas: en tibi area



dono data ea lege si mihi pendas drachmas ducentas, firma sit conditio; ut mulier vel dicata, vel repudiata fuerit, vel aream adepta sit si modo drachmas pependerit: sin minus nihil horum ratum fuerit. Cum verò nec conditio geminata sit, cumque factum ei præcesserit, primò videlicet dicationis pretium, repudij libellus sit mulieri datus in manum, areamve ceperit, tum deinde sit instituta conditio: nihilominus tamen mulier, siquidem ea conditioni stet, aream adepta sit, & dicata, repudiatave fuerit ab ea retro hora, qua facta res fuerat, ut si conditio prorsus esset instituta nulla.

## CAPUT SEPTIMUM.

I. **Q**ui mulieri dixerit, en tu mihi dicata hac lege, si consilium pater meus approbarit, huic si pater approbarit, dicata fuerit: contra si vel improbarit, vel fileat, vel mortuus sit ante, quàm acceperit. Qui dixit ea lege, si pater non deterreat, illi, si pater ut rem audivit eum absterruit, non erit dicata mulier: si non absterruit, aut rem nec audivit quidem, rata dicationis sit. Quòd si filius sit mortuus priùs quàm rem acceperit pater, monetur hic, ut se rem voluisse neget eò, ut sit irrita dicationis, nec in leviri potestatem veniat mulier.

II. Qui mulieri dicit, en tu hac re dicata mihi ea lege, si mihi sint drachmæ ducentæ,



si cori capax ager, cum præsto sunt, qui testificentur hæc illi suppetere, rata sit dicatio: qui si nulli sint testes, dubia fuerit dicatio. Nam quæ nuncuparat, ea fortassis habet, atque habere se negat ideo, ut mulierem avertat à proposito.

III. Si dixit ea lege, si mihi drachmæ ducentæ, si cori capax ager sit hoc, illo loco, hæc ei si fuerint ibi loci, rata dicatio: sin ubi constituerat, nihil ei fuerit, dubia certè dicatio sit: fieri enim potest, ut illi sint eo loco quæ constituerat, atque consilium intendant avertendi mulierem à proposito.

IV. Sin ita dixit, hac re mihi dicata fueris ea lege, ut tibi drachmas ostendam ducentas, vel modum agri, ostendat & dicata sit. Nam si vel alienæ pecuniæ drachmas illas, vel alieni fundi monstret modum agri, haud dicata fuerit, donec de suo exhibeat. Quin etiam argentum istud si mutuo sumptum, vel in societatem appensum est: si conduxit agrum, aut si colendum pro parte fructuum suscepit, neutiquam dicata erit: hæc est enim isti verbo, *ut tibi ostendam*, subiecta vis, ut quod ego nunc tibi polliceor, ostendam de meo.

V. Atque huic ipsi cum existat modus agri, in quo fossæ sit bene multæ, & hæ decem palmarum in altitudinem depressæ, aut saxa rursus ad decem palmarum altitudinem edita, si fossæ fuerint aqua plenæ item, ut saxa ab agri mensura excluduntur, quippe cum obseri nequeant: sin autem fossæ sint aqua vacuæ,



utique veniunt in agri mensuram, quando ad concipiendum semen sunt idoneæ.

VI. Cùm mulieri dixerit aliquis, en hoc tu mihi dicata fueris ea conditione, ut non sis obligata votis, atque ea horum trium suscepit aliquod, abstinere carne, temeto, nullo se exornare genere pigmenti, tum erit nulla dicatio. Sin aliud ab his votum debeat, tamen si vir profitetur & hoc se moveri voto, nihilominus rata sit dicatio. Quòd si quis mulieri dixerit, ea conditione, ut nullo sis obstricta voto, si vel filiqua ista se se abstenturam vovisse reperiatur, nulla sit dicatio.

VII. Cùm quis mulieri, en hoc tu mihi dicata fueris ea lege, ut nulla sint in te vitia, atque invenitur in ea vitiorum aliquod illorum, quibus temerantur mulieres, nulla sit dicatio: sin autem aliud ab istis in ea vitium inest, cùm vir edicat etiam & isto se vitio moveri, nihilominus tamen dicatio rata sit. At quæ tandem vitia sunt quæ fœminas temerant? Ea videlicet omnia, quæ & \* sacerdotes: ac de sacerdotum vitiis explicatur eo tractatu, qui est de introitu in templum. Præterea autem & ista mulieres temerant, corporis odor malus, immundus sudor, os fœtidum, densa vox, ubera crassiora præ cunctarum uberibus, intervallum unius & item alterius palmæ inter utramque mammam, morsus canis is, cujus sit cicatrix semper hians, verruca in fronte quamvis exigua, atque etiam propter capillos sita, & ipsa pilo destituta: hac enim verruca sacerdotem fœ-

\* Hæc sunt numero centum & quadraginta, quæ suo loco nominatim explicabuntur.



mina superat : sed in reliquo vultu verruca pilosa, vel sine pilis verruca quæ magnitudine monetam illam Issar quam appellant, imitatur, æque in sacerdote atque in muliere vitium est.

VIII. Si quis uxorem sibi dicasset nulla instituta conditione, tum in ea reperiret aut aliquod è vitiis, quæ mulierem temerant, aut de votis hisce tribus unum de dubio dicata sit. Jam si quis sibi dicavit uxorem ea conditione, ut votis teneretur nullis, atque illa votis obligata cucurrit ad Sapientem, qui his eam liberavit, rata dicatio sit.

IX. Rursus si quis uxorem sibi dicavit ea conditione si nullo vitio laboraret, atque aliquo affecta medicum adiit, qui sanavit, dicatio nulla sit. Sin pepigit, ut ipse nullo nec teneretur voto, nec vitio laboraret, atque obstructum voto liberavit consultus Sapiens, vitiumve curavit medicus, rata fuerit dicatio. Nam vitium rectè curatum nihil est indecori viro, nec porro mulierem mover.

X. Mulieri cùm dixit aliquis, en hoc mihi dicata fueris ea lege, si drachmas ducentas ad triginta dies ego tibi dederò, si argentum dedit intra triginta dies, rata dicatio : sin præterierint dicti dies, necdum est datum argentum, nulla fuerit dicatio. Si quis mulieri dixerit, en tu mihi dicata fueris his drachmis post tricenos dies, tametsi argentum intra hos triginta dies consumptum est, tamen postea rata fuerit dicatio : sin autem aut ipse, aut mulier intra dies tricenos consilium mutat, nulla sit dicatio.

XI. At



XI. At enim hanc eandem intra hos triginta dies si sibi dicaret alter, huic utique perpetuum esset dicata. Hic enim quo tempore sibi eam dicat, ea necdum est illi dicata, adeoque dicatio hujus eam occupat, atque ut propria viri sit, efficit: itaque post triginta dies primi illius dicatio mulierem jam nuptam offendit: sic primus invenitur mulierem viro junctam sibi dicare, cui quidem dicationi locus non est.

XII. Si quis mulieri dixit, hoc tu mihi denario dicata fueris post tricesimam ab hodierno die lucem: tum eandem alius sibi dicat intra hos triginta dies, de dubio dicata ambo erit. Itaque ambo illi repudium renuntiabunt seu intra seu post triginta dies. Item si quis mulieri, tu mihi dicata fueris post tricesimam ab hodierno die lucem: tum alter eidem, tu mihi dicata fueris post vicesimam ab hodierno die lucem: deinde tertius dixit, tu mihi dicata fueris post decimam ab hodierno die lucem, sicque centum deinceps hominum dicationi locus relinquitur. Itaque ab omnibus repudij libellus ei necessarius, quippe quæ omnibus de dubio dicata sit.

XIII. Si quis mulieri dixit, en tu dicata mihi: at excipio illum, id est, huic ego te nubere non prohibeo: ad reliquos homines quod attinet, volo te marito junctam haberi: & pro non nupta quod ad illum, ista dubia sit dicatio. Sin autem ita dixit, en tu dicata mihi ea lege, ut etiam illi permissa sis, hæc sit rata dicatio, & tam illi mulier erit inter-

D



dicta, quàm reliquo hominum generi. Etenim conditionem instituit ejusmodi, cui stare fas non est.

XIV. Si quis mulieri nummos dederit duo, atque eidem dicat, tu hodie mihi dicata sis nummorum altero, & altero rursus posteaquam tibi nuntium remisero, hæc ei & extemplo dicata erit, & denuo si forte nuntium ei remiserit usque adeo donec post dicationem altero nummo factam nuntium ei denuo remittat. Si quis autem mulieri dicat, hoc tu mihi dicata fueris cum profelytus evaserò, cum profelyta tute evaseris; vel ego cum manumissus ero, tu cum manumissa fueris: vel post viri tui, post tuæ sororis obitum, nequaquam erit dicata, quippe cum eam jam nunc sibi dicare nequeat.

XV. Si quis dixerit fratriæ cuiquam, hoc tu mihi dicata fueris, posteaquam leviro tuo calceum detraxeris, ista quidem rata sit dicatione: nam & tunc ipsum si mulierem sibi dicet, de dubio dicationi locus sit.

XVI. Vir viro cum dixerit, si puëllam conjux tua pariat, hoc ea puëlla mihi dicata fuerit, quod dictum, indictum est: at uxor illius si prægnans sit, atque adeo fœtus jam sentitur, rata sit dicatione. Ego verò sic existimo, cum in lucem edita puëlla fuerit, oportere, ut iste rursus eam sibi dicet per patrem, ut tandem aliquando uxorem ducat domum ea dicatione, quæ probro nihil loci relinquat.

XVII. Si quis mulieri dixit, en tu dicata mihi centum denariis, tum ei vel unum præ-



beat, rata sit dicatio statim atque ea hunc unum acceperit: verumtamen reliquos mulieri persolvat necesse est. Hic enim imitatur eum qui mulieri dicat, en hoc mihi tu denario dicata ea conditione, ut tibi pendam denarios centum, quæ quidem est extemplo dicata. Sic enim res se habet, si præcisè dixit, centum denariis: sin autem plenè, centum denariis istis, tum eos annumerare mulieri occæpit, non erit rata dicatio usque adeo, donec persolutum fuerit: atque ad ultimum etiam denarium utrique discedendi potestas datur. Jam his centum denariis si desit unus, si vel unus inveniatur æneus, nulla sit dicatio: si denarius insit malus, qui modò difficulter expendi possit, eum commutabit cum alio: sin minus, nulla sit dicatio.

XVIII. Cùm mulieri quis dixerit, en tu dicata mihi hisce vestibus, quæ sunt denariorum quinquaginta, eæque sint vel è serico, vel è materia simili, quam mulier expetat, si modò quinquaginta sunt denariorum, statim erit dicata mulier, atque vestes acceperit: nec verò necesse est, ut priusquam rata sit dicatio æstimentur in foro vestes ad explendum animum mulieri: verùm si est, ut sint ejus, quod dixit pretij, dicata fuerit usque ab hora prima: sin minus, dicatio nulla fuerit.

XIX. Vir & mulier inter se de nuptiis agant sic, ut ille dicat denariis centum ego te mihi dicabo, hæc contra, ego tibi nisi ducentis non dicabor, sicque suam quisque domum inde discedant, tum iidem se se repositi



cant, fiat dicatio, de pretio mentio nulla: si est, ut reposcat mulierem vir, utique faciendum est, mulier quod voluerat: sin est, ut mulier requirat virum, is in legem suam rem conficiet.

XX. Si quis procuratori mandarit, ut sibi dicaret uxorem, atque dicavit sub conditione, dicatio nulla sit. Item si mandarit, ut uxorem sub conditione dicaret, atque conditionem dicando vel nullam instituit, vel aliam, vel certè mutavit, nulla sit dicatio.

XXI. Si quis procuratori mandarit, ut uxorem sibi certo quodam loco dicaret, atque dicavit alio, dicatio nulla sit: cùm verò procuratori ita dixisset, uxorem dica mihi, quæ est eo loco, tum si procurator eam alio dicaret, rata, firmaque sit dicatio: nihil enim ille voluit aliud, quàm indicare procuratori mulier ubi loci esset. Similiter igitur mulier cùm procuratori suo mandat, ut certo quodam loco sibi dicationem recipiat, si recipiat alio, nulla sit dicatio: sin ita dixit, vir est eo loco, tum procurator si recepit dicationem alibi, nihilominus firma sit, quippe mulier locum duntaxat indicare voluit.

XXII. Si quis uxorem sibi dicavit, ac protinus ipse mulierve dicta retractavit, retractatio nulla sit, adeoque mulier ritè dicetur.

XXIII. Si quis uxorem dicavit sub conditione, eidemque multis post diebus conditionem abdicat, vel inter semetipsum & mulierem nullis omnino testibus adhibitis, nulla sit conditio, atque mulier purè dicata fuerit,



Similiter si conditionem abs se institutam postea mulier abroget inter se & virum, nulla sit conditio. Ergo si quis dicaret sub conditione uxorem, tum eam vel duceret domum, vel subigeret nulla conditionis habita ratione, tamen istam libello repudij missam fieri necesse est, quanquam instituta conditio completa non fuit. Fieri enim potest, ut vir ducenda, subigienda muliere conditionem abrogaret. Item si quis argento minori, quam nummo, creditove sibi dicasset uxorem: tum nec redintegrans dicationem praesentibus testibus cum ea corpus miscuisset, ei repudij libello opus est. Is enim rationem habuit non dicationis illius, quæ omnino nulla fuit; sed huiusce coitus: quippe quod constat idoneorum Israëlitarum esse neminem, qui coitum suum meretricium esse velit, cum eidem in manu sit, ut legitimum reddat.

## CAPUT OCTAVUM.

I. **S**I quis mulieri dixerit, en tu mihi dicata isto vini cyato, atque is sit mellis, aut contra hoc cyato mellis, qui sit vini: hoc denario argenti, qui sit auri: contrave hoc auri denario qui sit argenti: item si dixerit ea lege, si sacerdos sim, & reperiatur levita, si levita sim, & reperiatur sacerdos: si nethinæus sim, & reperiatur spurius; si spurius sim, & inveniatur nethinæus: si ex oppido sim, atque inveniatur esse ex arce; si sim ex arce, & in-

D iij



veniatur esse ex oppido : si tenuis sim , & sit dives ; rursusque si dives sim , & sit tenuis : si mea domus propius absit à balneo , & ea procul absit ; si procul sit dissita , eaque ad balneum propius sita sit : si mihi sit serva , si filia \* grandis , si coquus , nec ei quidquam horum suppetat ; contrave : si mihi sit uxor & liberi , & non sint ; contrave : in his omnibus , atque horum similibus , nulla sit dicatio.

\* Et ista vox  
Hebraica mē  
dosa est in e-  
ditione 1574.  
in folio parvo.

II. Atque idem est statuendum si virum de-  
ceperit mulier : Jam in his omnibus seu mu-  
lier ait , ego in animo habui huic dicari viro ,  
ut me deceperit , atque rem aliter , ac est ,  
dixerit ; seu vir edicit , equidem hanc mihi ,  
etsi imposuit , dicare in animum induxeram ,  
nulla sit dicatio. Nimirum hoc quod est in  
animo dictum , indictum est.

III. Si quis dixerit ea lege si sim unguenta-  
rius , atque inveniatur unguentarius simul &  
coriarius : si sim ex oppido ac sit ex oppido  
juxta atque ex arce : si mihi nomen sit Jose-  
phus , sitque Josephus simul & Simeon , rata  
sit dicatio : sin ita dixit ea lege , ut nullum mihi  
sit aliud , quàm Josephi nomen , sitque Josephi  
& Simeonis : ut unam faciam unguentariam ,  
& sit unguentarius ac coriarius : ut sim ex uno  
oppido , atque sit pariter ex oppido & ex arce ,  
neutiquam dicata erit.

IV. Si quis mulieri dixerit , en tu mihi dica-  
ta ea conditione , si sciam legere , Legem hic  
oportet legat atque interpretetur sic , tan-  
quam eandem interpretatus est Aquila profe-  
lytus : sin ita dixerit ea conditione , si versatus



sum in textu sacro, oportet Legem, vaticinia, hagiographa commodè legere norit. Quòd si dixit ea lege, si doctor ego sim, oportet Misnam, Siphra, Siphri, & additiones illas R. Chiiæ probè teneat.

V. Jam si quis dixit ea lege, si Sapiens sim discipulus, non exigendum, ut consimilis sit vel illi Asai filio, vel filio Zomæ: sat est si quærenti respondeat vel rem unam de disciplina; immo etiam unum ex dogmatis illis longè facillimis quæ de tabernaculorum diebus festis publicè traduntur proximè ad diem solemnem, ut in his & populus versatus sit. Sin ita, ea lege, si Sapiens sim, non exigendum, ut simimilis sit R. Akibæ, aut ejus æqualium: sat erit, roganti si de quavis prudentia respondeat. Sin ita, ea lege, si fortis sim, non est exigenda fortitudo Abneris Neris filij, aut Joabi; sed ut cæteris sua fortitudine terrorem incutiat: sin ita, ea lege, si sim opulentus, non opes R. Elieser Afariæ filij postules; sed ut cives ejus præ divitiis eum colant & observent. Jam ea lege, si justus sim, tum quamvis scelerosus atque impius sit, rata fuerit dicatio de dubio, quia forte pœnitentia commotus est animus aliquatenus. Rursus ea lege, si scelestus sim, quanquam exstat religiosissimus, rata tamen erit dicatio de dubio, quòd fortassis inclinaverit animus ad idololatriam: atqui idololatria tantum est flagitium & tam atrox, ut vel semel inclinatione voluntatis ad eam propendisse hominem reddat multò nequissimum. Habemus enim in Lege, *Ne seducatur cor* Deut. 12. 16.

D iiij



*vestrum : atque alio loco , ut capiat<sup>ur</sup> domus  
Israël in corde suo , quo recesserunt à me in cun-  
ctis idolis suis.*

VI. Si quis mulierem sibi cùm dicasset ,  
tum postea diceret , putaram hanc esse sacer-  
dotem , atque invenio levitam : rursusque  
levitam , & invenio sacerdotem : pauperem ,  
& reperio opulentam : contrave divitem ,  
atque invenio tenuem ; nihilo secius dicatio ,  
quoniam eum non circonvenit mulier , rata  
sit : similiter mulier si dixerit , hunc ego sa-  
cerdotem esse duxeram , atque levita est : le-  
vitam , atque est sacerdos : divitem , atque est  
egenus : egenum , atque est opulentus , nihi-  
lominus tamen rata sit dicatio , quando ipsa à  
viro decepta non est.

### CAPUT NONUM.

I. **S**I quis mulieres sibi dicasset duas , quas  
ob incestum , simul unà ducere vetitum  
est , nulla sit dicatio. Itaque matrem & filiam ,  
aut sorores duas unà si quis dicarit , harum  
neutra dicata fuerit.

II. Si quis mulieres bene multas simul unà  
sibi dicaret , isque dicando his ita diceret ,  
estote vos omnes mihi dicatæ , atque in his  
essent aut duæ sorores germanæ , aut mater  
& filia , aut harum similes , omnino nulla di-  
cata fuerit. Sin ita diceret , quæ vestri mihi  
est ad concubitum apta , esto dicata mihi , tum  
ei dicarentur omnes , præter sorores illas ger-



manas, atque matrem & filiam, & huius generis alias. Sic si his eisdem dicat, estote mihi dicatæ omnes, atque in his sit fœmina serva, vel ethnica, vel seorsim incesta, ut connubio iuncta mulier, vel sua ipsius filia, soror, aut harum similis, nulla sit dicatio. Rursus si his eisdem dicat, quæ vestrûm est mihi ad concubitum apta, esto dicata mihi, omnes ei dicatæ sint præter eam, quæ non relinquit dicationi locum.

III. Si quis duabus germanis sororibus dicat, una vestrûm hac re mihi dicata sit, tum eis ipse dederit nummum, aut eum acceperit altera per alteram: item si quis parenti dixerit, tuis è filiabus una mihi dicata sit, atque dicationem pater receperit, cunctis ab illo repudij libello opus est: nec licet, ut cum ulla cubet, quippe cùm in cunctis est dicationi locus, quamvis sit interdictum, ne cum harum ulla rem habeat.

IV. Si quis procuratori suo mandarit, ut sibi quandam uxorem dicaret, & fecit, tum qui procuratorem instituerat matrem huiusce mulieris, sororem, aut filiam sibi dicavit & ipse, nec exploratum est, utra fuerit dicata prior, utrique repudij libellum datum oportet, & huic adeo interdictæ sunt ambæ. Similiter si mulier procuratori commisit, ut certo cuidam viro dicationem suam reciperet, isque fecit, atque suam ipsa dicationem recepit etiam alteri, nec compertum est, uter altero prior sit, aut ambo mulieri repudium renuntient, aut si malint, mulierem missam



faciat alter, alter ducat.

V. Quæ quidem ita sunt si viri duo sint alieni. Nam si procurator patri dicationem receperit, & ipsa filio mulier, vel fratri, vel hujus generis alij, ambo missam faciant mulierem, quæ erit utrique interdicta.

VI. Si quis procuratori suo dixisset, i dicatum mihi mulierem, ac procurator mortem obiret, nec cognitum esset, utrum homini quam dicasset, nec ne; pro certo habetur ei dicasse aliquam: sic enim persuasum est, procurator mandatum exequitur: quoniam verò non liquet quam ei mulierem procurator dicarit, nulla non erit interdicta, cui existant propinquæ mulieres, quæ cum ipsa fiant incestæ, ut cui sit filia, mater, soror, aut similes: nam quæ permittas hunc eam ducere, cum sit dubitandi locus an eidem matrem, sororem, filiam procurator ante dicarit? Eidem verò erit licita mulier, cui non sint ejusmodi propinquæ. Jam quæ mulier habet hujusmodi propinquas, matrem, sororem, filiam, atque harum similes; sed enim procurator cum fuit constitutus, tum erant istæ nuptæ propinquæ, mulier ista quidem licita erit, ut ejus propinquæ fuerint repudiatae prius, quam procurator ille moreretur. Nec metuendum erit, ne procurator ejus propinquam dicarit, posteaquam esset repudiata, eam ob causam, quia cum procuratorem hic facit, tum propinqua non est ea, quæ possit ipsi dicari: atqui nemo quisquam est, qui ab procuratore suo sibi dicatam velit, nisi quam, procurator



rem cum facit, sibi ipse dicare potest.

VII. Eiusdem hominis filij quinque si simul una patri procurationem uxoris sibi dicandæ commiserint omnes, isque nactus hominem cui sint itidem filia quinque huic ita dicat, tuarum una filiarum meis è filiis uni sit dicata, atque dicationem recipiat alter, sanè virginum unicuique quinos à quinis fratribus nuntios remitti necesse est, quando uxoris sibi dicandæ potestatem dederant omnes. Quòd si quis horum mortuus sit, tum unaquæque virginum à quatuor superstitibus missa fiat opus est, tum etiam eorum alicui calceos exuat.

VIII. Qui filias habet duas, quarum altera parva sit, vel puëlla, quæ necdum ejus è potestate excesserit, altera pubes, quæ dicandi sui potestatem ipsi fecerit, is si dicando *filiam suam* generatim dixerit, nihil ad puberem pertineat. Nam ita res est, puberem filiam quæ dicandi sui procurationem ei commisit, nominatim appellet, opus est. Non erit igitur dicata filia pubes: soror ejus erit.

IX. Qui suscepit duas è duabus uxoribus filiarum turmas, idemque in sua potestate habet omnes, is si cui dicat earum aliquam, ac continuo post ita dicit, dicavi tibi filiam magnam, hîc quanquam dubitandi locus est, utrùm majorum, atque minorum maximam huic dicarit, an verò maximarum minimam, quæ minimarum etiam maxima multò major est, nihilo secius omnes solutæ erunt, præter illam maximam omnium, quæ sola dicata



fuerit. Similiter si minorem dicarit, etsi dubitandi locus est, utrùm minimarum atque maximarum minimam; an dicarit maximam minimarum, quæ maximarum minima etiam minor est, tamen erunt omnes solutæ præter omnium minimam. Nam his vocibus *filia magna* hæc est subjecta vis, quâ filiarum nulla maior est: itemque & horum verborum, *filia minor*, hæc est sententia, quâ nulla minor est.

X. Patri, si filiam suam ante, quàm pubesceret dicatam esse dixerit, fides habetur; ut ea cunctis sit interdicta.

XI. Pater cùm ita dicat, filiam ego dicavi meam, sed nescio cui, hæc erit cunctis interdicta, donec idem ille referat, compertum mihi est eam me dicasse huic, qui solus eam missam faciat, necesse est, ut hoc patri compertum fuerit tum, cum filia pubes jam exitit.

XII. Patri nescio filiam meam cui dicaverim dicenti si quis respondeat, *mihi*, huic adeo creditur, ut & domum ei ducere liceat, nec secunda dicatione opus sit.

XIII. Sin duo sunt, quorum uterque sibi dicatam esse mulierem ait, aut ambo repudium ei remittent, aut si velint repudium remittet alter, alter domum ducet. Quam si duxerit horum aliquis, tum venerit, qui aiat, ista verò mihi dicata fuerat, fides ei non habetur; neque porro viro suo interdicta erit.

XIV. Jam si est, qui mulieri itidem di-



centi, dicata sum sed nescio cui, edicat, ego te dicavi mihi, huic quidem fides habetur eatenus, ut renuntiet mulieri repudium, quæ porro cunctis erit licita, huic uni interdicta: non item ut ducat domum. Nam fortassis nimia libidine victum mulier ad hoc dicendum allexit atque attraxit, quæ sibi ipsam redderet licitam.

XV. Vir mulieri, ego te dicavi mihi; illa contra, non dicasti me, si dixerit, hujus mulieris interdictæ viro propinquæ, & liciti mulieri istius propinqui viri. Rursus si mulier, tu dicasti me; ille contra, non dicavi te, huic omnino erit mulieris licita cognatio: sed mulieri erit interdictum cognatione viri. Jam si vir, ego te dicavi; mulier autem, dicasti non me, sed filiam meam, viro interdictum erit cognatione hujusce parentis, contraque huic cognatio viri licita: sed tum filiæ cognatio viro, tum filiæ viri cognatio permixta sit. Rursus si vir ait, tuam ego dicavi filiam, mulier autem non dicasti; sed me, meipsam: viro cognatione filiæ erit interdictum, & permixta erit viri cognatio filiæ: contraque viro cognatio matris erit permixta, & interdictum matri cognatione viri.

XVI. Ita res est dicationem intendentium, siquidem aiunt factam esse dicationem præsentibus testibus, qui testes aut in longinquam regionem, aut etiam è vita demigrarunt: sin autem fatentur ipsi dicationibus testes adhibitos esse nullos, nullæ, sicut ante posui, dicationes erunt. Quanquam ubi viro mulier,



tu me dicasti, ille contra, ego te non dicavi, rogatur, ut repudium mulieri remittat, quo permessa fiat cuncto populo: neque enim hinc illi quidquam dispendij existit. Qui idem si sponte sua missam faciat mulierem, eidem cogitur etiam donationem propter nuptias exolvere.

XVII. Si quis procuratori mandarit, ut sibi dicaret uxorem, tum postea procurator eam sibi ipse dicavit, ea quidem ritè procuratori dicata fuerit: atqui hoc est factu nefas. Et qui hoc admittit, aut hujus generis aliud in rebus contrahendis, is fraudulentus appellatur.

XVIII. Jam si quis procuratorem, qui sibi dicaret uxorem, constituit, isque prorsus abiit dicatum, tum procurator hic idem ait, eam mihimet ego dicavi; mulier contra, huic, qui hominem cum mandato misit, huic ego dicata sum, ita res erit: si testes adhiberentur nulli cùm fieret ille procurator, illi sit mulieris interdicta cognatio, & cognatio ejus permessa mulieri: rursusque mulieri interdicta cognatio ejus, qui procuratorem misit, & huic concessa cognatio mulieris: sin autem illa procuratio testibus confirmaretur, haud dubiè priori mulier ista viro dicata fuerit.

XIX. Sin mulier dixerit non liquet mihi, eine qui hominem misit dicata sim, an cui est ab eo commissà procuratio, siquidem procuratio non fuit confirmata testibus, dicata posteriori mulier erit. Nam si constet hunc



illius esse procuratorem, aut repudium mulieri remittent ambo, aut si libeat, mulierem repudiabit eorum alter, alter domum ducet.

XX. Constitutus à muliere procurator, qui dicationem ejus reciperet, si abiit, dicationem ejus recepit, atque interea loci mulier procurationem rescissam, convulsam voluit, nec exploratum est utrùm ante, an postquam procurator dicationem receperat, resciderit procurationem mulier, dubia dicatio sit. Similiter judicandum erit de viro, qui constitutam procurationem infirmasset.

XXI. Si quis ex quinque mulieribus sibi dicavit unam, & hic idem quam dicaverit non novit, tum verò mulierum unaquæque se ipsi dicatam esse ait, harum omnium isti sit interdicta cognatio, tum singulis repudium remittet: atque donationem propter nuptias quinque unicam repræsentabit, & liberabitur. Qui si concubitu dicavit, Sapientes eum damno multatum isto voluere, ut suam cuique mulierum dissolveret donationem propter nuptias. Atque hoc quidem in promptu est, rem sic se habere, si quinque mulierum uni donationem propter nuptias perscripserit, atque perscriptione deinceps amissa mulierum unaquæque aiat, me tibi dicasti, mihi donationem propter nuptias perscripsisti, atque eam, quæ mihi erat, amisi perscriptionem.

XXII. Mulier, quam rumor est esse dicatam alicui, pro dicata sit habenda, ut nihil liqueat. Rumor enim, nisi judicum confessui proberur, nullatenus moverit. Quo igitur



rumore fiet, ut pro certo habeatur dicatam esse mulierem? Scilicet si viri duo pro testimonio dicant se lychnos ardentes, lectos stratos vidisse, homines introeuntes, & exeuntes, turbam mulierum hujus causa latantium, atque etiam dictitantium, hæc hodie mulier dicata fuit. Quas easdem si testes audierint, cum ita dicerent, hæc hodie mulier dicabitur, nihil moverint, hanc ob causam, quia ad dicandum fortè conventum est, & nihilo magis dicatum. Itaque mulierem dicatam esse audierint, necesse est. \* Item si veniant homines duo qui dicant nos vidimus quasi hilaritatem sponsaliorum, nos audivimus sermonem vulgi, nos iidem audivimus ex illo, qui ex isto auditur hanc esse dicatam coram hoc & illo testibus, qui testes posthac abierunt in regionem aliam, vel mortem obierunt, & iste quidem rumor est qui confirmet dicatam esse mulierem.

XXIII. Hæc ita sunt si nullus in re scrupulus resideat: cum verò scrupulus inest aliquis, & qui mulierem dicatam esse audierunt, iidem simul audierunt & scrupulum, ne utique pro certo habeatur dicatam esse mulierem. Atque ad illustrandam scrupuli rationem exempli causa ponamus rumorem esse sub conditione dicatam esse mulierem, vel dicationem ejus esse dubiam, sane istam dicatam esse pro certo non putatur: sed enim ipsa rogatur, atque ejus responso, quoniam nec argumentum facti manifestum affertur, neque rumor est adeo firmus, fides habeatur.

XXIV. Qui

\* Quod ab hoc loco sequitur ad articulum proximum id totum non extat in editione 1524. in folio magno: extat in editione 1574. in folio parvo.



XXIV. Qui verò scrupulus annuntiatur multis diebus postquam rumor fuit mulierem alicui dicatam esse, is si iudicum confessui verissimilis esse videatur, sanè scrupulo concedetur, nec adeo pro certo habebitur dicatam esse mulierem: sin minus, quando scrupulus non afferebatur tum, cùm nuntiabatur dicatio, nihil moverit.

XXV. Fuit aliquando rumor mulierem quandam alicui dicatam esse, tum multis post diebus hac de re quærentibus pater ejus respondebat, omnino sub hac illi conditione dicata fuerat; verùm enim conditioni non est factum satis, Sapientes ejus verbis nullam fidem habere, sed dicationem mulieris dubiam ducere itidem, ut si scrupulus adderetur nullus.

XXVI. Quam fama & sermone dicatam audivimus, eandem coram præsentibus nobis si sibi dicat & alter, tum in primam illam dicationem fama auditam inquire necesse est. Nimirum si qui primæ dicationis testimonium certum & evidens attulerint, nulla sit alterius dicatio: sin minus, repudium mulieri renuntiet superior ille, cujus dicatio obscura fama nititur, & ducet domum alter, cujus sit manifesta & aperta dicatio. Quin etiam posterior si mulieri nuntium remittat, nihilo magis eam prior domum duxerit, ut ne quis dicat, hic repudiatam à se sponsam recepit postquam fuit \* alteri desponsata.

XXVII. Si quam primò mulierem rumor fuerat certo dicatam esse viro, eandem postea

E

\* Atqui Legē  
interdictum  
est ne quis  
uxorem cui  
nuntium re-  
misi reducat,  
si hæc eadem  
post repudium  
alteri sit con-  
nubio juncta.



fama sit esse dicatam alteri, horum alter eam missam faciet, alter domum ducet, idque hic aut ille.

XXVIII. Quibusdam locis consuetudo fert, ut factis sponfalibus demum munera mittat sponsæ sponfus. Hic si qui testentur se vidisse munera mulieri ferri, metuendum est, ne dicata sit huic, qui munera misit, & dubij causa repudio opus est, tametsi ab plerisque ejus loci incolis munera istiusmodi mitti ante facta sponfalia solent. Ubi verò moris est, ut omnes omnino munera illa mittant ante, quàm fiat dicatio, ibi verò si qui viderint mulieri ferri munera, nihil moverint.

XXIX. Jam quando constat factum esse mulieri instrumentum matrimonij, siquidem incolæ ejus loci aliqui non solent instrumentum illud ante scribere, quàm fiat dicatio, utique curæ erit. Atque in eo loco si nullus scriba resideat, tamen eam ob rem forte factum esse instrumentum ante dicationem, quia scriba opportunè se obtulerat, non ducitur. Sin autem incolarum ejus loci omnium hæc sit consuetudo, ut instrumentum matrimonij conscribant ante dicationem, nihil id moveat.

XXX. Si mulierem aiunt homines duo se vidisse certo quodam die dicari, & item alij duo eandem illo die se vidisse dicari negant, licet omnes in una simul habitent domo, nihilominus rata sit dicatio. Etenim hoc negare se vidisse, argumentum est omnino nullum,



quippe quod homines clam dicare soleant.

XXXI. Testis unus cū ait dicatam esse mulierem, ipsa neget, libera erit, & cunctis adeo permilla: si testes sunt duo, quorum alter dicatam esse mulierem ait, alter negat, scilicet ista nemini ducetur domum. Quæ si ducta fuerit, nunquam missa fiet, siquidem ipsa negat se dicatam esse. Mulier si quando se cuipiam dicatam esse dixit, tum post tempus aliquod eadem ipsa se se dicat alteri, sic est: si cur se primò dicatam esse dixisset causam & rationem afferat, eamque satis idoneam, omnino huic alteri permilla erit. Sin autem causam afferat nullam, aut afferat quidem; sed ineptam, cū ista cunctis interdicta sit, tum alterius dubia dicatio. Is igitur nuntium ei remittet, quippe cū huic & cunctis adeo sit interdicta usque dum venerit is, cui primū desponsata fuit. Similiter existimandum est de muliere, quæ se connubio junctam viro cū dixisset, tum deinde se se liberam asserat, si rationem dicti reddiderit probabilem, fides ipsi habeatur.

---

#### CAPUT DECIMUM.

I. **S**ponsus auctoritate Sapientum sponsa prohibetur tamdiu, dum ea remanet ad patrem. Et qui sua cum sponsa cubat apud socerum, is de rebellionē usque de verberatur. Etenim qui concubitu mulierem sibi dicavit, is etiam apud socerum cum ea rursus

E ij



cubare prohibetur interea, dum eam domum ducit, ibique remansit cum sola solus, atque adeo hanc sibi segregavit. Nihil enim aliud est uxorem ducere ad thalamum, quam sic cum sola solum remanere, quod idem nuptiæ fere dicitur. Jam qui post dicationem sua cum sponsa nuptiarum nomine cubat, is ubi sponsam denudarit, eam propriè possiderit; Ea verò jam tum nupta dicitur, atque ad omnia hujus uxor habetur.

II. Atque ut sponsam duxit ad thalamum sponsus licet cum ea quo libeat tempore cubet: tum hæc illius uxor ad omnia sit habenda: item ut ad thalamum sponsa ducta fuit nupta appellatur, ut etiam cum viro corpus nondum miscuerit, siquidem ad miscendum parata sit. Nam menstrua si duxerit ad thalamum, & cum sola fuerit solus, nihilo magis consummata sunt nuptiæ; sed hæc etiam pro sponsa habetur.

III. Ante nuptias oportet apud sponsum fundere conjugum preces, quæ sunt numero sex: en illæ 1. *Te laudamus Domine Deus noster qui pro gloria tua cuncta constitueris.* 2. *Te veneramur Domine Deus noster Rex mundi, qui genus hominum feceris.* 3. *Tibi gratias habemus Domine Deus noster, Rex mundi, qui hominem finxeris ad tui similitudinem, ad illius imaginis & effigiei speciem, idemque stirpem homini ex homine perpetuam paraveris; gratia tibi Domine victor hominum.* 4. *Gaudium gaudebit, triumphabit aliquando sterilis, cum dissipatos jam liberos suos denuo magna cum leti-*



etiam congregatos apud se viderit, gratia tibi Domine qui suis Sion liberis recreas. 5. Latere hac societate quam amabili itidem, ut quondam in Paradiso rebus à te factis ac constitutis letatus es, laus tibi Domine, qui sponsum & sponsam gaudio perfundis. 6. Laus tibi Domine Deus noster, Rex mundi, qui paraveris gaudium, letitiam, sponsum & sponsam, hilaritatem, cantum, tripudium, jucunditatem, amicitiam, conjunctionem fraternam, concordiam, & consocietatem, brevi Domine Deus noster, brevi Judaea in oppidis exaudiat gaudij strepitus & letitia, vox sponsi & sponsae, quasi hinnitus è thalamo conjugum, puerorum è convivio cantus, gloria tibi Domine qui sponso gaudio compleas.

IV. Si vini copia est, primum super adhibito vini poculo gratulatio fit Deo de creatione vini, tum deinde sex istae preces ordine funduntur. Tum igitur preces funduntur septem deinceps. Quibusdam locis moris est, ut ad vinum myrtus etiam adhibeatur: ibi post fusam de vino precem de myrto Deum venerantur: tum sequuntur de letitia precationes.

V. Non funduntur conjugum preces nisi decem majores natu praesentes adsint, & iidem liberi: atque in his sponsus numeratur.

VI. Si quis sibi mulierem desponderit, precesque fuderit conjugum, nec domi suae fuerit cum sola solus, mulier etiam pro sponsa putatur: neque enim nuptiae fiunt fundendis



conjugum precibus, sed ducenda muliere ad thalamum. Qui verò sibi despondit mulierem, atque duxit ad thalamum, conjugum autem preces omnino omisit, huic & mulier ista ritè nupta sit, & quamvis multo post tempore fundendæ preces. Omnino mulier menstrualis non nubet, donec se se lustraverit. Neque enim super menstruali muliere, quoad se lustrarit, conjugum preces funduntur. Verùm si quis per nefas ejusmodi duxerit, precesque fuderit, nihil est quod eas porrò repetat.

VII. Sponsus oportet sponsæ donationem propter nuptias faciat, & hanc eandem literis consignandam curet antequam sponsa ducatur ad thalamum, ac tum demum licet eam pro uxore habeat, idemque scribæ mercedem exolver. Quid ergo donandum erit? Nempe virgini non minus ducenti denarij: mulieri denarij centum ad minimum: atque hoc illud est, quod fors donationis propter nuptias esse dicitur. Licet enim cuique, si libet, vel auri talentum addere. Etenim ratio sortis & accessionis ad pleraque est omnino eadem: & ubicumque præcisè donatio propter nuptias dicitur, ibi fors simul & accessio intelligenda est. Atque donationem illam propter nuptias uxori decrerunt Sapientes ideo, ut ne facile esset eam missam facere.

VIII. Denarij igitur ab his sunt decreti non illi argenti puri, sed ut tunc temporis erant septem è partibus æris, & argenti una: ut in siclo toto dimidia duntaxat drachma argenti



ineffet. Ergo ducentis, qui scribuntur virgini, denariis omnino quinque & viginti drachmæ argenti puri continentur; & drachmæ duodecim & dimidia centum his denariis, qui mulieri pro donatione propter nuptias sunt scribendi. Jam drachma est ejusdem ponderis atque sex & nonaginta grana hordeacea sic, ut tractatu primo de admiffionibus disputavimus. Denarius autem argenti cum puri, tum etiam illis temporibus signati drachma passim appellatur.

IX. Non pauciores ducentis virgini, non mulieri pauciores denariis centum scribendi sunt. Qui pauciores uxori scripserit, hujus cum ea concubitus obscœni fuerint. Idem est donationem illam propter nuptias uxori factam in instrumento perscribi, & per \* testes atque stipulationem sponsum denariorum centum vel ducentorum obligatum esse. Hic pariter, & qui pro donatione propter nuptias res mobiles pignori dedit uxori, licentiam habet cum ea cubandi, donec factam uxori donationem propter nuptias in instrumento perscribere per otium liceat.

\* In rebus contrahendis homines Judæi hodie quidem certe sic agere solent. Adhibent testes duos aut plures, qui testes conditiones, pacta, conventiones coram hominibus

rem contrahentibus nominatim appellantes pannum explicant: cujus oram apprehendunt hi, qui inter se contrahunt, atque isto pacto ostendunt se quod actum est ratum habere: id passim apud Talmudem & neoericos scriptores acquisitio panni dicitur: hoc idem Majemonides noster & hic & alibi sic fere expressit: *Si de re patta testes sint, qui de manu contrahentis acquisierunt*: nos autem sententiam religiose servavimus: verbum pro verbo reddere non necesse habuimus: itaque ad interpretandum usi sumus verbis paucioribus, & iisdem ad latinam consuetudinem magis accommodatis, *Per testes & stipulationem, aut stipulatione obligari.*

X. Si quis uxorem duxit domum, nec donationem propter nuptias perscribendam

E iiij



curavit : si perscriptio , postquam uxor domum ducta fuit , amitteretur : si viro donationem uxor remisit , vendidit , is , siquidem velit uxorem tenere , omnino sortem ei donationis denuo perscribat necesse est : neque enim cuiquam vel unius horæ spatium sine perscriptione donationis propter nuptias cum uxore confidere licet. Alieno verò homini percepta ab eo commoditate si donationem vendidit uxor , tum ei donationem rescribi necesse non est. Etenim hanc unam ob causam donationem propter nuptias uxori decreverunt , ut ne viro facile esset missam eam facere : atqui hic si nuntium uxori remittat , emptori donationem exolvat itidem , ut uxori solveret , si nulla vendidisset.

XI. Si quis uxorem sibi despondit , & donationem ei perscripsit , nihilosecius ea dum ad thalamum ducta non fuerit , pro sponsa non nupta sit habenda : neque enim donationis scriptione nuptiæ fiunt. Hic igitur si mortem oppetat , repudiumve renuntiet , mulier ab homine libero quidem donationis sortem accipiet : de accessione autem nihil , siquidem hic illam necdum domum duxerat. Qui verò mulierem sibi despondit , & donationem ei scripsit nullam , hic si vitâ excedat , vel repudium remittat , sponsa nihil quidquam donationis , ne sortem quidem ab isto accipiet , quippe quia fors illa donationis mulieri non decernitur prius , quàm aut ipsa domum est ducta , aut ei perscripta donatio fuit. Jam si cujus filiam sibi desponderit aliquis ,



atque donationem ei perscripserit, tum moriatur, nuntiumve sponsæ remittat adhuc puellæ, donatio ejus, ut supra posuimus, ad patrem pertineat.

XII. Præterea Sapientes constituerunt, ut qui virginem ducat uxorem, is septem dies perpetuos hilares cum ea sumat, neque sua se exerceat arte, neque apud forum negotiis contrahendis se se implicet; sed ad vescendum, potandum, atque ad oblectandum se paret totum, & dedat: nec in eo differat à novo marito viduus. Et qui ducit uxorem jam mulierem, is non minus triduo se faciat hilarem. Etenim fœminis Judæis à Sapientibus id decretum est, ut qui mulierem ducit uxorem seu novus maritus, seu viduus cum ea se triduum oblectet.

XIII. Jam uno & eodem die plures simul uxores ducere; deque cunctis semel conjugum preces fundere omnino cuique licet: sed cum harum unaquaque, quantum par est, se seorsim oblectabit, cum virgine hebdomadam, triduum cum muliere: *neque enim latitia confunditur alia cum alia.*

XIV. Omnino fas est sponsalia facere quolibet die, vel \* nona mensis Julij, idque noctu vel interdiu: verum uxorem ducere domum nec pridie sabbati licet, nec postridie, ea re, quia maritus in epularum apparatu occupatus sabbatum forte profanum haberet. Nam interdictum esse ne sabbato ducatur uxor, ne dici quidem necesse est: neque enim \*\* interseclis diebus uxor domum ducitur, ut

\* Qui dies quidam imprimis austerus habetur, lugubris, ac calamitosus.

\*\* Sic vocantur dies illi qui ad Pascha ab prima ad octavam solemnitatem intercedunt, item & ad solemnitatem Tabernaculorum: Neque enim tam sancti habentur, quam uterque dies sollemnis: neque



porrò tam pro-  
fani, quàm  
dies profesti.  
Gen. 29. 27.

supra differui, eam ob causam, quia *letitia non confunditur alia cum alia*. Huc enim spectat Legis illud, *Comple hebdomadam istius, tum dabimus tibi etiam & illam*. Reliquorum verò dierum quo libuerit uxor ducetur, modò proximum ante nuptias triduum sponsum in apparanda cœna nuptiali occupatum habuerit.

XV. Ubi loci secundo hebdomadæ die & quinto duntaxat jus dicitur, ibi virgo ducitur hebdomadæ die quarto: ut si de virginitate novæ nuptæ lis incidat postridie nuptiarum mane prorsus dijudicetur. Mulier autem à Sapientibus institutum est, ut ducatur hebdomadæ die quinto, eam ob causam, ut maritus cum ea se oblectet hebdomadæ die quinto, vigilia sabbati, sabbatoque, & consequentis hebdomadæ die prima redeat ad opus.

XVI. Pater si filiam desponderit parvam, eam sponsus sibi dari nuptum postulat, æque filia, ac parens nuptias protulerit interea dum sponsa adolescit, atque puëlla evadit: rursusque ea confestim ducetur si patri libeat: verum sic facere non decet.

XVII. Cùm parvam sibi despondit aliquis, multisque moratus annis sponsam sibi postulat nuptum dari puëllam extantem, à postulatione tribuuntur etiam sponsæ menses duodecim, quibus se ipsa alat, & comparet ea, quorum indiget: tum deinde demum nuptum datur. Si postulat jam puberem menses ei duodecim sunt numerandi à primo puber-



tatis die. Et si quis virginem eodem ipso die quo illa pubesceret, sibi dicarit, item dantur sponsæ menses duodecim à dicationis die, qui idem ipse pubertatis est. Si quis autem virginem sibi dicarit posteaquam ea pubes esset, huic siquidem pubertas extiterit duodecim menses ante quàm dicaretur, omnino triginta dies conceduntur ex quo postulatur in nuptias. Item si quis sibi despondit mulierem, sponsæ dies omnino triginta conceduntur ex quo poscitur in nuptias.

XVIII. Atque ut sponsæ cùm à sponso poscitur in nuptias spatium datur, quo se ipsa alat ante, quàm nubat; item & sponso, cùm poscitur in nuptias à sponsa spatium, quo se ipse toleret, datur: atque tantum datur huic, quantum illi daretur, si sponsæ menses duodecim, tantundem sponso: si dies duntaxat triginta, item & dies triginta sponso.

XIX. Sponsus si nuptiis moram producat, etiam post exactum tempus præstitutum, alimentum sponsæ suppeditet, quamvis necdum domum ductæ. Quòd si præstitutum tempus completur seu pridie seu postridie sabbati, sponsus non alat eodem ipso die sponsam, quippe quo domum ducere non licet. Jam si ad præstitutam diem in morbum incidat seu sponsus, seu sponsa: itemque si tum menstrualis sit sponsa, nihil alimenti sponsæ præbeat sponsus, quoniam neque sponsa est ad nuptias idonea interea dum lustratur & convalescit, nec uxorem ducere potis est sponsus ante quàm sanetur.



## CAPUT UNDECIMUM.

I. **Q**ui ducit uxorem omnino virginem ; verum aut jam viduam , aut repudiatam , aut levirum quæ calceo jam exuit , huic siquidem à sponsalibus vidua , repudiata fuerit , calceoque levirum exuerit , pro donatione propter nuptias erunt denarij ducenti. Sin autem à nuptiis , erunt denarij centum. Etenim virgo ut nupsit pro muliere habetur. Similiter qui virginem libertinam , profelitam ducit uxorem , aut eam quæ fuit aliquando captiva , si servæ manumissio , gentilis ad Deum conversio , captivæ denique redemptio facta sit ante , quàm compleffet tres annos & diem unum , pro donatione propter nuptias erunt ducenti denarij : sin autem natæ fuissent tres annos & diem unum , aut plus eo , omnino erunt denarij centum.

II. Quid est igitur , cur Sapientes hisce virginibus omnino denarios centum decreverunt donationis propter nuptias ? Quia nupta , serva , gentilis , captiva virum fere sunt expertæ. Itaque istis seu virum expertis , seu etiam integris duntaxat denarij sunt decreti centum , cæteraque ad omnia pro mulieribus habentur.

III. Quæ fuit ad genitales corporis partes baculo læsa , huic centum denarij pro donatione propter nuptias erunt. Etenim quæ pro integra virgine nuptum data fuit , ea ipsa quo-



que, si porro compertum id habeatur, læsam baculo fuisse ad partem genitalem, omnino centum denarios pro donatione propter nuptias auferet. Parva tres annos nata, aut minus eo, si sit virum experta quamvis grandem, nihilominus ducentos denarios pro donatione propter nuptias habebit. Nimirum ista quidem denuo virgo, similis virginum reliquarum existet. Item cum virgine grandi si concubuerit parvus novem annos natus, aut minus eo, ea quoque ducentos denarios donationis habebit itidem, ut si virum omnino nullum experta sit: scilicet qui novem annos & diem unum natus est, hujus efficax concubitus: minoris autem omnino nullus est.

IV. Virgini vel \* claudæ, vel oculis captæ, vel sterili donatio propter nuptias erit ducenti denarij: surdæ verò & insanæ nihil donationis decernitur: vel nubere ipsum insanæ quidem certe nullatenus concessum. Surdæ enim ut nubat Sapientum auctoritate permissum est. Nihil autem pro donatione propter nuptias decernitur idcirco, ut ab hac ducenda ne donatio propter nuptias quemquam deterreat. Atque huic ut nulla donatio propter nuptias, sic neque alimentum decernitur, nec quidquam ex illis, quæ in conventionem nuptiali fere nuncupantur. Rursus si surda ducatur uxor, tum postea sanetur, huic & donatio propter nuptias, cæteræque nuptiarum stipulationes debeantur: donatio autem propter nuptias centum erit denariorum.

V. Si quis cum surdam aut insanam duc-

\* Est hic mendum in textu editionis in folio parvo  
174.



ret uxorem, huic denarios centum pro donatione propter nuptias scripisset, ratum erit, quippe cum rei iacturam lubens fecerit.

V I. Vir surdus & insanus si sanas duxerint uxores, his nulla sit in viros actio, cum ille sensus aurium, hic mentis compos factus sit. Qui si postquam sanati sunt porro tenere velint uxores, his pro donatione propter nuptias erunt centum denarij. Quod si homini surdo uxorem adjunxerit iudicum confessus, idemque mulieri de bonis illius donationem propter nuptias perscripserit, ista quidem percipiet quidquid à confesso iudicum perscriptum est. De insano autem homine, huic nusquam & nunquam jugat uxorem iudicum confessus. Nimirum in isto decretum Sapientum nullatenus firmum est; ex quo nuptias ei constituere nullas. Eandem ob causam nec parvo Sapientes nuptias constituere, quippe qui certas nuptias aliquando per se ipse fecerit. Quid est igitur, quod iidem parvæ potius nuptias constituerint, cum & ipsa per se aliquando nupserit? Nempe ut ne accideret, ut ejusmodi virgines vulgares haberentur. Parvo verò nulla mulier collocatur usque dum exploratum fuerit, ac cognitum, signa illa eum edidisse.

V II. Parvus igitur si ducat uxorem cum novem annos ætatis egerit & diem unum, tum etiam isti nulla sit donatio propter nuptias: qui idem cum adolevit si teneat deinceps uxorem, tum ea sortem donationis propter nuptias auferet. Etenim ethnicus si Dei



vivicultum purum suscipiat unà cum uxore item ethnica, huic pro donatione propter nuptias tribuentur denarij centum. Nam profectus si tenet uxorem, hac conditione teneat.

VIII. Cui virgini pro donatione propter nuptias ducenti dantur denarij, in hanc actio virginittis habetur. Cui verò Sapientes aut omnino centum denarios pro donatione propter nuptias decrerunt, aut nihil quidquam, in eam virginittis actio nulla fit. Atqui ante nuptias si quis sua cum sponfa sola solus fuit, huic in eam de virginittate nulla datur actio.

IX. Quanam est igitur illa virginittis actio? Nempe si quæ pro virgine nuptum data fuit, ea arguatur virgo non fuisse. Etenim virginittis signa sunt duo: unum qui sub finem concubitus principis manat de muliere sanguis: alterum est ea, quæ inter primum concubitum angustia in muliere fere reperitur.

X. Si quis virginem duxit, cui pro donatione propter nuptias denarij sunt ducenti, tum actionem instituit negans se virginem invenisse, res ex ipsa quæretur: si responderit, verum; virginem me non invenit: cecideram, & baculo, humo offensa virginittatem amisi, habetur ei fides, atque donatio ejus propter nuptias ad denarios centum redigitur. Et quanquam cum ea maritus sic agat, forte tecum vir aliquis rem habuit, adeoque pro donatione propter nuptias nihil à me erit tibi, nihil nos ejus actio moveat. Attamen



hoc viro potestatis datur, ut generatim excretur si quis cum ea concubuit, quippe cum ei nihil liqueat.

XI. Sin ita, vera prædicat, non invenit me virginem, post sponsalia mea me vi vir compressit, & isti fides habenda, ac sic, ut ante, ducenti denarij sunt pro donatione propter nuptias. Nam si maritus ait, forte vitium tibi oblatum est ante, quàm mihi desponsata fueras, atque dolo malo mihi conciliata es, vel postquam mihi sponsa fueras sponte tua cum alieno viro cubuisti, item jus habet excreandi generatim, si quis falsam actionem adhibeat ad exigendum id, quod nullatenus debeat.

XII. Jam si non inventæ virginitatis actionem cum intendit vir, mulier ait, homo mecum non cubuit, virgo sum etiam, ea vel spectabitur, vel testibus adhibitis vir denuo corpus cum ea miscebit. Sin ait mulier, omnino corpus ille mecum miscuit, sicque sum inventa, ut solent virgines, atque vana mihi intenditur actio, sciscitamus è viro quid sit quod se neget uxorem invenisse virginem. Etenim si sanguinem illum neget exstitisse, oportet in gentem mulieris inquiri: fieri enim potest, ut hujus gentis mulieribus omnino nullus existat sanguis neque menstrualis, nec virginalis. Quod cum ita sit, mulier pro virgine putabitur: sin minus, mulier ipsa spectabitur, si forte ingenti laboret è morbo, qui suam membrum viriditatem ademit: si fame sit enecta, reficieturque cibo &



& potione donec salva sit & valida : tum maritus denuo corpus cum ea miscebit , atque videndum erit , ediderit sanguinem illum , necne. Si neque morbus reperitur , neque fames , nec quidquam hujus generis , omnino est in eam depositæ virginitatis actio. Quamvis enim magnam vir in concubitu sit expertus angustiam , ubi non manavit sanguis , ibi nulla virginitas. Nimirum sanguinem mittunt virgines omnino omnes , parva , major , puëlla , pubes , nisi si morbus obster , ut supra disputavimus. Quòd si vir ita respondeat , quia inveni non angustiam , sed januam patentem , inquiretur in ætatem mulieris , si forte pubes sit : quippe cùm puberum plerisque non ea existit angustia , quæ magnopere sensu percipitur : sed enim virginis adultæ membra molliuntur , deficit virginitas. Quæ cùm ætatem puberem non attigit , tum etiam viro dicitur , tu fortassis in concubitu mulierem inclinasti , aut oppidò lentè subagitasti , eaque de causa angustiam minimè percepisti. Quòd si neget , atque januam patentem pro certo affirmet , erit actio amissæ virginitatis in omnem virginem impubem , parvam , puëllam , ægram , valentem. Nam puëllæ quidem virgini clausum est usque ostium : Etenim cùm manaverit sanguis , ubi sit inventa janua patens , nulla est virginitas.

XIII. Quidam è magistris illis contrà docuerunt , in virginem puberem non esse sanguinis hujus actionem , esse januæ patentis : atque non est hæc doctrina Talmudica : ni-

F



mirum istorum mendosa fuerunt exemplaria Sapientum. Ego verò exemplaria perlustravi multa & varia, eaque perantiqua, in quibus inveni rem sic, ut supra explicavi, puberem in virginem nisi sanguinis actionem esse nullam.

XIV. Mulieribus sortem donationis propter nuptias decreverunt Sapientes: iidem constituerunt, ut si quis in uxorem intendat actionem non inventæ virginitatis, fides huic habeatur. Quod si inficietur uxor, ejus sit refellere, non probare viri. Sic enim habetur, neminem esse, qui apparet \* epulas uti perdat, quique convertat in luctum lætitiā propriam.

XV. Quod igitur ad tempus vir actionem virginitatis habet? Nempe si se mulier \* abdiderit vir confestim agat oportet: sin minus post tricesimum à nuptiis diem agendi jus habet etiam.

XVI. Quod autem Sapientes dixere fidem esse viro habendam, quem mendacij arguat uxor, id omnino omnes illi magistri eò pertinere volunt, ut sorte donationis propter nuptias multetur uxor: accessione verò potiat̃ur tantisper dum aut evidenti ratione evincitur, aut se ipsa confitetur cum viro ante cubuisse, quàm huic desponsa fuerit, atque hunc adeo decepisse. Quare sicut cuncti rem jurejurando obtinentes, ita & hæc quoque à viro adiget̃ur ad solemne sacramentum per apprehensum \* volumen Legis quàm desiderabile prius, quàm accessionem auferat: non

\* Atqui oportere ut sponsus proximo ante nuptias triduo toto apparandæ cenæ nuptiali det operam, ante dictum est.

\* Si cum viro alieno solo tula se mulier abdiderit.

\* Ad prælegendos populo libros Moyſi



item ipsa virum, quî possit eam sorte donationis propter nuptias defraudare; cogat, ut jurejurando firmet uxorem non invenisse virginem. Sic enim habetur neminem esse hominem, qui cû apparando convivio dederit operam, id perditum esse velit: verûm enim datur mulieri potestas execrandi in virum si falsi infimulet.

Judæi ne nunc quidem his utuntur qui sunt excusi typis; sed qui manu sunt exarati, atque continentur eo, quod verè, proprièque volumen dicitur: id enim sacrum habent,

atque venerabile adeo, ut nihil supra: porro ejus amore tenentur quàm maximo. Ex quo factum, ut volumen illud & hic scriptori nostro, & passim cæteris auctoribus *DESIDERII* vocabulo nominetur: nempe hoc isti sibi volunt nihil esse isto volumine Legis magis expetendum atque desiderabile. Quod quis potest uno verbo Latine redere? Usus sum igitur pluribus: *Volumen Legis quàm desiderabile.*

XVII. Si quis postea quàm sorte donationis propter nuptias defraudarit uxorem porro retinere velit, oportet ei rursus denarios centum in donationem propter nuptias perscribat: interdictum est enim ne quisquam cum uxore vel horam maneat unam sine perscriptione donationis propter nuptias, ut supra disserui.

## CAPUT DUODECIMUM.

I. **Q**ui ducit uxorem, virginem, mulierem, majorem, parvam, Judæam, profelytam, manumissam, is huic promittit res decem, & vicissim quatuor ipsi adquiruntur.

I I. Ex his decem tria ista Lege sancita sunt, curatio corporis, vestitus, & statum tempus. Curatio corporis, hoc est, ejus alimentum:

F ij



vestitus est, quod nomen ipsum declarat: statum verò tempus, ut consuetudine communi cum ea se jungat: reliqua septem auctoritate sunt Sapientum instituta, quæ quidem omnia iudicum confessus pacisci censetur. Eorum primum est fors illius donationis propter nuptias: cætera pactiones dotales fere vocantur: en illæ. Ut vir uxorem ægro- tantem curet, captam redimat, mortuam sepeliat; ut de mariti jam mortui bonis uxor etiam alatur tantisper, dum vidua maneat, & habitet ejus in ædibus: ut quas ipsa peperit marito puëllas, illæ quoque de mortui bonis tolerantur interea, dum viris despon- dentur: & quos eadem viro pueros, ij ut matris donatione propter nuptias exempta porrò unà cum fratribus ex eodem patre na- tis reliquam hæreditatem ex æquo partian- tur.

III. Viro autem adquiruntur & ipsi qua- tuor, omnia videlicet ex institutis Sapien- tum: en illa: ut quæ opera & manu mulieris efficiuntur, viri sint: item & ea fortuito si quid inveniat: ut vir capiat omnino fructus omnes de bonis uxoris quoad ipsa vivat: quam si vir efferat, hujus universa bona hæ- reditate veniant ad illum ante omnes.

IV. Idem statuerunt pro victu uxoris esse, quod ejus labore atque manu comparatur: bonorum fructus pro redemptione captivi- tatis: & pro funeris sumptibus hæreditatem donationis propter nuptias. Itaque uxor ipsa cùm dixerit, ego neque ali volo, nec efficere



quidquam, omnino ei obtemperatur, non invita cogitur. Vir enim si dixerit uxori, nolo te nec alere, nec percipere quidquam tuo è labore, mos ei non geritur: fieri enim potest, ut uxori ad alimentum non suppetat manuum opus. Atque hujus instituti causa alimentum mulieris in numero pactio- num dotalium esse ducitur.

V. Quæ quidem omnia si in nuptiali instrumento nominatim perscripta non sunt; imò si quis ne instrumento quidem perscripto uxorem bona fide duxerit, nihilo secius eam ubi deduxit domum, & ipsi sua illa quatuor adquisita sunt, & sua decem mulieri: neque enim ista nuncupari opus est.

VI. Vir igitur si cum uxore pepigit, ut quibus ipse conditionibus adstrictus est, earum solveretur aliqua: contravè cùm pepigit uxor, ut aliquid eorum, quæ uxore ducenda viro adquiruntur, non acquirerentur, pactio rata sit. Excipiuntur tria in quibus pactio omnino nihil juvat: de his pactio- nem cùm feceris, infecta sit: ea sunt tempus statum, fors donationis propter nuptias, uxoris hæreditas.

VII. Ponamus igitur exempli gratia cum uxore pactum esse virum, ut ne temporis statim jus adversus se habeat, pactio sit irrita, id uxori non minus debeat: quippe qui contra id quod Lege sancitum est pactio- nem fecerit eam, in qua non pecunia agitur.

VIII. Si de sorte donationis propter nuptias imminuenda cum uxore pactio- nem



fecerit, vel denarios centum aut ducentos pro sorte donationis propter nuptias cum perscripisset, uxor ei rescripserit se de summa donationis hoc illud accepisse, cum nihil perceperit, pactio nulla sit. Etenim qui virgini pro donatione propter nuptias nummos perscribat pauciores, quam ducentos, pauciores centum mulieri viduæ, hujus sint obscæni concubitus.

IX. Porro postquam uxorem duxerit si cum ea pepigit, ut hæreditas ejus ad se ne veniret, pactio nulla est: quanquam enim auctoritate Sapientum est institutum, uxoris ut hæreditas ad virum veniret, tam hoc institutum confirmarunt, quam si ex Lege sit. Nullus igitur hac in hæreditate pactio loci relinquatur, tamen de re pecuniæ agitur. *Num. 27. II.* Quod enim in Lege dicitur de jure hæreditario: *Atque hoc erit statutum judiciale*, id videlicet etiam in omnem posteritatem præceptum fuit. De rebus cæteris cum uxore viri pactio rata erit: ut si cum uxore depasciscitur, ut neque corporis curationem, neque vestitum ei suppeditet, ea lege, si de bonis ejus fructus non percipiat, aut quid hujus simile, firma, fixa erit pactio.

X. Quid igitur alimenti decernitur uxori? Nempe in singulos dies panes pro binis epulis: utræque igitur dirigentur ad communes omnium eundem locum habitantium epulas, quæ sane quidem non languentis, non hominis sunt edacis. Panis autem componetur è frugibus iis, quarum ad ejus loci incolas



usus erit, è tritico si tritici; si hordei ex hordeo: item ex auriza, milio, cæterisque frugum generibus, quibus eo loco ad victum uti solent homines. Porro quædam decernuntur uxori obsonia, quæ ad panem adbibeat, velut pisa, olera, atque horum similia: porro oleum in escam: porro autem oleum in lucernam, fructusque insuper, & parum vini in potionem, si tamen loci consuetudo fert, ut vino uxores ad potum utantur. In sabbatum verò decernuntur epulæ tres, caroque, piscifve pro more institutoque loci. Præterea autem uxori singulis hebdomadis necesse est nummum argenti dari in necessaria vitæ præsidia: obolum videlicet ad lavanda vestimenta, tantundem in balnearum usum, atque horum similia.

XI. Sic enim cum pauperrimo quoque Judæorum agitur: cum divite verò pro facultatibus: ut si per has ei liceat, ut quotidie multa & varia comparet uxori pulpamenta, ea suppeditare vi cogatur. Etenim uxoris alimentum ratio tota ad facultates accommodatur. Jam si quis sit tam inops, ut ne panis quidem uxori quantum est ad vitam necessarium suppeditare queat, vel invitatus cogitur ei nuntium remittere, idemque uxori fieri debitor donationis propter nuptias interea, dum adipiscitur, unde dissolvat.

XII. Idoneum igitur alimentum uxori dare, atque separatim ab ipsa cibum capere, si viro libet, sanè licet, si modò quaque nocte sabbatina simul unà cum ea cœnet.

F iiij



XIII. Quod de cibo dato residuum facit uxor, id ad virum redit. Sacerdos non dedit uxori de sacris cibum totum, eam ob rem, quia defendere hæc à rebus inquinantibus admodum est difficile, purèque comedere: verum partim sacrorum, partim profanorum dedit.

XIV. Etenim tanquam vir uxorem, item quos suscepit ex ea liberos natu minores alere debet, quoad egerint annos sex. Deinceps ex auctoritate Sapientum cibum his suppeditat, quoad adoleverint. Id enim si recuset, increpatur, urgetur, pudore suffunditur. Qui si porro renuat, de eo per præconem ita prædicatur. Hic ille crudelis est, liberis alimentum denegat, immanior etiam immunda volucris, quæ pullos suos foveat. Atqui post sextum ætatis annum hos etiam alere vir non cogitur.

XV. Sic enim decernitur de homine incenso, qui incertum est utrùm habeat unde erogat in pauperes, nec ne. Cujus autem census est is, unde conveniat in pauperes tantum erogare, quantum ad liberos alendos suppetit, huic id invito eripitur nomine eleemosinæ, qua deinde liberi sustentantur interea, dum adolefcunt.

XVI. Viri peregre profecti uxor si veniat ad iudices petitem alimentum, ei primos à protectione viri menses tres nihil alimenti adjudicatur: sic enim existimatur neminem esse qui abiens domum relinquat vacuum. Postea verò alimentum decernitur. Qui si vir bona



reliquit, in ea iudices invadunt, atque ad uxoris alimentum divendunt: neque verò reposcetur ab ea de labore ratio ad reditionem viri, qui si reversus quid ab ea effectum inveniat, sibi habuerit. Et si iudices non adierit uxor, verum viri bona ad sustentandam vitam ipsa sua sponte vendiderit, venditio nihilominus rata erit. Tum verò ut venditionem prædicandam curet, id necesse non est: neque adigitur ad iurandum, nisi si vir redux in mulierem instituat actionem: & post obitum viri donationem propter nuptias ablatum cum venerit uxor, tum ea adducitur ut juret se ad necessaria vitæ duntaxat comparanda divendisse de mariti bonis.

XVII. Atque ut iudices ad alimentum uxoris, item vendunt bona ejus qui peregre abiit, in alimentum liberorum sex annos ipsos habentium, aut eo minus. Grandiores enim de parentum bonis absentium quantumvis censorum, non aluntur. Item si quis mente captus sit, hujus quoque bona divendunt iudices ad uxorem ejus & liberos, qui sex annos nati sint, aut eo minus, sustentandos.

XVIII. Tradunt è magistris quidam mulieri, cujus vir peregre exierit, mortemve oppetierit, alimentum decerni nullum tantisper, dum ea prescriptionem illam donationis propter nuptias in medium proferat: quam si non protulerit, ei omnino alimenti suppeditari nihil, quoniam forte donationem propter nuptias à viro jam accepit, eidem



ipsa forte condonavit. Quæ cum ita sint nihil à viro mulieri suppetit alimenti, quemadmodum deinceps disputabitur. Alij contra, decerni alimentum, quod pro certo putetur à muliere necdum acceptam donationem propter nuptias, nec remissam esse, adeoque nihil opus prolata perescriptione. In hac ego sententia sum quod ad mulierem attinet, cuius vir peregre abierit, quippe cui à viro alimentum suppetitari Lege sancitum est. Cuius autem maritus de vita decessit, isti mulieri nisi perescriptionem proferat alimenti decerni nihil: etenim huic alimentum præbetur ex auctoritate Sapientum: præterea autem ista de bonis hæredum alitur: atque semper cum hærede stare convenit.

XIX. Mulier si post abitionem viri est mutuata quid ad victum, id vir cum redierit oportet dissolvat. At si quis sua ipsius voluntate cuiuspiam absentis uxorem alit de suo, nihil est, quod isti vir redux solvat. Enimvero hic sponte rei jacturam fecit, quando nec à viro iussus est mulierem nutrire, neque porro mulier quidquam ab eo accepit utendum.

XX. Si vir abiens uxori dixisset, tu opere faciundo exerce victum tuum, nihil ei porro suppetitet alimenti: mulier enim si minus contenta esset ea re, minusque confideret, peteret, viro diceret, non mihi mea opera sufficit.

XXI. Si postquam ad iudices ventum, postquam decretum est alimentum, atque in hanc rem bona vendita fuerunt aut à judi-



cibus, aut etiam ab ipsa muliere, vir tandem redux ait se uxori reliquisse, unde se sustentaret, mulier apprehenso volumine Legis perquam desiderabili iusjurandum dabit a viro sibi relictum esse nihil. Cum verò mulier opperta virum nec petiit quidquam, nec vendidit, tum si vir redux ait in alimentum uxoris se reliquisse, negat mulier, & eadem intendit se mutuam ab hoc aut illo esse, unde viveret, vir oportet illud \* conceptum iusjurandum juret se uxori ad vitam reliquisse: quo facto vir solutus, mulier ære alieno sit obstricta.

XXII. Mulier cum vendidit res mobiles, si in alimentum vendidisse intendat, vir contradicat se in alimentum ei reliquisse, mulier conceptum illud iusjurandum dabit nihil sibi relictum esse. Jam si mulier nihil petiit, nihil utendum accepit, nihil vendidit; sed victum quæritavit diurno se se exercens, nocturnoque labore, tamen a viro nihil auferet.

XXIII. Si quis votum fecerit, ut sua ex se uxor nihil commodi perciperet, seu is spatium quoddam præfiniverit, seu non, expectandum erit omnino dies triginta. Posthac si præstitutum voto tempus exactum fuerit, vel exactum non fuerit quidem: verum idem voto se liberandum curaverit, bene habet: sin minus uxori nuntium remittat, numeret donationem propter nuptias. Atque per hos triginta dies uxor labore victum suum quæret. Qui si non suppetit ad omnia, oportet ali-

\* Præter iusjurandum illud per apprehensum volumen Legis, de quo paulò ante diximus, est & alterum iusjuramentum certis verbis conceptum: id à recentioribus quibusdam magistris dictatum est, & hinc commemoratur.



quis è viri fodalibus mulieri reliqua ad vitam necessaria subministret.

XXIV. Itemque si quis votum fecit, uxor sua ne fructuum genere ullo vesceretur, manendum diebus triginta: extra tempus id amittat uxorem & persolvat donationem propter nuptias oportet. Qui etiam vir cum fecit votum ne vesceretur uxor esca mala, aut genere quodam cibi, quem cepisset nunquam, tum etiam exactis post votum diebus triginta uxorem amittet & dependet donationem propter nuptias. Jam mulier cum vovit se nullo prorsus fructuum genere ad cibum abusuram, idque vir ei confirmavit: eadem cum naziræatus votum nuncupavit, nec vir irritum fecit, si est, ut vir apud se velit uxorem manere nullo vescentem genere fructuum, aut naziræam, maneat: sin neget se uxorem voto obligatam pati posse, missam faciat, & donationem propter nuptias annumeret. Etenim ei in manu erat, votum ut irritum faceret, quod lubens confirmavit.

### CAPUT DECIMUM ET TERTIUM.

I. **D**E vestitu autem quotannis uxori vir oportet vestimenta præbeat drachmarum quinquaginta, quæ, ut erat moneta priscis illis temporibus, omnino sex sunt argenti denarij, addita quarta denarij parte. Dantur autem vestes novæ brumali tempore: tritas induit æstivo: panni, id est, vestium reliquiæ



manent uxori, ut his se operiat tum, cum sit menstrualis. Præterea autem ad singulos dies solemnes cingulum ei, calanticaque dabuntur, ac calcei.

II. Ita res erat temporibus illis, atque in Judæa duntaxat: aliis enim temporibus locisque neutiquam ratione pecuniæ vestimentum dirigitur: quippe cum in alio loco vestium summa caritas, in alio rursus vilitas magna. Itaque eo potissimum res vestiaria vertitur, ut suæ quisque uxori teneatur suppeditare vestes ad hyemem accommodatas, idem & ad æstatem, easque quàm minimo pretio cunctæ in omni regione matresfamilia comparare soleant.

III. Jam qui debetur uxori vestitus, eo continetur etiam supellex, & tectum, quo habitet. Quid ergo supellectilis? Nempe lectus stratus: storea, matta, quibus infideat: utensilia, quibus ad escam & potionem utatur, ut olla, ut scutella, ut poculum, laguncula, & horum similia. De habitatione autem conducet ei casam cubitos quatuor quòquò versus patentem, in qua præter latitudinem corporis mulieri supersit spatium, ubi faciat opus: porrò latrinæ sint extra casam necesse est.

IV. Porrò præbendus ei mundus muliebris, veluti versicolora vela, quibus obvolvatur caput, & frontem; veluti cerussa, fucus, atque horum similia, quominus satietas ejus virum capiat.

V. Sic enim habetur Judæorum vel tenuif-



simus : opulenti verò pro sua quisque facultate : ut si cui per facultates liceat uxori dare vestes sericas , acupictas , imò aureas , hic ejusmodi vestes ei præbere cogitur. Atque habitatio quoque , mundus muliebris , supellex , omnia ad facultates referenda sunt. Quod si quis sit , qui ne hoc quidem potest , quod debet Judæorum quàm pauperrimus , is cogitur uxorem amittere , cui nomine donationis propter nuptias obstringetur tantisper , dum ditescat.

VI. Nec verò uxori tantum , sed liberis etiam sex annos natis , aut eo minus , vestitum idoneum , supellectilem , & tectum quo habitent , quisque præbeat , non pro facultatibus ; sed prout necessitas ipsorum postulat. Omnino sic se res habet , de re mariti quicumque sunt alendi seu ante , seu post obitum , his eisdem vestitum , supellectilem , & tectum inde suppeditari oportet. Et quorum ad victum mariti bona vendunt judices , vendunt etiam ad vestitum , supellectilem , & habitationem.

VII. Judices igitur mulieri , cujus vir peregre exierit , victum , vestitum , supellectilem , & tectum decernunt : non item mundum muliebrem , ut quæ tum , cui ornetur , virum non habet. Cujus autem vir aut mente , aut aurium sensu captus est , huic mundus muliebris adjudicatur. Jam verò in uxorem de vestitu , supellectile , habitatione , actio est eadem , quæ de victu , idem jus si vir ait se dedisse , mulier negat , omnino omnium est una & eadem ratio.



VIII. Si quis votum fecit uxor sua se ut nulla re muliebri expoliret, id videlicet firmum erit in inopia totum annum: præterea vel uxorem voto liberabit, vel amittet atque donationem propter nuptias annumerabit: verum enim in copia ratum erit omnino dies triginta: posthac itidem uxorem voto liberet, vel amittat, pendatque donationem propter nuptias.

IX. Si quis votum fecit uxor ne balneum frequentaret, ratum erit in oppidis hebdomadam unam, binas in pagis: & si quis votum fecit, ut uxor ne calceos indueret, firmum erit in pagis triduum, in oppidis diem solidum: præterea voto liberabit uxorem, amittetve, atque donationem propter nuptias pendet.

X. Si quis votum fecerit, ut uxor ne mutuum daret, rogaret quidquam suppellectilium, quæ fere vicinæ solent, velut cribrum, incerniculum, pistrinum, atque horum similia, vel uxorem voto liberet, vel amittat & donationem propter nuptias annumeret, quippe cujus sordibus mulier in vicinia fieret infamis. Et mulier si voverit se cribrum, capisterium, pistrinum, furnumve mutuum neque daturam, neque sumpturam, se vestimenta illa pulchra non texturam, alba; ubi de more alba texuntur, hæc sine donatione propter nuptias missa fiet, hac de re, quia per eam avaritiæ nota viro à vicinia inureretur.

XI. Quibusdam locis consuetudo non patitur, uti mulieres in publicum prodeant,



quamvis sit calantica caput opertum, nisi pepli genus illud, quod pallium imitatur, totum etiam corpus obtegit. Hic uxori vir inter alias vestes peplum quoque præbeat, necesse est, omnium videlicet quam vilissimum. Qui si bene locuples sit, idem hoc uxori pro fortunis tribuerit, quocum prodeat tum, cum ad parentes eat, mœrentesque, gaudentesque. Fas est enim mulierem visum ire parentes suos, adire lugentes, agitare convivia, quo se propinquis suis ac consuetudine conjunctis benignam præbens ab his vicissim visatur: neque enim carcere concluditur, sic, ut nusquam & nunquam progredi liceat. Illud flagitium est ac dedecus mulierem itare semper tum ad forum, tum ad plateas, à quo quidem arcere viro jus est. Is igitur uxorem non sinet exire nisi pro necessitate semel aut bis in mense: nihil enim pulchrius est quam mulierem in intimo quodam domus suæ angulo contineri, uti scriptum videmus: *Omnis puëlla regis splendor est intimus.*

*Psalm. 45. 14.*

XII. Si quis votum fecit, ne parentes suos inviseret uxor, cum sint ejusdem urbis incolentes, opperiendum erit siquidem mensem in unum votum est: sin autem menses est in duos, uxorem amittere, pendetque donationem propter nuptias. Jam si parentes aliud habitent oppidum, & votum est in unum modo diem solemnem, manendum erit: sin est in alterum, uxorem amittat, atque donationem propter nuptias numeret.

XIII. Si



XIII. Si quis votum fecit ne uxor vel ad luctum, vel ad convivium adeat, aut voto prorsus liberet uxorem, aut amittat, & donationem propter nuptias repræsentet. Quid enim est uxorem carcere clauso asservari, nisi hoc est? Verum enim si petulantes homines causetur, quos constet in lugentium aut epulantium domo versari, obtemperandum est.

XIV. Si quis uxori dixerit, nolo veniat ad me pater tuus, mater tua, frater tuus, soror tua, obtemperandum est. Si quid igitur his adversum accidat, uxor ad ipsos se se conferet. Porro patrem adibit ipsa semel in mense, insuper & singulis diebus solemnibus. Isti contra non ibunt visere ad mulierem nisi si subito quid ei contigerit, morbus, puerperium: nemo enim homo vi cogitur invitus alios ad se admittere. Rursus si viro dixerit uxor, nolim mater tua, soror tua ad me veniat, nec in una domo mecum habitent, quoniam mihi molestæ sint, importunæ, item obtemperabitur: Etenim societatem habitationis facere cum aliis vi quidem certè coercetur nemo.

XV. Porro si vir ait, in hac ego domo habitare nolo, quia vicini sunt impuri, protervi, ethnici, à quibus ego mihi metuo, mos ei geritur, ut etiam vicinorum protervitas explorata non sit. Id enim est Sapientium præceptum, *Ab impuro te vicino remove*. Itaque domus cum uxoris sit, nihilominus ex ea educitur, uti habitet cum hominibus ido-



neis. Quod idem uxor si dixerit, vir ei, quamvis hoc se nihil moveri profiteatur, obsequetur. Id enim habet ea dicere, nolo me hac vicinia infamem fieri.

XVI. Quidquid in terris habitatum est, in regiones describitur, ceu Chanaanam, Ægyptum, oram australem, Æthiopiam, terram Sennaar, & cætera: tum singulæ regiones urbibus sunt distinctæ, & vicis. Jam ad nuptias Israëlitis hominibus oppida ternis in regionibus erant, in Judæa, ac Galilæa, & trans Jordanem.

XVII. Si quis igitur duxerit uxorem ex alia regione atque ipse oriundam, hæc sequi virum in regionem suam cogitur: nisi forte malit sine donatione propter nuptias missa fieri. Nimirum hac ille conditione duxerat, etiamsi non nominatim esset dictum. Verum enim qui ex sua \* ipsius regione duxit uxorem, non licet huic in regionem extraneam abducere: rursusque licet in hac eadem regione vel oppido ex alio in aliud, vel in alium ex alio vicum: non item in vicum ex oppido, aut in oppidum è vico. Etenim habitatio rustica rebus aliis, aliis oppidana commodior est.

XVIII. Atque etiam in hac ipsa commigratione vel ex oppido in oppidum ejusdem regionis, vel in vicum è vico nunquam licet uxorem transferre, nec domicilium in deforme ex eleganti, neque porro in splendidum è sordido. Nam mulierem necesse est curare usque & eniti in eleganti habitatione, ut

\* Est in isto  
pronome  
mendum in  
editione 1574.  
in folio parvo.



ne levior aut deformior esse videatur. Neque porro licet deportare de loco, cuius sunt incolæ maximam partem Judæi, in eum, quem majori ex parte gentiles habitant. Atqui semper è contrario licet mulierem deportare de loco, quem majori ex parte gentiles habent, in eum quem Judæi maximam partem incolunt.

XIX. Sic est enim si, quando sedes alia cum alia commutatur, vel extra terram Israëliticam, vel intra sitæ sunt ambæ: at verò de domicilio extra terram Israëliticam posito in domicilium intra terram Israëliticam situm mulier demigrare cogitur, etiam in sordidum è lauto, vel ex frequenti Judæis loco in frequentem ethnicis. De terra autem Israëlítica in aliam nunquam deducitur, neque domicilium in amplum è vili, neque porro è frequenti gentilibus loco in frequentem Judæis.

XX. Uxor igitur, si viro refragetur hortanti, ut unà secum contendat in terram Israëliticam, missa fiet sine donatione propter nuptias: sin vir excludat uxorem eò cogitantem, appensa donatione propter nuptias amittet. Et cujusvis loci in terra Israëlítica siti eadem est ratio ad urbem Hierosolymæ. Nimirum quosvis in terram Israëliticam aliunde deportaris, non item inde aliò: & quoslibet Hierosolymam ex alio loco, non item aliò inde asportare fas est.





## CAPUT QUARTUM-DECIMUM.

I. **S**Tatum illud tempus, de quo in Lege commemoratur, pro suis cuique viribus finitur, & operibus: validis igitur, mollitiaque & luxu fluentibus, qui nec ullo se exercent in labore, quo vires debilitentur; sed otiosè domi vescuntur escis & potionibus, his nullo die non erit tempus statum. Opifices autem isti, sartores, textores, fabricatores, atque istorum similes, si suis in oppidis artem factitant, eorum erit tempus statum bis in hebdomada: semel autem, si in aliis. Atque asinariorum tempus statum est etiam semel in hebdomada: camelariorum semel in mense: naviculariorum semel intra menses sex. Jam de discipulis Sapientum, quoniam Legis studium item enervat, eorum etiam tempus statum erit semel in hebdomada. Itaque horum consuetudo est, ut ad quamque noctem sabbatinam cum uxore corpus misceant.

II. Omnino uxori est in manu, ut virum prohibeat ad mercaturam abire longius, ut ne tempore statò se defraudet: porro vir ab uxore, nisi data copia, discedat nunquam. Et virum uxor artem, cujus dies statì celerius, cum arte, cujus statì dies tardius veniunt, commutare prohibuerit: ut si quis cupiat fieri camelarius ex asinario, è camelario navicularius. At discipuli Sapientum Legis addif-



cendæ causa & sine facultate uxorum peregre abibunt in biennium, triennium. Item si quis ex homine molli & delicato factus sit discipulus Sapientum, hunc ob eandem causam peregre exire uxor non prohibeat.

III. Nec verò virum uxor impediat quominus insuper ducat uxores numero centum, seu simul unà, seu aliam post aliam, siquidem vir est is, qui harum unicuique victum & cultum sic, ut par est, suppeditare queat, & statim temporis officium persolvere. Atqui vir has omnes in una domo habitare simul, coercere non potest: sed enim suam cuique seorsum habitationem præbebit.

IV. Atque tempus statum pro mulierum numero describitur: ut si opifex uxores habeat duas, utrique semel in hebdomada tempus statum obtingat: si habeat uxores quatuor, singulis semel intra binas hebdomadas status dies obveniet: si verò navicularius uxores habeat quatuor, unicuique tempus statum semel intra biennium accidet. Qua de causa cautum à Sapientibus est, ne plures quatuor uxoribus duceret quisquam quamvis locuples, ut earum cuique tempus statum saltem in mense semel obveniret.

V. Si quis votum fecit, uxor ut sua cum aliis communicaret, quod ab ea sibi, vel à semet illi de re venerea jocosè & petulanter, ut fere fit à conjugibus, dictum erat, is uxorem amittet, repræsentabitque donationem propter nuptias. Si quis votum faceret, ut uxor inter concubitum moliretur opus

G iij



ideo, ut ne pragnans evaderet: & si quis votum faceret, uxor ut levem & dementem mulierem ageret, eodem modo amittat uxorem, numeretque donationem propter nuptias.

VI. Si quis vovisset à lecto geniali se cohibiturum uxorem totam hebdomadam, expectabitur: sin eo plus, vel uxorem amittat, repræsentetque donationem propter nuptias, vel voto se liberet, etiamsi navicularius sit, cujus tempus statum sexto quoque mense demum advenit. Vir enim ubi se voto obligavit, angitur uxor, & despondet. Si quis vovendo his uteretur verbis, uxor meo tibi concubitu sit interdictum: si jurasset se non commissurum, ut lecto jugali serviat, nequicquam vovisset, nequicquam juraret, quoniam uxori obnoxius sit. Sin autem ita diceret uxori, sit mihi tui concubitus interdictum voluptate, votum sanè ratum hominem prohiberet uxorem tangere: neque enim fas est quemquam esca sibi interdicta pasci.

Exod. 21, 11.

VII. Nefas est uxorem statò tempore defraudare. Id enim si quis uxoris vexandæ causa committat, is legem violet prohibentem; quæ est ita conscripta, *Victum, cultum, & tempus statum ei non detrahent.* Etenim qui valetudine sit infirma, vel ita languidus, ut omnino re venerea uti nequeat, is totos sex menses manebit, si forte convalescat, quo quidem spatio nec ullum tempus statum est longius. Porro nisi veniam impetret ab uxore



nuntium ei remittat, & donationem propter nuptias numeret.

VIII. Virum lecto geniali si prohibeat uxor, hæc videlicet contumax esse dicitur: itaque ex ipsa sciscitandum qua de causa viro repugnet: si est, ut dicat, iste mihi contempui est, nec adduci possum, ut voluntate cum eo rem habeam, ilicet vir ei nuntium remittere cogitur: neque enim uxor pro captiva habetur, quæ cum inviso sibi viro corpus misceat: verum nihil quidquam auferet donationis propter nuptias: auferet autem quidquid etiam extabit tritis è vasis suis, vel his quæ mancipio dederat viro, quorum ille præstat damnum, vel illis quæ viri sunt usu & fructu, quorum is adeo damnum nihil præstet. Nam de propriis viri bonis nihil quidquam auferet: immo verò crepidas, quibus induti pedes, & vittas quibus redimitum est caput, siquidem ei sunt à viro comparatæ, illas etiam exuet, reddet: porro quidquid à viro dono datum erat, reddat oportet. Neque enim hæc ei vir ideo dederat, ut à se discedens secum auferret.

IX. Si viro mulier in jugali ratione adversatur & repugnat, ut cruciet hominem, eaque prædicat, ego verò virum ita torqueo, quia id tantum de me meruit, quia me execratus est, quia mecum altercatus est, confessus iudicum mittet ei qui dicat, te scientem facio, si pergis adversa esse viro, donationis propter nuptias, si centum minæ fuerint, prorsus eas iri perditum: tum deinde

G iiij



per quatuor deinceps hebdomadas totas singulis diebus & in synagogis & in academiis ita prædicatur, *Mulier ista viro adversatur.*

X. Secundum istam prædicationem denuo mittitur à senatu monitor. Is dicit, edicit mulieri, tu si perstes in defectione, donationem illam propter nuptias perdas: tum verò nisi resipiscat adversatrix, initur consilium de coercenda muliere, atque omnino omni donatione propter nuptias multatur: verumtamen non remittitur ei repudium nisi vertente anno, quo interim spatio nihil alimenti vir ei suppeditet. Quæ si mortem oppetat ante, quàm renunciatum ei sit repudium, ejus ad virum venit hæreditas.

XI. Sic, sic agitur cum muliere adversante & repugnante vexandi viri causa, etiam dum mense, morbove laborat, cum ipsa ad rem veneream non sit apta, etiamsi vir naviculariam facit, cujus statum tempus sexto quoque mense demum veniat, etiamsi uxorem insuper habeat aliam.

XII. Et sponsa si ad præstitutum nuptiis diem sponso exhibendæ molestiæ causa nubere recusat, pro uxore in re venerea viro adversante habetur. Eodem modo agitur cum fratria, quæ similiter ad exhibendam molestiam nolit à leviro duci domum.

XIII. Hæc igitur adversatrix cum anno vertente discedat sine donatione propter nuptias, tum etiam viro restituit quæ ejus sunt omnia. De vasis autem quæ viro secum ipsa attulerat, & residuis horum fragmentis, hæc



neque mulieri, neque viro, si occuparit, adimuntur; nec verò si quid amisit ex hisce rebus, quarum damnum præstitit, quidquam mulieri dissolverit. Hæc est enim Talmudistarum de adversante muliere sententia.

XIV. Verum ab istis, qui Talmudis perfectionem sunt consecuti, \* magistris proditum est cum adversatrice muliere secus actum esse Babyloniorum suorum institutis & rationibus. Atqui nec ea majorem ad partem Judæorum pertinuerunt, & à multis magnisque viris passim oppugnantur. Atque decernendo Talmudis auctoritatem amplexari convenit.

\* Qui Hebræis  
Geonim dicuntur.

XV. Quod si vir officium jugale detrectat, nempe si profitetur uxori se victum & cultum esse præbiturum, non concubiturum cum ea, quippe quæ sibi sit odio, singulis hebdomadis mulieris donationi propter nuptias addetur argenti pondus id, quod sex & triginta æquat grana hordeacea: tum verò cum uxore habitet & illa se abstineat, quoad mulieri visum fuerit. Atenim quamvis mulieris donatio propter nuptias amplificetur, nihilominus à viro fit contra legem illam vetantem, *Ne detrahas*. Nam uxorem si quis habeat odio, amittere licet: vexare verò jus non est. Ecquid igitur causæ est, cur is, qui vetitum istuc facit irritum non coerceatur verberibus? Scilicet: quia nihil ab eo datur effectum.

Exod. 21. 11.

XVI. Jam si vir & uxor ad judices simul unà veniunt ambo: tum ille, mihi in jugali jure contumax est uxor; hæc contra, cum



hoc ego ex consuetudine communi consuesco: aut uxor ait, vir iste officium jugale detrectat; ille verò, non est ita, uxorem ego via ac ratione vulgari habeo; principio dirarum obnuntiatione perterretur is, qui jugali officio egressus iudici verum non confitetur: si nihil etiam dum confitetur, edicitur; ut testibus admissis in eundem locum se se concludant: quo facto si porro pertinaciam intendat alter alteri, cum eo, unde petitur, agitur precibus, atque ex æquo & bono pax inter eos conciliatur. Nam ante hominum oculos cum uxore virum corpus miscere non licet, nec ullius quidem in conspectu animantis.

XVII. Si in morbum incidat uxor, viro est tandiu curanda dum sanetur. Qui si morbum fore longinquum, atque adeo magnam jacturam faciendam prospiciens uxori dicat, tuam ego donationem propter nuptias jam nunc daturus sum, & te nisi inde curaveris, prorsus repudio; tum verò donationem repræsentet, & discedat, obtemperabitur illi quidem: verum sic facere minimè decet propter convictum humanum & societatem.

XVIII. Item viri est uxorem redimere captivam: qui si sacerdos sit, cui quidem capta uxore prorsus interdictum est, is cum eam redimat necesse est, tum etiam ad patrem reducat. Idem iste si habitet oppidum maximè diversum ab eo, unde sit uxor, curam ejus sustineat interea, dum eam restituit in patriam: tum repudium ei renuntiet, & donationem propter nuptias repræsentet totam. Sin ple-



beius sit, cui captiva uxore nihilominus uti licet, primum ei restituet uxoris, in quem acceperat, locum: tum postea nuntium remittet, & repræsentabit donationem propter nuptias.

XIX. Vir uxorem captivam redimere pluris quàm est, non cogitur: est autem ejusdem pretij, ac reliquæ captivæ mulieres. Jam si pretium id exuperet donationem propter nuptias, tamen non sit ejus vir audiendus cùm dicat, ego nuntium uxori remitto, donationem propter nuptias repræsentò, se ipsa redimat. Enimverò vir uxorem redimere vi cogitur invitus, etiamsi redemptionis pretium decuplo majus sit, quàm donatio propter nuptias, nec homini redemptione facta quidquam rei superet: sic enim habetur uxor captiva prima vice; sed si redempta denuo capta sit, tum verò licet vir ei nuntium remittat, & repræsentet donationem propter nuptias, unde se ipsa redimat.

XX. Hominis peregre versantis si capta sit uxor, judicum confessus ejus bona voci præconis subjicit, quorum pretio itidem, ut vir ipse præsens, captivam redimit.


XXI. Qui conjugem voto alligavit ejus generis, propter quod ei cogatur nuntium remittere, & repræsentare donationem propter nuptias; huic si post sancitum ejusmodi votum capta sit uxor, redimenda non est. Nimirum hunc, ex quo votum fecerat, repudium uxori remittere, & donationem propter nuptias pendere jus erat.



XXII. Si quis habet uxorem eam, qua sibi lege prohibente interdictum est, huic ea, si forte capta sit, redimenda non est: donatio propter nuptias erit pendenda, unde se ipsa redimat. Atenim sacerdoti similiter interdictum est uxore captiva, & nihilo secius redimenda. verò: nimirum ista non ante captivitatem; sed captivitatis ergo sacerdoti interdicatur.

XXIII. Porro viri est uxorem mortuam curare sepeliendam, iusta & lamentationes faciendas, ut regionis fert consuetudo. Vel pauperrimus Judæorum non minus binas tibias, & præficam unam adhibebit: divites autem pro sua quisque dignitate. Quod si viro dignitate præstet uxor, referantur iusta funeris ad dignitatem uxoris. Potest enim uxor per virum in altiore dignitatis gradum efferri, de jici de gradu ne mortua quidem potest.

XXIV. Si vir esset is, qui nihil ad humanam uxorem suppeditare voluisset: atque sua sponte homo alienus sepulturæ sumptum suggereret, per vim à viro sumptus hic exigatur, ne usu veniat, ut extincta conjux canibus objiciatur. Itaque viro peregre versanti si moriatur uxor, illius bona confessus iudicum occupat & divendit, ne præcone quidem adhibito: & idem mulieris sepulturam procurabit, quam referet ad viri facultates, item & ad dignitatem seu viri seu fœminæ.





## CAPUT DECIMUM ET QUINTUM.

I. **U**Xor si secundum nuptias viro concessit, ut tempus statum omitteret, faciat licet; illi videlicet qui jam habet ex uxore liberos, quippe cum præcepto isti, *Crescite & multiplicamini*, fecerit satis. Qui si nullos suscepit liberos oportet tempus statum tamdiu observet, dum liberos ex uxore procreavit: id enim jubendo Lex sancit, in qua dicitur, *Crescite & multiplicamini*.

Gen. 1. 28.

II. Atqui propagatio generis viro præcepta est; non item mulieri: sed qua tandem ætate virum præceptum id tenet? ut decimum & septimum attingit ætatis annum. Atque ut exegit annum ætatis vicesimum, necdum uxorem duxit, lineam transiit, iustum id irritum fecit. Quem autem divinæ Legis intelligentiæ ac cognitioni egregiè applicatum ab re uxoria deterreat timor, ne si quærat uxori quæ ad vitam suppeditant, avertatur à Legis studio, omnino licet huic conjugium retardare: ut enim præceptum ad unum exequendum intentus cunctis aliis solvitur, sic etiam multo magis Legis \* studio deditus.

\* Sic enim statuunt Judæi nihil ex omni cultu Dei sanctius esse studio Legis.

III. Jam si quis tanquam Azai filius Legis studio oblectatur usque, is si se ad percipiendam Legem penitus applicat, uxorem omnino nunquam ducit, extra noxiam est; modò hic idem libidinem habeat domitam: quæ libido si stimulat & pungit hominem, uxorem



ducat necesse est, quantumvis liberos jam procrearit; quippe qui cælebs fortassis in cogitationes obscænas incidat & turpes.

Gen. I. 28.

IV. Hoc igitur præcepto functus sit quisque cum primum ei gemina proles puër & puëlla nati sint, ea re; quia scriptum legitur, *Masculum & fæminam creavit eos*. Cui verò filius existit eunuchus, filiave sterilis, is necdum est præcepto isto defunctus.

V. Si quis prolem istam sibi natam extulerit, eamque relinquentem liberos sibi superstitēs, is itidem præcepto functus fuerit, quippe quod nepotes filiorum loco ducuntur. Sic est enim si quis habeat nepotes puërum & puëllam, & eosdem è filio & filia: is enim præcepto functus sit, etsi puer è filia, ex filio puëlla nata est, siquidem è prole gemina sint oriundi: verum si quis filium & filiam extulerit, quorum alteruter puërum & puëllam reliquit superstitem, is necdum propagationis est præcepto defunctus.

VI. Si quis liberos procreavit ethnicus, atque religionem puram suscepit ipse simul & liberi, omnino hoc præcepto functus est: si quis autem liberos suscepit servus, atque unà cum liberis manumissus est, præcepto hoc non fuerit defunctus usque dum liberos procrearit liber: nimirum servi omnino genus est nullum.

VII. Sterilem, anum, ad gignendum inhabilem, natu minorem, quàm ut gignere possit, uxorem duxerit nemo, nisi propagationis præcepto defunctus sit, aut eodem tem-



pore uxorem habeat & aliam, ex qua liberos procreat. Quæ cum viro decem ipsos egit annos uxor, nec peperit, huic vir donationem propter nuptias pendat, atque nuntium remittat, aut aliam insuper ducat, quæ liberos procreat. Quod si nolit, coercetur, fustibus mulatur usque, dum uxorem amittat. Nec est, quod dicat, unâ cum muliere confidam, testesque faciam me nunquam futurum esse cum sola solum: non mulieri ita dicenti obtemperatur; non viro: verum enim uxorem missam faciet, aut insuper & aliam ducet, quæ ad pariendum sit habilis.

VIII. Uxor si cum viro, cui semen exiliendo celeritatem erumpentis è nervo sagittæ imitatur, exegit decem annos totos, nec peperit, utique vitium in ipsa residet. Itaque discedenti fors donationis propter nuptias non dissolvitur: dissolvitur autem accessio, quippe cum mulier ista non pejore sit conditione, quam uxor ad gignendum inhabilis, quam vir non nimis observaverat, cui quidem accessio donationis propter nuptias penditur sic, ut inferius disputabimus. Est verò vitium viri solius, ex quo semen exiliens non emissæ sagittæ pernicitatem assequitur & æquat, qui propterea uxori nuntium remittet, & donationis propter nuptias pendet sortem & accessionem.

IX. Si vir in uxorem, uxor in virum gignendi conferat impedimentum, & hæc causam adferat istam, quia semen è viro non ita perneciter, ut ex arcu sagitta erumpit, uxori



fides habetur. Atqui viro hoc solum tribuitur, ut generaliter diras denunciandas curet, si quis intendant id, quod non satis sciat: tum verò donationem propter nuptias uxori persolveret. Quæ si dixerit uxor, incerta sum utrum per me, an per virum stet, quominus liberi procreentur, fors ei donationis propter nuptias sic, ut supra posuimus, non pendatur: argentum enim possessori interea manet, dum uxor exiliens è viro semen neget erumpentis è nervo sagittæ celeritatem imitari: Quid verò? Quid tandem causæ est, cur uxori de hac quæstione credatur? Quia enim utrum è viro semen erumpat ita celeriter, ut ex arcu sagitta, sentit uxor; vir non item.

X. Mulier si petit à viro, ut quoniam secum spatium decem annorum confedit, neque tamen procreavit liberos, repudium sibi remittat, utique mos ei gerendus sit: cui si propagatio generis præcepta non est, at certè est, quod expetat liberos, qui præsidio sint sibi ætate confectæ. Vir igitur repudium ei renuntiare cogitur, & pendere quidem sortem donationis propter nuptias; non item accessionem, quam quidem certè mulieri non perscripserat eò, ut sua voluntate discedens secum auferret.

XI. Quod si vir intra spatium id temporis ad mercatum abierit, tum si vir aut mulier aliquamdiu ægrotaverit, si constricti vinculis fuerint, tempus illud totum de hoc annorum numero est deducendum.

XII. Mulier si facit abortum, ab abortionem



trone repetetur hujus spatij initium. Quæ si mulier semel atque iterum ac tertio abortivit, porro nihil addubatur, quin ea abortum sit passura perpetuo. Ac viro concessum fortasse non est ut liberos ex ea suscipiat. Itaque nuntium uxori remittet, penderque donationem propter nuptias.

XIII. Quod si vir ea mente, ut resideat unâ cum uxore, uxorem ait intra hos decem annos abortum fecisse, negat uxor, uxori creditur. Sic enim existimatur uxorem non esse eam, quæ se ipsa \* sterilem esse falso affirmet. Nam si vir factos abortus binos, ternos ait uxor, item uxori creditur, eandem ob causam videlicet, quia credibile non est mulierem adduci posse, ut vanam abortionis perpetuæ famam sibi ipsa inurat: repudium igitur uxori vir renuntiet, pendatque donationem propter nuptias. Attamen ab ea jusjurandum illud à Sapientibus conditum exegerit in utrumque se seu nunquam, seu ter abortuisse; quippe quod intendenti vir donationem propter nuptias exolvat necesse est.

\* Quippe quod  
Judæis quidem  
probro  
est.

XIV. Primùm igitur cum viro nupta mulier, atque annos decem apud ipsum commorata, nec unquam enixa, si repudietur, alteri nubat licet: quicum si rursus decem annos confedit, neque peperit, non nubat tertio. Si nupserit, vir eam missam faciat sine donatione propter nuptias, nisi hic idem uxorem insuper & aliam habeat, aut propagationis fuerit præcepto defunctus.

XV. Atque mulier ad judices si dixerit,

H



vir meus non potest uxori, ut fere fit, navare operam, qua quidem procreentur liberi, non genitale semen ex eo sic, tanquam ex arcu sagitta, exilit, iudices gratiæ componendæ causa sic agant cum muliere, vide, fac virum tolere ad decem annorum spatium, tum verò nisi pepereris in jus voca. Id enim illi auctores sunt: verum cum viro confidere nec invita vi cogitur, neque porro pro contumaci habeatur; sed rem differre non desistant usque dum eos redigant in gratiam.

XVI. Hoc propagationis præcepto jam defunctis etiam præscriptum est à Sapientibus, ut quoad per vires corporis liceat liberis dent operam, ea re, quia auxisse populum Israëliticum homine vel uno nihilo minus est, quam mundum universum constituisse. Idem vetarunt etiam sine uxore solum esse virum, ut cogitationibus obscænis ne det locum: & solitariam sine viro domi sedere mulierem, ut ne veniat in suspicionem.

XVII. Atque uxoris suæ quemque zelo teneri convenit: dictum est à Sapientibus nisi divino quodam spiritu afflatum zelotem uxoris esse neminem. Etenim vir ne committat, ut plus satis zelotypus sit, neu per vim comprimat invitam: sed cavillando jocando se volenti jungat.

XVIII. Mulieri verò præscriptum est à Sapientibus, ut domi verecunda sit, in conspectu viri cachinno se & petulantia abstineat: tum ne verbo petat à viro, ut officio geniali



satisfaciat, neu de hoc genere toto sermone-  
nem habeat : neu ab complexu viri se sub-  
trahat, ut cupidum illius animum incendat  
inopia ; sed quovis tempore cupienti se se  
tradat : tum ut sibi caveat à viri propinquis,  
& hominibus domesticis, ne forte usu ve-  
niat, ut in animum viri penetret aliqua zeli  
aspiratio : ad extremum ut quàm diligentissi-  
mè possit declinet non turpitudinem modò  
omnem ; sed etiam id quod ad turpitudinis  
similitudinem proximè accedere videatur.

XIX. Porro caverunt etiam Sapientes,  
vir ut plus honoris uxori quàm sibi ipse ha-  
beat, ac quàm sui, tam conjugis sit amans.  
Qui si divitiis abundet, conjugì pro faculta-  
tibus gratificetur : nec terrorem incutiat plus  
fatis : leniter ei loquatur, nec se se morosum  
præbeat, aut iracundum.

XX. Similiter à Sapientibus sancitum est,  
uxor uti virum observet majorem in modum,  
& vereatur : nihil agat injussu illius : sit ei  
ducis instar, atque regis, cui quæ cordi sunt  
expetat ; vitet autem quæ sunt odio. Nam  
hæc est sanctorum ac castorum via & ratio  
Israëlitarum mulierum atque virorum con-  
nubio junctorum, atque hoc demum pacto  
decora commoratio conjugum efficitur &  
laudabilis.





## CAPUT DECIMUM ET SEXTUM.

I. **Q**Uæcunque tum portantur ab uxore, cum ducitur, seu prædia, seu res mobiles, seu servi, ea si perscripta sint in instrumento dotali, non donatio propter nuptias, sed dos appellantur. Quæ dos venit in potestatem viri, siquidem promisit infecti damni, ut imminuatur ipsi, & amplificetur. Atque hæc illa sunt bona, quæ \* perpetua dicuntur. Si non promisit infecti damni, dos in potestate mulieris erit eatenus, ut ipsi minuatur & accrescat. Nimirum hæc sunt illa bona caduca, quæ vocantur.

\* Erat hæc olim Hebræorum consuetudo, ut ad tempus constitutum pecus suum pastorum potestati permitterent ea lege, ut ex eo fructus interea loci caperent omnes, & si quid ex eodem perderetur, subriperetur, periret, periret non domino, sed pastori, qui ad prædictam diem gregem restituebat sic, ut conveniret numerus. Inde factum, ut huiusmodi grex diceretur *pecus ferreum*: quia enim sic tanquam ferrum statu semper eodem, domino quidem certè, manebat. Et quidquid dotis viro defert uxor, fundos, res mobiles, servos, ancillas, pecus, ex eo, sicut ex superioribus disputationibus cognoscere licet, vir item fructus omnino percipit omnes, quoad mulieri vita suppetat: ea verò bona dotalia cum in litteris illis nuptialibus consignarentur, & vir promitteret infecti damni, tum si quid ex his amittatur, subripiatur, aut quoquo modo pereat, vir uxori damnum præstet si eveniat discessio: & si vir uxorem relinquat superstitem, viri videlicet hæc res damnum eidem præstiterint. Hæc igitur bona dotalia Hebræis translatò per similitudinem verbo dicta sunt item, *pecus ferreum*. Nam bona dotalia, quorum vir non promisit infecti damni, item & universa bona mulieris, quæ in litteris nuptialibus perscripta non sunt, iisdem Hebræis *glabra* dicuntur. Nimirum istorum vir non modo fructus capiebat, sed res ipsas ita rodebat, radebat, & quasi glabrabat, ut interdum penitus absumeret: tum verò si quid eorum deperderetur, interiret, uxori damnum non præstabat. Nos autem vel interpretando orationem ad translatorum legem istam direximus. *Sed ea transferri oportet, quæ clariorem faciunt rem*: Itaque superiora bonorum genera, quoniam mulieri incorrupta manent usque, certa, stabilia, perpetua: contra verò posteriora caduca, fluxa, fragilia diximus, verbis scilicet immutatis, sed & ad latinam consuetudinem magis aptis, & quidem certe minus duris, minusque longè ductis: Nempe meminimus & alteram translatorum verborum regulam: *Deinde videndum est, ne longe simile sit ductum*.



II. Item quæ nec ad virum bona detulit uxor, nec in instrumento dotali perscripsit, seu quia sibi ipsa reservavit, seu quia jam sponsæ hæreditate obvenerunt, aut dono sunt data, ea itidem bona caduca nuncupantur, & in potestate mulieris sunt omnia. Nec quidquam aliud donatio propter nuptias dicitur, quam centum illi denarii fortis aut ducenti, atque id quod his ultro additur.

III. Uxori donationem propter nuptias à Sapiëntibus esse decretam ante commemoravimus, & eandem additamenti esse rationem, quam & fortis. Nec verò constitutum est, ut donationem illam uxor quo libuerit tempore auferret: pro debito habetur, quod sit in diem. Nam donatio propter nuptias uxori non ante solvitur, quam vir mortem oppetierit, uxoriq; nuntium remiserit. Præterea institutum est à Sapiëntibus, ut si viro fundus sit & optimus, & pessimus, & inter utrumque intermedius, tum uxor de fundo donationem propter nuptias ablatum veniat, non absolvatur nisi de fundo pessimo: hoc enim est quod à Talmudis scriptoribus *Ziburit* appellatur.

IV. Item constituerunt, ut si post interitum viri mulier donationem propter nuptias petat, non absolveretur ante quam apprehenso Legis volumine omnium maxime scilicet optabili dejeret nihil à viro intervertisse, ad seque transtulisse: viro donationem propter nuptias nec vendidisse, neque condonasse: tum etiam quibus est ipsa vestita vesti-

H iij



bus, earum est habenda æstimatio, & pecuniæ summa de donatione propter nuptias deducenda. Nam vir si voluntate sua remittat nuntium mulieri, donatio propter nuptias utique numerabitur nec ullo exacto jurejurando, neque habita ratione vestium, quibus sit vestita; quippe quia & hæc ei sunt empta, & facta propria, & vir ultro mulierem amittit, non à muliere discidium existit.

V. Porro constituerunt, ut mulieri viduæ donatio propter nuptias ne solveretur nisi de fundo; ne si bona viri post mortem meliorescerent, ex illa bonitatis accessione donatio propter nuptias dissolveretur; ne puellæ à morte patris si bona cesserint in melius, ex illo meliori tolerarentur: rursus ne vidua mulier nomine donationis propter nuptias ab eo qui emptas ab ipsius viro possessiones meliores effecisset, melius illud itidem, ut reliqui debitores recuperaret. Atque istæ quidem donationis propter nuptias conditiones faciliores sunt.

VI. Facilior & illa, quod uxori pro donatione propter nuptias detur argentum minus: ut si quis uxorem loco in alio duxisset, amitteret in alio, tum argentum sit deterius ubi discessio, quàm ubi factæ nuptiæ, pendat ejus, in quo facta discessio, loci argentum: contrâque si præstantius fuerit argentum ubi discidium evenit, quàm ubi nuptiæ factæ fuerant. Sic enim se res habet, si in instrumento nuptiali fuerat argentum simpliciter perscriptum: verùm si argentum certo quo-



dam modo signatum nominatim dictum est, donationis propter nuptias tam sortis quàm additamenti eadem ratio, quæ sit argenti mutuo dati, quod si datum est certa ratione signatum, eadem ratione reddendum, sic, ut tractatu de mutuo disputabitur.

VII. Constituerunt autem omnino omnium accademiarum principes, ut quomodo creditori debitum, item post viri mortem uxori donatio propter nuptias etiam de re mobili solveretur. Quod quidem institutum multo maximus Judæorum numerus amplexus est. Jam cæterarum, quæ sunt in instrumento dotali adscriptæ, stipulationum eadem est ratio, quæ donationis propter nuptias: omnibus in fundo juxta, atque in re mobili locus. De filiis autem ad quos perveniat matris hæreditas non omnium invenitur accademiarum esse conveniens constansque consuetudo. Quocirca mihi quidem ita videtur, ex sententia Talmudica statuendum esse: ut si matris donatio propter nuptias ad filios hæreditate veniat, hi nisi de fundo non absolvantur.

VIII. Jam verò cunctis in locis quæ vel vidimus, vel auditione & fama accepimus, mos incescit ut in perscriptione dotali pro donatione propter nuptias nominatim oppigneretur fundus æque ac res mobilis. Omnino præclarum est hoc institutum, quod à magnis & intelligentibus viris usurpatum est. Nam pactum istud in re pecuniæ sit: ergo vidua mulier non ex instituto neotericorum, sed ex pacto absolvitur.

H iiij



IX. A quo autem id in dotalibus litteris perscriptum non est, uxor est incautè ducta, ut si vir iste cùm in matrimonium duceret uxorem, magistrorum illud institutum non ignoraret, uxor donationem propter nuptias etiam de re mobili auferret: si aut ignoraret, aut addubitetur ignoraret, an non, de re tota diu & multum consultabitur: neque enim magistrorum instituti ea vis est, ut si nihil sit dictum nominatim, propter illud tamen item, ut propter dotales illas condiciones, quæ sunt à majori illo senatu institutæ, pecuniam ab hæredibus exigamus.

X. Præterea autem constituere Sapientes, ut universa viri bona forent donationis propter nuptias pignus ac cautio: ut pro donationis propter nuptias omnino centum denariis fundus aureorum mille totus oppigneretur. Et quidquid de bonis suis vir vendidit à nuptiis, ut sit rata venditio, atque etiam viro omnia quæ possidet liceat divendere bona, uxor, tamen si repudium ei vir renuntiet, aut morte occumbat, pro donatione propter nuptias abripiet ab emptoribus, siquidem ea, quæ nemini sint emancipata, bona reperire non licet. Quæ cùm ab emptoribus abripiet apprehenso Legis volumine quàm optabili iusjurandum dabit sic, ut fere creditores omnes facere jus est. Atque institutum illud eò spectat, ut uxoris donatio propter nuptias ne viro momenti levioris esse videatur.

XI. Jam sacramentum illud, quo vidua mulier, cùm donationem propter nuptias



ablatum veniat, adigitur aut ab iudicibus, aut ab hæredibus, illud nisi extra iudicium non dicitur. Nimirum iudicum confessus deterreretur ab accipiendo à muliere iurejurando propterea quia veretur, ut de sacramento dicendo magno laboret opere mulier: atque ut pupilli mulierem antequam donationem propter nuptias auferat voto quolibet obligent etiam in conspectu iudicum licet.

XII. Jam si vidua mulier è vita decessit ante, quàm iusjurandum daret, nihil perveniet de donatione propter nuptias ejus ad hæredes: etenim donatio propter nuptias mulieri ante, quàm sacramentum dixit, nulla debetur. Quæ si ante sacramentum dictum connubio se viro junxit, post nuptias etiam iusjurandum dabit, & quando libuerit donationem propter nuptias auferet: non item votum nuncupabit uti donationem propter nuptias auferat, quippe quod viro licet irritum facere.

XIII. Si quis uxori pro donatione propter nuptias certum quendam agrum assignavit seu termino ex uno, seu ex quatuor, hæc inde donationem propter nuptias auferet nec ullo dato iurejurando: item si quis certa quædam supellectilia perscripserit uxori pro donatione propter nuptias, cum eadem ipsa siquidem servata sint uxor auferet sine sacramento, tum verò si pretio istorum altera parata sunt, si modò constet illa altera superiorum esse pretio empta, nullo dicto sacramento auferet.



XIV. Quæ delibavit donationem propter nuptias, ea porro, nisi iusjurandum dederit, non absolvetur. Ut si mulier dotales litteras proferat, in quibus ei sint drachmæ perscriptæ mille, quas vir ait omnino dissolutas, illa partim solutas, partim etiam debitas, residuum illud, nisi sacramentum dicat, non acceperit, ut de accepta parte testes fecerit, ut etiam bene subducta ratione eorum, quæ unciatim accepit, summam fecerit.

XV. Vir si donationem propter nuptias à muliere totam ait acceptam esse, illa se negat accepisse quidquam, atque testis est unus donationem propter nuptias uxori persolutam esse aut ex toto, aut ex parte, omnino donatio propter nuptias ei nisi intercedente iurejurando non dissolvitur.

XVI. Atque etiam absente viro donatio propter nuptias non solvitur mulieri, nisi cum iuraverit: ut si quis repudium uxori renuntiavit, discessit, iudices invadunt ejus bona, qui mulieri persolvant donationem propter nuptias statim, atque iusjurandum dederit: nempe vir si concessit in regionem ita longinquam, vix ut eum iudices rei certorem facere queant. Nam si propius absit, mittitur, qui rem homini nuntiet: tum verò nisi revertatur, mulier iusjurandum dederit, donationem propter nuptias abstulerit.

XVII. Mulier si donationem propter nuptias imminuit, sine sacramento absolvitur: ut si dotales litteras attulerit, in quibus ei drachmæ sint perscriptæ mille, vir aiat, acce-



pit totum quantum est, neget ipsa se accepisse quidquam, & addat omnino donationis suæ propter nuptias drachmas esse quingentas: quod autem mille sint drachmæ perscriptæ, id bona fide inter se comparatum esse, sine sacramento absolvatur. Nam si mulier ita dicat, at in litteris dotalibus meis omnino quingentæ mihi drachmæ perscriptæ sunt, ex hac singrapha mille drachmarum, nihil illi pendetur, quippe quam mulier ipsa nullam efficiat. At enim conceptum illud jusjurandum vir jurabit, & liber erit.

XVIII. Atque ubi commemoravimus nihil mulieri persolvi, nisi cum jusjurandum dederit, hinc cum ea confessus judicum ita loquitur, jura & absolveris: & ubi posuimus mulierem sine sacramento absolvendam esse, ibi viro judices ita dicunt, absolve uxorem, non creditur quod intendas, nisi rationibus confirmaveris.

XIX. Quod si vir sponte sua postulat, uxor ut sacramento refellat quod intenditur, item cum uxore judices ita loquuntur, jura; absolvere, & apprehenso Legis volumine perquam expetendo jusjurandum dederit. Vir enim si pacisceretur ut uxor sine sacramento donationem propter nuptias auferret, aut quidquid ab illa intenderetur, ei rei fides esset, omnino à viro sine jurejurando mulier absolvitur: non absolveretur autem ab hujus hæredibus nisi jusjurandum dederit.

XX. Si verò cum uxore constitutum esset, ut sine sacramento donationem propter nu-



ptias etiam ab hæredibus auferret, & quid-  
quid contra hos ab ea intenderetur, habe-  
retur ei fides, & ab hæredibus quoque sine  
jurejurando absolveretur: non item bona viri  
vendita sine sacramento ad se retraheret, si  
vir illi credi voluit. Nam conventio viri si  
valet in ipsum & ejus hæredes, at certè ad  
rem alienam perdendam non valet.

XXI. Vidua mulier si perscriptionem do-  
talem proferat, dato jurejurando donatio-  
nem propter nuptias vel centum post annis  
accipiet usque. Nec quidquam interest, utrum  
in domo viri remanserit, an se receperit ad  
patrem. Sin perscriptionem dotalem exhi-  
beat nullam, nihil obtineat ne sortem qui-  
dem donationis propter nuptias, ut illam  
poscat eodem ipso die, quo vir à vita disce-  
dat. Eadem ratione & mulier repudio amissa  
ne sortem quidem donationis propter nuptias  
acceperit usque dum litteras illas dotales ex-  
hibeat.

XXII. Sic se res habet ubi donationem  
illam propter nuptias perscribere moris est.  
Quod cum non est in more positum, sed ju-  
dicum illa stipulatione confiditur, hic si nul-  
lam habeat perscriptionem dotalem, tamen  
sortem donationis propter nuptias accipiat,  
& repudio amissa, & vidua mulier: nec verò  
refert ad virum, an ad patrem sit. Verùm  
accessionem donationis propter nuptias nisi  
rationibus evidentibus probarit, nusquam  
obtinuerit.

XXIII. Quod igitur ad tempus vidua



mulier accipiet sortem donationis propter nuptias ubi perscriptio dotalis fieri nulla soleat? Nempe si resideat in domo viri, vel in perpetuum acceperit: sin ad patrem recesserit, ad annum ab obitu viri quintum & vicesimum. Posthac si quid petat, nihil obtineat; quia enim si donationem propter nuptias non condonasset, tamdiu non sileret: neque enim est, quod dicat donationem propter nuptias ego ab hæredibus unas ædes mecum habitantibus petere erubesceram, siquidem cum hæredibus non commoraretur.

XXIV. Hæres igitur ipse si mulieri cibaria portavit in domum patris, ac consuluit rationibus ejus & prospexit, post quintum & vicesimum annum etiam jus erit mulierem exigere donationem propter nuptias: hæc enim quod conticens erat, nec exigebat donationem propter nuptias, isthæc causa fuit & ratio, quia pudebat eam hæredis.

XXV. Uxor cum ait se viro nupsisse virginem, ac propterea donationis suæ propter nuptias esse denarios ducentos, vir contra vel ejus hæres dicat ductam esse mulierem, nec donationis illius amplius esse denarios centum; si est, ut sint testes, qui viderint huic nubenti parari, quæ nubenti virgini solent ad ejus urbis incolas, certa quædam genera lætitiæ, coronæ, vestis, aliarumque rerum, quibus solæ nuptiæ virginum decorantur, ducentos accipiet donationis propter nuptias denarios. Si nulli fuerint testes, omnino donationis propter nuptias centum denarios



accipiet. Quod si vir agat, mulieri est in manu, ut ab eo, quoniam petitionis partem ipse confitetur, iusjurandum à Lege perscriptum exigat. Etenim fides habetur homini adolescenti, qui ita dicat, memini me puero cum hac nubente sic tanquam cum virgine agi. Quæ quidem omnia ea ratione statuuntur, ubi litteræ dotales perscribuntur nullæ, sic, ut ante posui.

XXVI. Mulier si viro præsentis præsens dixerit, tu mihi remisisti nuntium, fides ei habeatur: neque enim coram viro mulier impudenter agit. Itaque mulier si proferat non repudij libellum; sed perscriptionem dotalem, & eadem viro præsentis dicat, tu mihi repudium remisisti, libellum amisi, donationem propter nuptias repræsentata; vir contra, non ego renuntiavi repudium, omnino sortem donationis propter nuptias virum mulieri persolvere jus est: verum accessio dissolvenda non erit, nisi mulier repudium esse remissum probarit, aut repudij libellum unà cum perscriptione dotali protulerit.

XXVII. Quod si cum muliere vir ita agat, sic est, repudium ego renuntiavi, prorsusque persolvi donationem propter nuptias, sortem & accessionem, rescripsit apocham, amisi, viro quando repudij inficiatione potuit accessione donationis propter nuptias se liberare, fides habetur eatenus, ut mulierem adigat sacramento, illo videlicet, quod apprehenso volumine Legis perquam expetendo dicitur, & donationis propter nuptias sortem



dissolvat : tum ipse in accessionem conceptum illud iusjurandum juret.

XXVIII. Mulieri cum apporet divortij litteras, nec ullam dotalem perscriptionem proferat, si loci consuetudo est, ut litteræ dotales nullæ perscribantur, his quas proferat divortij litteras omnino obtineat sortem donationis propter nuptias. Quod si dotale instrumentum assolet ibi loci perscribi, mulier nisi perscriptionem dotalem protulerit, ne sortem quidem donationis propter nuptias obtineat, sic, ut ante differuimus. Atenim vir in intensionem mulieris conceptum illud iusjurandum dabit, & liberabitur.

XXIX. Mulier si binos repudij libellos, binasque litteras dotales protulerit, donationes propter nuptias acceperit duas. Eadem si litteras dotales proferat duas, unum repudij libellum, donationem propter nuptias accipiet non amplius unam. Sed utram harum? Nempe si perscriptiones dotales sint inter se pares, posteriori sit irrita superior: ut postea quam posterior facta fuit duntaxat divendita viri bona mulier ad se retrahat. Sin autem in una, quam in altera plus sit donationis perscriptum, optio mulieri datur eligendi quam velit, atque altera sit irrita.

XXX. Mulier si proferat libellos repudij duos, unam perscriptionem dotalem, non accipiat plus una donatione propter nuptias: quippe cum uxor amissa reducitur, nec ulla instituta conditione, per superiorem illam perscriptionem dotalem reducitur. Quæ post



interitum mariti proferat & perscriptionem dotalem, & divortij litteras, si perscriptioni dotali litteræ divortij antecessere, primum his mulier auferet sortem donationis propter nuptias, ubi loci perscriptio dotalis fieri non solet: tum deinde quidquid in perscriptione illa dotali dictum est, quod quidem interitu mariti obtinuit: sin autem divortij litteris antecessit perscriptio dotalis, mulier non auferet plus una donatione propter nuptias; quippe cum superiori perscriptione dotali reducta fuerit.

XXXI. Mulieri virum suum à vita discessisse prædicanti eò, ut rursus nubere queat, credendum est, quemadmodum tractatu de divortiis copiosè explicabitur: atque hæc quidem est una è stipulationibus dotalibus, ut si secundum interitum mariti mulier alteri nupserit, auferat à superiore quidquid donationis propter nuptias ei perscripserat in litteris nuptialibus. Itaque mulier si adisset iudices ita prædicans, vir ille meus morte obiit, vos mihi date licentiam nubendi alteri, de donatione propter nuptias nequaquam meminisset; cum nubendi copia daretur; tum etiam exacto iurejurando dissolveretur ei donatio propter nuptias. Sin iudices adisset, atque ita diceret, vir meus vita excessit, vos mihi donationem propter nuptias persolvite, ne hoc quidem illi concederetur, ut alteri nuberet. Nimirum istam ob donationem propter nuptias venisse, virum autem etiamnum in vivis esse crederetur: nec esse nubendi consilium mulieri,



mulieri, sed accipiendæ donationis propter nuptias vivente viro. Sin mulier venisset ad iudices, atque ita diceret, vixit vir meus, vos mihi nubendi copiam date, solvite donationem propter nuptias, & nubendi licentia permetteretur, & donatio propter nuptias ei dependeretur, quippe cujus postulatio præcipuè pertineat ad nuptias: sin venisset ad iudices, atque ita diceret, vos mihi donationem propter nuptias pendite, item & permittite licentiam nubendi, hoc illi permetteretur, non daretur illud: quanquam si donationem propter nuptias accepisset, porro ab ea non exigeretur.

---

CAPUT DECIMUM ET SEPTIMUM.

I. **U**bi vir extinguitur is, cui plures in matrimonium collocarentur mulieres, ibi donationem propter nuptias auferat ex ordine collocationis alia prior alia, nec ulla sine iurejurando. Itaque postremæ nihil erit aliud quàm quod à proximè superiore relictum fuit; quod ipsum dato iurejurando demum auferet. Vel æris alieni tabulæ cùm proferantur, simul unâ litteræ dotales, siquidem vir haberet æs alienum priùs, quam uxorem, creditor priùs absolvatur, quàm uxor: sin litteræ dotales tempore superiores sint, primùm donatio propter nuptias uxori dissolvatur: tum si quid superet, creditori dependeretur.



II. Sic se res habet, si cū duceretur uxor, aut argentum mutuū sumeretur, jam tū emptus esset fundus hic, unde suū quisque debitum jam nunc receptum veniunt: omnino hīc æqui & boni ratio postulat, ut cuius tabulæ sint prius factæ, is itidem viri fundum primus obtineat: si quis autem multas deinceps duceret uxores, & idem seu post seu ante nuptias pecuniam mutuam acciperet, ac postea demum mercatus esset agrum, hic verò omnibus distribueretur æqualiter; quia enim simul una pignori opponeretur ager omnibus. Nam homo cū agrum mercaretur, jam tū erat omnibus obligatus: nullus igitur hīc esset antecedendi locus.

III. Eadem ratione ubi litteræ dotales & tabulæ datæ sint ad eandem diem & horam, (adscribuntur enim & horæ quibusdam locis) æquabilis erit facienda partitio, neque dabitur antecedendi locus. De rebus autem mobilibus si præoccupatum est tantum, quanta sit donationis propter nuptias, aut debiti summa, nemini adimitur unquam: neque enim mobilibus in rebus antecedendi locus est.

IV. Cū uxori nuntium remisit, qui idem debeat per tabulas, tū si cum uxore pariter debiti admoneat creditor, sitque debitori pecunia juxta, atque fundus, quanta sit summa donationis propter nuptias, & debiti, pecuniam auferet creditor, & uxori dissolvetur de fundo donatio propter nuptias. Sin autem fundum modo debitor habeat eum, unde non possit ambobus fieri satis, neque porro jus



antecedendi fuerit, prorsus absolvetur creditor : mulier autem si quid reliquum fuerit, accipiet : sin minus, hanc verum est creditori concedere. Namque creditor in expensa pecunia jacturam faciat ; mulier verò omnino nullam, quia enim vir est conjugij sanè quàm appetens, mulier etiam multò magis.

V. Eodem modo si vir mortuus uxorem liquit ac creditorem, & idem omnino fundum unum, in quo non sit antecedendi locus, item creditori, uxore posthabita, primo dissolvatur nomen totum.

VI. Nunc igitur quoniam magistri illi constituere, ut de re mobili uxori æque, ac creditori dissolvatur, idque liquet, juri antecedendi non esse locum in re mobili, consentaneum est ; ut si vir mortuus rem mobilem reliquerit, quæ non suppetat ad absolvendum creditorem simul & uxorem, primo nomen illius expediatur totum : postea si reliquum fuerit quod pro donatione propter nuptias jus est uxorem sumere,umat : si non, cedat.

VII. Si in instrumento dotali perscripta sunt bona illa perpetua, & hæc eadem à viro amissa sumpta intendit mulier, eo nomine quidem certè creditorum in numero ducetur. Dabit igitur jusjurandum neque id se intervertisse, neque viro dedisse, neque porrò condonasse ; tum verò viri bona partietur unà cum creditoribus cæteris.

VIII. Pluribus jugatus uxoribus si mortem occumbit, si omnes amittit, nec habet, unde donationes propter nuptias omnino sol-



vat omnes, neque sit antecedendi juri locus, de partiendi ratione videndum erit. Si est, ut viri bonis pro uxoribus numero divisus omnium minime donata omnino obtingat sua donatio propter nuptias, aut eo minus, partitio erit facienda æquabilis: sin est autem, ut bonorum copia major sit, primum ita distribuetur, ut minime donata obtingat sua donatio: tum deinde residuum hac eadem ratione reliquis rursus distribuetur: ut si quis uxores habeat quatuor, quarum uni quadringentos pro donatione propter nuptias denarios perscripserit, trecentos alteri, tertiæ ducentos, quartæ centum, ex quo omnino mille sit denariorum summa, is si repudium uxoris renuntiat, si vitam cum morte commutat, & denarios duntaxat relinquit quadringentos, paucioresve, æqualis fiet divisio inter mulieres, ut unicuique denarii centum, aut eo minus obtingat. Qui idem si denarios reliquerit octingentos, sane æquabili facta partitione inter mulieres, cuique ducenti obveniant denarii: atqui mulieri ordine quartæ centum omnino denarii pro donatione propter nuptias perscripti sunt. Quinam igitur agendi modus? Nempe de universa pecunia demuntur quadringenti denarii, qui mulieribus quatuor distribuuntur æqualiter. Sic enim efficitur, ut donationem propter nuptias mulierum quarta quidem totam accipiat, eat: restabunt igitur denarii nummi etiam quadringenti, & mulieres ternæ, quarum unicuique jam dissoluti sunt denarii centum.



Atenim hos quadringentos denarios si describas æqualiter ternis mulieribus, eveniet; ut tertia auferat tres denarios & triginta & ducentos, addita tertia nummi parte, cum pro donatione propter nuptias ei sint denarii non amplius ducenti. Quapropter de quadringentis his nummis dementur etiam trecenti, qui ternis mulieribus dispertiantur æqualiter, ita; ut mulierum tertia nummos ducentos suæ donationis propter nuptias auferat, eat. Superant nummi centum, binæ mulieres: hæc denique summa primæ & secundæ describetur æqualiter: ita fiet, ut ducentos quinquaginta denarios accipiat omnium prima, item & secunda: tertia denarios ducentos, & quarta centum. Atque ad hanc rationem partitio facienda semper, si mulieres numero centum fuerint.

IX. Si quis alicujus uxori donationem propter nuptias pro marito spopondit, quamvis hic idem stipulatione se se alligarit, nihilo magis donatio propter nuptias ei dependenda sit. Hic enim rem piam patravit, nec ejus causa quidquam expendit mulier. Pater pro filio cum donationem propter nuptias spopondit nurui, idemque stipulatione se alligavit, solvet utique. Etenim pro filio pater prorsus se se obligat, & addicit. Qui recepit in se uxoris donationem propter nuptias, hic eam solvet, etiamsi nulla stipulatione se se alligarit. Sed quæ tandem est in se recipiendi formula? Nempe mulieri si quis dixerit, tu illi nube, & hanc ego donationem propter



nuptias tibi daturus sum : verum enim si quis ita dixerit, hujus ego donationis propter nuptias jam nunc sponsor existo, istam ego dependam, istam ego debeo donationem propter nuptias, & horum similia, is sane liber erit, nisi confirmator idem & pater existat. Atqui uxorem hac ratione ductam amissurus se porro ab ista nullam unquam percepturum esse voluptatem voveat oportet : tum deinde demum donatio propter nuptias ei dependetur aut ab eo, qui uxoris donationem propter nuptias in se recepit, aut etiam ab patre mariti sponse. Est enim metuendi locus, ne vir uxorem à se repudiatam reducat, ac composito factum sit quomodo rem hujus habere possent.

X. Et qui facultates suas dedicavit, is si deinde nuntium uxori remittat, itidem voveat opus est se posthac nihil à muliere commodi capturum, ut ab sacrorum redemptore donatio propter nuptias ei solvatur, ne usu veniat, ut de compacto sacra usurpent. Hoc eodem voto obstringi renuntiantem uxori repudium, ea cum pro donatione propter nuptias rem mariti repetat ab emptoribus, nihil requiritur. translatitium dabitur à muliere jusjurandum, atque donationem propter nuptias ab emptoribus abripiet. Quin etiam viro concessum est, ut uxorem volentem reducat. Nimirum emptores quando non erant nescij hominem nomine donationis propter nuptias obstrictum uxori esse, ultro rei jacturam fecerunt mercatores ea, quæ mulieri obligarentur.



XI. Si postquam possessiones suas vir vendidit, emptori scriptum dedit uxor: *Nihil quidquam mihi tecum neque juris, neque rei*, factum viri comprobavit, stipulatione\* se alligavit, nihilo fecius emptori suam illa donationem propter nuptias adimat: illa videlicet scriptum istud non alia de causa dederat, nisi ut viro secum iurgium ne existeret: est autem quod dicat, viro ego meo obsecuta sum. Quod si cum uxore primum transactum est, ut certum quoddam ei prædium ne obligaretur, tum postea demum vir divendit, id quidem certè mulier nunquam recipiet. Jam vir cum vendidit prædium, idemque postea iussit, emptori scriberet uxor sibi cum eo nihil esse rei, illa non scripsit, factum improbat, & tandem evenit, ut venditionem irritam, infectamque esse vellent, idemque rursus alteri vendidit prædium seu idem, seu aliud, atque sub venditionem viri factum approbavit uxor, & transegit prædium istuc ut ne sibi pignori esset oppositum, itidem illud emptori nunquam adimere queat. Hic enim non est quod dicat, ego viro meo morigerata sum, quippe quæ eadem negotium primum cum nollet voluntati viri obsecuta non sit.

XII. Qui duas habeat uxores, is si prædium vendiderit, ac cum uxorum prima ut hoc illi prædium ne obligaretur, neve posset ab emptore repetere, transigeretur, atque ita transigeretur; ut se marito obsecutam esse dicere nequeat, idemque mortem occubuerit, vel

I iiij

\* Est hic mendum in Hebraeo verbo apud editionem 1574. in parvo folio.



uxores missas fecerit ambas, earum altera prædium ab emptore recuperet, quia enim cum istac pro emptore nihil decisum erat: tum verò ab uxore secunda prædium repetet prima, quippe quæ secundæ antecedit, & nisi emptori prædium pignori sibi obligatum solvit nemini: ad primam cum rediit prædium, rursus ab ea emptor repetet, quando cum hac erat pro emptore decisum, itque in orbem usque, dum rem cum bona gratia inter se componant.

XIII. Quæ mulier relicta fuit vidua seu à nuptiis, seu à sponsalibus, ea dato iurejurando uti sibi donatio propter nuptias exolvatur, prædium viri vendiderit aliquod inspectante iudicum confessu: qui nihil refert sint omni laude cumulati, necne, modò tres sint homines idonei, quibus habeatur fides, & iidem possessionum æstimandarum intelligentes: atque etiam reliquæ pupillorum possessiones pro vendito prædio pignori opponuntur. Ea verò, cui repudium est renuntiaturum, mulier non à viro prædium vendet nisi præsentibus iudicibus, iisque maximè spectatis. Jam quod ad confessum iudicum venditur, voci præconis subjiçatur necesse est. Atqui venditio ad iudices quo fiat pacto, tractatu de mutuo sane diligenter disputatur. Quæ verò venduntur nec ullo iudicum confessu adhibito, hæc nec præconis voci subjiçi oportet: verumtamen id prorsus necesse est, ut venditioni tres intersint homines idonei, quibus credatur, & iidem etiam æstimandi prudentes.



XIV. Nam mulier vidua cū pro donatione propter nuptias sibi debita relictum à viro prædium vendiderit per se ipsa, siquidem suo vendidit pretio, venditio rata sit: verū enim post venditionem solemnī viduarum iurejurando adiget: \* ita est enim si prædium mulier vendidit; verū si sibimet addixit, irritum, infectumque sit, ut etiam sub præcone subjecerit.

\* Hebraicum illud pronomen in editione 1574. in parvo folio mēlosum est, femininum pro masculino.

XV. Jam vidua mulier, cui sint pro donatione propter nuptias denarij nummi ducenti, ea si quod denariorum est centum vendidit ducentis, contrāve vendidit denariis centum quod ducentorum est, donationem propter nuptias accepit totam, neque ea præterea quidquam habet, & viduarum iusjurandum solemnē dederit. Et cui sunt denarij pro donatione propter nuptias centum, ea si quod centum & uno denariis valet, omnino centum vendidit, venditio sit irrita, ut profiteatur se hæredibus denarium reddituram.

XVI. Cui fuerint pro donatione propter nuptias denarij quadringenti, hæc si denariis centum vendidit uni, & item alteri quod valet tantundem: postremò autem emptori vendidit denariis centum, quod denariorum est centum & unius, omnino venditio postrema irrita fuerit: superiores autem firmæ sint omnes.


XVII. Est hoc mulieri in manu, ut cui velit suam donationem propter nuptias aut vendat, aut dono det: ut si vir morte occu-



buerit, repudiumve renuntiaverit uxori, ejus donationem propter nuptias hic accipiat: mulierem verò si vir extulerit, si mors oppresserit ante, quàm solemne jusjurandum dederit, nihil ei sit donationis propter nuptias.

XVIII. Atque etiam mulier si partem suæ donationis propter nuptias vendidit, si pignori opposuit, si dono dedit, reliqui accipiendi causa prædium viri vendiderit vel præsentibus judicibus, vel ternis hominibus idoneis. Atque in suam donationem propter nuptias vendiderit mulier multa multoties, adhibitis seu judicibus, seu ternis hominibus idoneis, qui iidem æstimandi prædij periti sint.

XIX. Mulier si donationem propter nuptias vendidit homini alieno, virove; cætera tamen pacta ac conventa dotalia non exuit: ut si filium habet, is bonis è patriis præter partem legitimam, auferat etiam quanta sit divenditæ donationis propter nuptias summa ex stipulatione nuptiali. At verò mulier si donationem propter nuptias viro condonavit, reliquorum simul conventorum dotalium jacturam fecerit, ut ne victus quidem exigendi jus habeat. Et sicut ad alia condonanda, item ad condonandam donationem propter nuptias neque testibus, nec stipulatione opus est; sed dicto: dicatur verò non per risum ac jocum; sed ratione constanti & gravi, cui verò sit, quod credat animus.





## CAPUT DUODEVICESIMUM.

I. **V**idua quidem mulier, si vidua vixerit, sumptibus eorum, qui viri cernunt hæreditatem, alitur interea, dum suam illam donationem propter nuptias accipit: quam ut exegit ad consilium, alimenti haud quidquam amplius à viri hæredibus ei fuerit. Eadem si donationem propter nuptias vendidit totam, pignori opposuit, alteri obligavit; si huic ita dixit, tu tuum hinc repetes debitum, nihil ei suppedient ad victum hæredes. Nec quidquam interest, utrum à muliere isthæc confecta sunt ad spectatum consilium, an secus: vivo, an mortuo jam viro. Sin autem partem duntaxat vendidit donationis, alimentum ei præbendum erit. Jam vidua ut viro pacta fuerit alteri, alimenti jacturam fecerit.

II. Et tanquam victus viduæ mulieri de mortui de viri bonis, item vestitus, supellex, & habitatio dabitur: quæ, si videtur, confidebit in eodem, quod unà cum viro habitaverat domicilio. Culcitris, tegminibus, mancipiis, ancillis utetur iisdem, quibus & dum vir in vivis erat. Quod si domicilium corruat, ab hæredibus illud restitui jus non est: nec verò audienda mulier, si velit ab hæredibus sibi permitti, ut domicilium de suo ipsa reedificet: porro nec ipsa rimas expleat, neque tectorium inducat: aut domum, utcunque



est, habitet, aut deferat: hæredes verò si domicilium viduæ mulieris vendiderint, venditio irrita fuerit.

III. Viro si corruisset domicilium, aut mercede tantum esset conductum, habitatio viduæ mulieri dabitur pro dignitate sua: atque ad dignitatem mulieris quoque accommodatur victus & vestitus. Quod si vir mulieri dignitate præstet, pro dignitate viri cuncta tribuentur mulieri, cui hoc concessum est, ut per virum ad altiore dignitatis gradum ascendat, nunquam descendat ad inferiorem, ne post mortem quidem.

IV. Est in contubernio ac convivio emolumentum haud mediocre: Quinis hominibus, quorum unicuique separatim epulanti frumenti modius ad victum requiritur, cibum simul unâ capientibus nimirum sufficiunt modij quatuor: atque eadem est reliqui pœnoris ratio. Quare si usu veniat, ut mulier vidua ita dixerit, ego ab patre meo nunquam discedam, vos decernite mihi quid ad victum ibi tribuatis, haud injuria hæredes ei, tu si nobiscum confideas, habebis à nobis quod ad victum suppetet: sin minus, dabimus omnino pro rata portione convivus. Quæ si vidua suam & hæredum ætatem integram causetur, utique dabitur ei quod ad victum soli suppeditet, & habitabit cum patre: jam viduæ mulieris victus & vestitus reliquiæ redeunt ad hæredes.

V. Implicita morbo vidua si medicina indiget cujus sit æstimatio nulla, nimirum ea vi-



Atque loco ponitur, atque mulierem curare hæredum est. Nam si medicinæ sit æstimatio habita, mulier de sua se donatione propter nuptias curet. Vidua si capta sit non est hæredibus redimenda, ne fratria quidem. Et quæ vivente viro caperetur mulier, si captiva teneretur etiam post ejus obitum, redimetur non de viri pecunia, sed de sua, vel donationem propter nuptias accipiet, unde se ipsa redimat.

VI. Hæredes viri viduam extinctam sepultura afficere jus est. Quæ si post datum solemne viduarum jusjurandum demum de vita discessit, pecunia donationis propter nuptias ejus ad hæredes lege redit. Atque horum est etiam & mulierem curare sepeliendam; non illorum qui cernunt hæreditatem viri. Nam quod vidua quaritat opera & manu, id viri pertinet ad hæredes. Qui si viduæ mulieri dixerit viri hæres, tu tuum accipe pro victu labore, nullatenus audiendus sit: idem expectanti mulieri conceditur.

VII. Quid operæ cunque viro navet uxor, & vidua pupillis oportet, exceptis tribus, miscere pocula, lectum sternere, & lavare manus & pedes.

VIII. Vidua si fortuito quid inveniat, si qui fructus sint earum, quas secum apportaverat, rerum, omnino omnia mulieris, nihil quidquam hæredis fuerit.

IX. Dotem verò sine jurejurando vidua recipit: neque enim hæredes viri ullo jure contentent de isto rei genere, nisi eadem & fuerit



perpetua, & vivo viro amplificaretur: quippe  
cujus rei amplificatio ad virum pertineat. Jam  
si nec ullo dato jurejurando diem suum obisset  
vidua, ad ipsius hæredes lege redit dos ejus,  
etiam si sit res perpetua. Quæ si res aucta sit,  
viri obvenit hæredibus amplificatio.

X. Vidua si res mobiles in victum occupa-  
rit vivo, vel mortuo viro, non ei adimuntur,  
non, si talentum auri cepit: verum accepti  
rationem scribit ei consilium, victum decer-  
nit, atque ratio cum ea putatur. Jam de eo  
quod tenebit mulier aletur interea dum vel è  
vita excedit, vel non debetur ei victus ab hæ-  
redibus: qui denique recipient, mulier si quid  
occupatæ rei faciat reliquum.

XI. Eadem si viro etiam vivo res mobiles  
occupavit in suam donationem propter nu-  
ptias, de his quidem post viri obitum absol-  
vetur: non ita, si post interitum viri demum  
in suam donationem propter nuptias res ce-  
pit mobiles, quamvis id sit à magistris illis  
constitutum, mulier ut de re mobili quoque  
donationem propter nuptias acciperet. Atqui  
dotalibus etiam pactis in re mobili locus est:  
unde fit, ut alatur etiam de re mobili vidua  
mulier, ut nihil quidquam occupaverit.

XII. Et vir si reliquit rem mobilem, nec  
eam vidua cepit, capient hæredes, qui mu-  
lieri victum præbebunt: nec verò est mulier  
quod hos cohibeat, & dicat, res illa mobilis  
apud consilium mihi deponatur dum inde sim  
alenda, ne si perdatur non sit, unde mihi vi-  
ctus suppeditet. Etenim mulier si cum viro



nominatim decedit, ut aleretur etiam de ejus re mobili, tamen hæredes ejus impedire non potest, quominus rem capiant.

XIII. Sic enim à cunctis decernitur consiliis. Quod si fundum vir reliquit, eum quominus vendant ipsius hæredes scilicet obstabit mulier: attamen si venditus à \* viro fuerit, emptoribus non adimitur: uxor enim & puella viri de bonis aluntur, siquidem bona sunt libera.

\* Hic nonnihil editio in folio parvo differt ab altera.

XIV. Si quis reliquit uxores plures, quarum alia sit ducta post aliam, nihilo secius in victu itidem, ut in re mobili, juri antecedendi nihil loci relinquitur.

XV. Quæ incidit in leviri potestatem vidua primos tres menses de viri facultatibus alitur, quo si tempore percipitur uterus, et si prægnans agnosceretur jam tum, vir cum emoreretur, porro aletur dum pariat. Quæ si partum validum enixa fuerit, præterea itidem, uti reliquæ mulieres, aletur quamdiu vidua vixerit. Quæ eadem si tres post menses non reperitur gravida; item si facit abortionem, neque de viri bonis, nec de leviri aletur: id verò levirum poscat mulier, ut vel domum ducat, vel calceum sibi finat exui.

XVI. Ut levirum poposcit uti se aut domum deduceret, aut ad calceum exuendum admitteret, seu levir à consilio aufugit, aut in morbum incidit, seu trans mare degit, mulier de bonis ejus nec ullo dato jurejurando alatur.

XVII. Quod si vidua in potestatem vene-



rit leviri natu minoris, omnino mulieri victus ab eo suppeditat nullus, dum adoleverit adeo, ut reliquorum sit levirorum assimilis.

XVIII. Vir si moriens certum quendam fundum victui destinavit viduæ, atque ita dixit, erit in victum locus ille, victus ei conditionem fecit meliorem: ut si ejus fundi fructus ad idoneum mulieri victum non suppetant, reliquum sumat de cæteris viri fortunis: si verò victum idoneum superent, totum quantum est accipiat. Nam si viro ita dicente, hoc in loco erit pro viduæ victu, mulier obtinuit, præter hujus loci fructus accipiet nihil, quippe cui vir alimentum præfiniverit.

XIX. Sunt qui sentiant viduæ si de victu iudices adeat, decernendum esse victum, sacramentum dicendum non esse, quorum sententia minus est idonea, qua commoveatur quisquam. Longè enim discrepat isthæc à muliere, cujus vir mare transmisit. At verò illi, quibus ego operam dedi, magistri negant victum à consilio decernendum esse prius, quàm ea jusjurandum dederit; quippe quæ petat, ut pupillorum sibi pecunia dependatur: atqui de re pupillorum, nisi exacto jurejurando, nihil quidquam dissolvitur. Equidem in hanc ego sententiam propensus sum; & verò est, quod eam quisque comprobet.

XX. Ergo si de victu consilium adeat vidua, principio jurejurando adigitur: tum etiam sine voce præconis bona venduntur, atque mulieri ad victum suppeditatur. Et mulieri quidem ipsi in victum sine voce præconis bona



na vendere integrum est. Immo verò si quid per se sola suo pretio vendidit, ratum erit. Verùm hæredibus exigentibus iusjurandum dabit.

XXI. Jam de modo, vendetur unde mulier sex menses totos tolerari queat, non eo plus. Et quod venditur, ea conditione venditur, ut emptor viduæ suppeditet ad victum tricesimo quoque die: rursusque vendetur in sex menses alios: itaque deinceps vendiderit usque, dum de bonis universis id omnino superfit, quod ad dissolvendam donationem propter nuptias suppetat: tum de reliquo donationem propter nuptias accipiat, eat.

XXII. Viduæ cùm victus est à consilio decretus, tum etiam ab ea operæ ratio non redditur, nisi reposcant hæredes. Qui si quid operis inveniant, auferant: sin minus, eant. Ego verò sic existimo hæredes si minores sint, cum muliere rationem subducere consilium, & tanquam victum, item ei decernere laborem.

XXIII. Viduæ, si nullam proferat percriptionem dotalem, omnino nihil alimenti decernitur, quia donationem propter nuptias fortassis vendidit, condonavit, oppigneravit. Quod si non intendant hæredes, nosmet eorum nomine intendimus, jubemusque litteras afferat dotales, sacramentum dicat, & victum accipiat: nisi forte litteras dotales perscribi mos ac consuetudo non ferat.

XXIV. Mulier si mare cum viro transmissit unà, tum redux suum vita virum excessisse

K



ait, vel communi omnium viduarum lege victum, si videtur, vel donationem propter nuptias accipiet. Eidem sibi nuntium à viro remissum referenti fides non est. Verumtamen de viri facultatibus aletur ad summam factæ sibi donationis propter nuptias, quoquo modo se res habebit. Nam si est, ut viro sit etiam conjuncta, ab hoc ei victus debetur: sin repudium, ut ipsa dicit, renuntiatum est, donatio illa propter nuptias ei quidem certè solvenda est, siquidem dotales litteras proferat. Quocirca ad summam donationis propter nuptias alatur, eat.

XXV. Si repudium mulieri renuntiatum est, atque ita renuntiatum est, ut ambigatur ritè sit amissa, necne; omnino de viri facultatibus jam emortui non aletur; neque enim dubiam ob rem quidquam ab hæredibus exigitur. Eidem à viro vivente victus erit præbendus, dum ritè missa fiat.

XXVI. Inops si vidua biennio, si triennio locuples non poposcit victum, remisit. Quæ si porrò victum repetat, præbetur illi quidem non in spatium hoc elapsum; sed in illud demum, quod à petitione cedit. Sin vel uno die citius eo victum petiit, neutiquam condonavit, & cum exigit victum recipiet etiam in tempus id quod jam effluerit.

XXVII. Vidua si victum exigit ab hæredibus, hi se dedisse dicant, illa se recepisse neget, hæredum erit quod intendunt confirmare, dum videlicet mulier innupta vivat, aut ipsa conceptum illud jusjurandum dabit,



viſtum recipiet. Rurſus mulier ubi fuerit cum viro nupta, ejus erit cauſam probare, aut hæres conceptum illud juſjurandum dabit ſe viſtum præbuiſſe.

XXVIII. Omnino acceſſio donationis propter nuptias ab ſorte ipſa differt nihil. Ergo vidua ſimul ut petiit, vendidit, remiſit, oppigneravit ejus, quæ propter nuptias fiat, donationis acceſſionem & ſortem, præterea viſtus ei præbendus non eſt. Quæ ſi acceſſionis partim petiit, partim reliquit, perinde ſit habenda, quaſi ſortem ipſam ex parte repetiſſet, ex parte reliquiſſet. Denique ſi indiſtinctè vendidit conceſſit donationem propter nuptias, acceſſionem unà cum ſorte vendidit, condonavit. Etenim ambæ uno & eodem nomine appellantur.

---

### CAPUT UNDEVICESIMUM.

I. **E**ST hoc dotalibus è conventis unum, ut pueris à matre veniat hæreditas cùm donationis illius propter nuptias, tum etiam dotis, ſi tamen hanc viro ex ratione rei perpetuæ mulier dediſſet: iidem poſt etiam reliquam hæreditatem paternam ex æquo cum fratribus ex eodem patre natis partiantur.

II. Ponamus igitur exempli cauſa ductam eſſe alicui uxorem, cujus è donatione propter nuptias & dote mille denariorum ſumma fiat, eandem à filio ex ſe nato elatam eſſe: tum

K ij



huic eidem alteram esse ductam uxorem, cuius tam donationis, quam dotis summa sit denariorum omnino ducentorum, quam itidem filius ex se natus extulerit: tum è vita quoque decesse virum, reliquisse denariorum millia duo, ejus è prima uxore filius ex hæreditate præcipiat mille denarios, & ducentos filius ejus ex uxore secunda, suæ quisque pro dote matris; deinde reliquum dividatur æqualiter, sic; ut ad uxoris primæ filium hæreditate perveniant denarij mille & quadringenti, & sexcenti ad filium alterius.

III. Hæc enim ita sunt, si præter donationes illas propter nuptias vir reliquit denarium unum, vel eo plus; ut relinquatur quod hæredes inter se partiantur æqualiter: sin autem præter donationes propter nuptias ne denarium quidem reliquisset, omnino omnia hæredibus æqualiter dispertientur. Nam si suæ quisque matris donationem propter nuptias accipiat, nec superet denarius qui dispertiatur hæredibus æqualiter, eveniat; ut hoc conventu dotali omnino tollatur æquatio hæreditatis inter liberos, quam tamen æquationem sancit divina Lex.

IV. Similiter cui uxores sint ductæ bene multæ seu alia post aliam, seu omnes simul unâ, is si has extulerit, cùm habeat ex singulis pueros, modò res ejus familiaris vel uno denario superet omnes donationes propter nuptias, filiorum à sua cuique matre veniat hæreditas donationis propter nuptias, & reliquum partiatur æqualiter.



V. Jam pupilli si constituerunt ipsi se ad bona patria denarium additurum eò, ut à sua cuique matre obveniat hæreditas donationis propter nuptias, non sinuntur. Res à consilio æstimatur, quanti erat tum, cùm è vita pater excederet. Nam si post obitum ejus res augeatur, minuaturve ante, quàm ad partitionem faciendam accedant hæredes, tamen nihilominus æstimatur ut erat tum, cùm morte occubuit.

VI. Etenim hic idem si præter omnes donationes propter nuptias reliquit denarium, aut plus eo, quanquam ab ipso proferuntur tabulæ æris alieni, quod residuum illud æquat; nihilominus filiorum à sua cuique matre veniet hæreditas donationis propter nuptias.

VII. Jam qui uxoribus jugatus duabus extulit earum alteram, ab altera elatus est, is si liberos suscepit ex utraque, etiamsi præter duas donationes propter nuptias reliquit nihil, filiis tamen posterioris hujus uxoris, si modò ea jusjurandum dederit prius, quàm diem suum obiit, primo hæreditas donationis propter nuptias à matre veniet: neque enim ad hos ex pacto dotali, sed ex Lege pervenit materna donatio propter nuptias: tum deinde ex pacto dotali venit superioris uxoris filiis à matre sua hæreditas donationis propter nuptias: porrò si quid reliquum fuerit, id utrique inter se partiantur æqualiter. Nam si mulier ista posterior vitam cum morte mutet ante, quàm jusjurandum dedit, filiis superioris primùm à matre hæreditas dona-

K iij



tionis propter nuptias veniat, tum quod superabit dividuum quoque faciant.

VIII. Sin evenit, ut vir uxoribus jugatus duabus, quarum utraque puerum ei peperit, efferatur ab ambabus, tum mulieres diem suum obeant & ipsæ, modò jusjurandum ante dederint, ad utrumque puerorum à matre sua hæreditas donationis propter nuptias pervenit non ex pacto hoc dotali, sed ex Lege. Quare sit præterea relictum aliquid rei, necne, minimè laboratur. Atque etiam hæredes ejus quæ fuit ducta prius, posterioris hæredibus anteferuntur. Quæ si mulieres jusjurandum ante non dederint, omnia liberi inter se partiantur æqualiter, hæreditas maternæ donationis propter nuptias omnino nulla fuerit. Nam donatio propter nuptias viduæ mulieri ante, quàm juravit, nulla debetur.

IX. Quod si jurasset ante mulierum una, altera non jurasset, illius, quæ jurasset, liberis primùm hæreditario jure materna donatio propter nuptias obveniret, tum reliquum cum alterius etiam ex æquo partirentur. Mulieris igitur à viro elatæ filius à matre hæreditatem donationis propter nuptias capiat, non de bonis obligatis, sed liberis itidem, ut hæredes reliqui.

X. Alterum est dotale conventum, ut puellæ post patrem mortuum de bonis illius alantur interea, dum despondentur, aut pubescunt. Nam puella pubes etiam si pacta non est, contravæ pacta, etsi necdum pubes, præterea non alitur. Et quæ de bonis extincti



patris alitur puella, ei si quid fortuito inventum, si quid opera partum, proprium ipsius, non fratrum erit.

XI. Atqui puellæ de bonis extincti patris decernitur victus, vestitus, & habitatio item, ut viduæ. Et in puellarum sic, tanquam in viduæ victum & vestitum sine præcone bona vendantur. Hoc inter viduam ac filiam interest, quod viduæ quidem pro dignitate seu ipsius, seu viri; filiæ verò pro sola necessitate decernitur: præterea autem jurejurando puellæ non adiguntur.

XII. Neque verò à matre perveniet hæreditas donationis propter nuptias ad filios, neque filiæ ex pacto aluntur, nisi perscriptionem illam dotalem in medium proferant. Quæ si nulla extet, ibi omnino nihil his erit: quia enim mater donationem propter nuptias forte condonavit. Iisdem rursus ubi non est in more positum, ut dotales litteræ perscribantur, omnia ex conventu tribuentur.

XIII. Si quis instante morte jussit frangi dotalibus è pactis aliquod, aut de bonis suis puellas, aut viduam non ali, aut à matre hæreditatem donationis propter nuptias non pervenire ad filios, huic omnino mos non geritur. Nam si sua dono dedit omnia, quoniam donatio ægrotantis, ut alio loco agetur, non à morte hominis demum parta est, simul una bonorum obligatio hac donatione, & pactis illis existit. Quapropter cùm vidua, puellæque ejus alentur de bonis, tum ad filios hæreditas donationis propter nuptias per-

K iiij



veniet à matre, quam vir extulit.

XIV. Et quæ renuit puella, ea sit aliarum instar, suppeditet ei victus: fratriæ verò, uxoris incestæ secundariæ, mulieris pactæ, aut vi compressæ puellis ex hoc eodem pacto à mortuo quidem patre victus suppeditat nullus: his iisdem item, ut cunctis pueris puellisque, à vivente patre suppeditat.

XV. Si quis sibi despondit puellam quæ aleretur à fratribus, hanc ille à sponsalibus alat, oportet. Nempe isti posthac neque victum præbeant fratres, nec sibi ipsa quærat, utpote quæ parva vel puella ætatem puberem necdum attingit. Ecquis igitur est, qui velit sponsam suam cum ignominia & dedecore ostiatim petere, quod ad vitam desideratur?

XVI. Puella cum viro nupta si renuit, si missa fiat, si conjuge viduetur; immo si levirum opperiat, cum redeat ad patrem ante, quàm puberem ætatem attingit, ejus sit alenda sumptibus dum despondeatur, aut pubescat.

XVII. Itaque si homini mortuo & filij superstites fuerint, & filia, bonorum hæreditas omnis perveniat ad filios, qui sorores suas alant usque dum pubescant, aut despondeantur. Ita est enim si mortuus ille reliquit, unde filij alantur simul unà cum filiabus dum pubescant, quæ res ampla dicitur: sin autem rem ea minorem reliquit, primùm ex ea eximitur quod suppetat ad alendas puellas usque dum pubescant: tum deinde reliquum pueris



tribuitur. Qui si nihilo plus rei reliquerit, quam quod ad puellarum victum requiritur, ea re puellæ tolerantur dum pubescant, aut despondeantur; pueri verò ostiatim petant, quæ sint ad vitam necessaria.

XVIII. Sic enim res se habet si pater extinctus fundi quid reliquit: si autem tantulum rei mobilis relictum est, quando ex auctoritate magistrorum modò puellæ de re mobili aluntur, utique hac re parva pueri æquè & puellæ tolerandi sunt. Ecquid enim est constitutum aliud, quàm ut rei mobilis æquatio fieret inter pueros atque puellas? Hæc enim fuit magistrorum sententia.

XIX. Quod si ab patre extincto rei magnæ relictus ager posthac viluit, nihilo secius hæredibus jam partus est. Et si fundi vilioris pretium postmodum augeatur, itidem pueris veniet hæreditas. Immo verò si nulla amplificatione pretij facta relictum agrum viliores pueri præoccuparunt, vili pretio vendiderunt, venditio rata fuerit.

XX. Jam si pater extinctus rem amplam reliquit, etsi fuit in ære alieno, etsi cum uxore constituit se puellam ejus ex alio viro procreatam aliturum, neque debitum, neque victus hujus puellæ rem efficere minorem censetur. Itaque bonorum hæreditas omnis veniet pueris, qui iidem æs alienum solvent, & puellam ab uxore patris ortam alent ad statum diem, & sorores dum pubescant, aut despondeantur.

XXI. Si relicta est vidua simul & puella



ex hac eadem aut alia uxore nata, nec res superpetit ad alendas ambas, vidua ex re toleretur, puella victum petat ostiatim. Similiter ego dico prius ali puellam, quàm puero hæreditatem donationis propter nuptias venire à matre, quam pater suus extulit. Et verò si puellarum victui posthabeas jus hæditarium à Lege ipsa constitutum, quanto magis conventum illud consilij de perscripta matri summa donationis propter nuptias?

XXII. Si quis autem puellas reliquit superstitibus partim majores, partim natu minores, puerum nullum, neutiquam ducendum est à majoribus sustentatum iri minores dum pubescant; tum postea faciendum esse reliquæ hæditatis partitionem æqualem: verùm omnia confestim omnes inter se partiuntur æqualiter.

### CAPUT VICESIMUM.

I. **S**Civerunt Sapientes, ut suæ quisque filiæ de re familiari impertiretur aliquid ad nuptias: id cultus appellatur. A quo igitur filia collocatur, nec quidquam est ad nuptias decretum, dabitur ad minimum ea vestis, quæ, ut supra posui, pauperrimæ cuique Israëlitarum mulieri tribuitur. Hoc est officium patris tenuis. Locupletem verò pro facultatibus suis filiæ tribuere convenit.

II. Quod si sponso pater edixit suam nihil prorsus habere filiam, ducendam esse nudam,



haud quidquam filiae cultus erit. Nec verò est, quod dicat sponsus se illam ad se deductam vestire: vestiatur etiam ad patrem oportet.

III. Si quis filiam relinquit superstitem, cognoscendum erit extincti de animo. Nam quantum ipse cunque decreverat filiae ad cultum dare, tantundem dabitur: Jam cognoscetur de animo ejus ex sodalibus, & consuetudine conjunctis, ex iis, quae gessit, negotiis; atque etiam ex dignitate. Jam si vivus aliquam in matrimonium collocavit filiam, ex ea de voluntate illius judicatur. Quod si consilium perscrutari voluntatem mortui nequeat, decumam partem de bonis ejus filiae pro cultu dederit.

IV. Si quis igitur filias superstites relinquit multas, primae cuique nubenti dabitur de mortui bonis pars decuma: secundae decuma eorum quae relinquit superior: sequenti item decuma ejus, quod à proximè superiori relictum est. Quod si omnes sint simul una nupturae, prima omnium bonorum accipiat decumas: secunda decumas eorum quae relictæ ab priore sunt: tertia item eorum decumas, quae sunt ab proximè superiore relictæ: itemque deinceps si filiae fuerint decem: tum rursus omnes inter se decumas partiuntur æqualiter, & si quid reliquum fuerit, fratribus obveniat.

V. Atque ad cultum hunc decuma bonorum non datur ex pacto dotali: Quocirca etiam ex instituto Sapientum cum superio-



rum, tum posteriorum, nisi de fundo, non datur: datur autem & de locatione fundi: fratres autem, si libeat, argentum pro fundi decuma dederint.

VI. Ad hanc igitur decumam quod attinet, filia mortui itidem, ut fratrum creditores, nullo dato jurejurando absolventur de fundo mediocriter bono. Qui si fratres extinguantur, & ab horum liberis absolvetur quidem puella; sed de prædiis quàm deterrimis, atque etiam interposito jurejurando: etenim de possessione pupillorum istæ absolvatur: atqui de pupillorum neminem absolvi possessionibus nisi deterrimis, & adactum jurejurando, tractatu de mutuis edisseretur.

VII. Jam si pueri fundum paternum oppignerarint, vendiderint, filia eb emptoribus cultum suum recuperabit sic, tanquam creditores, qua de re item tractatu de mutuis explicabitur.

VIII. Si quis filias natu majores collocavit, minores reliquit superstites, filium nullum, nequaquam minoribus cultus suus prius eximatur, quàm fiat bonorum partitio; sed simul omnia partiantur æqualiter.

IX. Si cui filiæ superstites fuerint duæ, & filius unus, atque filiarum prior bonorum decumam protinus occupavit, necdum ceperit altera, cum diem suum obeat filius, atque bonorum hæreditas omnis filiabus omnino veniat, horum altera de bonis non eximat decumam, sed ex æquo cuncta partiatur cum superiore, cui & decuma sua ritè parta sit.



X. Si quis autem jamjam moriturus vetuit quidquam de possessionibus suis filiabus ad cultum dari, mos ei geritur: neque enim cultus iste filiabus ex pacto dotali debetur.

XI. Dictum est à nobis ante, si cui uxor superstes fuerit, simul & filia, viduæ, quàm filia victum esse potiolem. Quæ si filia nubat, nihilo magis partem decumam accipiat, propter alimentum viduæ. Nec si nupta cum viro filia decedat idonei cultus ejus hæreditas viro superstiti veniat, ea re; quia cunctæ possessiones viduæ sint oppigneratæ alimentis.

XII. Pupillam natu minorem si mater ipsius voluntate, fraterve viro conjunxit, simul & ei drachmas dedit centum, aut quinquaginta; tamen nihilominus adulta cultum exigit ab eis sibi debitum. Quocirca aut patris erit perscrutanda voluntas, aut possessionum tribuenda decuma: ita est enim, quanquam ante nuptias nec alebatur à fratribus, & in nuptiis nihil opponebat: neque enim opponendi vis cadit in parvam.

XIII. Quod si viro se conjunxit major, seu puella, seu pubes, nec poposcit cultum, amisit. Eadem si nubendo quid hac de re testetur, postea cultum suum exigit cum libuerit. Et quæ puberem ætatem attigit, seu post, seu ante patris obitum, atque etiam ad patrem moretur, huic si fratres victum præbere defuerint (victus enim præterea, quemadmodum posuimus, debetur nullus) ipsa contuit, cultum non petiit, jacturam ejus fecit:



contrà si quid de eo significavit. Nam si nec pubes quidem sustentari à fratribus desita est, tum etsi de cultu cum fratribus nihil egit dum ab iis aleretur, tamen eum non perdidit. Est enim quod dicat, ego meum à fratribus cultum idcirco non petij, quia victum mihi ministrabant haud debitum, & cum viro conjuncta non eram.

XIV. Si quis filix suæ hanc illam pecuniæ summam, qua fundus ematur, in cultum tribui jussit valens, aut æger: idem diem suum obiit, atque hoc argentum alicujus fidei commissum viro suo vult ad quem libuerit usum dari filia, siquidem ea jam major est, & viro deducta domum, ei est in manu, ut fiat: sin autem est viro pacta tantum, de pecuniâ nihil aliud, quàm quod à patre mortuo mandatum, fiat. Sin est adhuc parva, etiamsi cum viro nupta, nihilo magis ei obtemperetur: sed enim qui recepit ab ejus patre mandatum, idem hic efficiat.

### CAPUT UNUM ET VICESIMUM.

I. **U**Xor quidquid inveniat fortuito, quidquid manu efficiat, viri fuerit. Sed quid tandem operis viro faciat? id quod loci fert consuetudo: hîc texet telam, hîc acu pinget, hîc nebit linum, hîc lanam. Ubi verò loci solent mulieres in his omnibus æquè laborare, ibi lanam modò ducere invita cogetur uxor. Nam lino os &



labra offenduntur : atqui proprium mulieris opus est nere, ut est in Lege: *Præterea singula mulieres corde sapientes neverunt manibus.* Exod. 35. 25.

II. Quod si contenderit uxor, ut plusquam pensum faceret, & residuum viri quoque fuerit. Quamvis igitur divitiis abundet vir juxta, atque uxor; quamvis magna sit uxori vis ancillarum, ipsa nihilo magis otiosa ab opere desideat. Nimirum *otium hominem abducit ad nequitiam*: verum enim totum diem in opere faciendo consumere non cogitur: pro divitiarum abundantia minuetur labor.

III. Qui si vir uxorem impulit, ut voveret se nullum omnino opus facturam, continuo missam faciat oportet, numeretque donationem propter nuptias, propterea quod *desidia animus impellit ad flagitium*. Jam suo quæque viro mulier vultus lavet, manus, & pedes, poculum misceat, lectum sternat, & stans aquam, vasaque ministret, tollat, & horum similia; non item focero, non item privigno.

IV. Hæc igitur officia mulier, quamvis ei multæ sint ancillæ, viro præstabit per se ipsa: & viro nisi uxor præstabit nemo.

V. Ecce autem alia quæ viro præstet uxor tum, cum sint inopes: in clibano coquere panem. (Nam Esdras sanxit panem ut mulier coqueret bene mane, ut præ manu sit, qui detur egentibus: ) condire pulmenta: vestimenta lavare: quos pariat ex se nutrire libe-



ros : jumento pabulum apponere , non  
item tauro : molere , hoc est , sedentem  
in pistrino farinam custodire , non per se mo-  
lam versare , aut agitare jumentum molarium  
eò , ut pistrinum ne quid cesset. Atque ubi  
loci consuetudo est , & ipsa dabit operam mo-  
letrinae.

VI. Hæc videlicet inopum est conditio :  
mulier autem si viro secum ancillam adduxit ,  
aut rei attulit satis ad ancillam comparandam :  
item si propria viri sit ancilla , aut res ea , quæ  
ad ancillam emendam suppetat , neque mo-  
lat uxor , nec coquat , nec vestimenta lavet ,  
nec jumento escam admoveat. Et quæ viro  
secum aut ancillas adduxit duas , aut rem por-  
tauit , quæ ad duo mancipia emenda suppe-  
ditet : itemque si viro sint ancillæ duæ : si est ,  
unde duas emat , haud uxor pulmenta con-  
diat , liberos nutriat : erit autem nutrix an-  
cilla.

VII. Omnis igitur mulier officia viro om-  
nino quinque præstare debet : nere : lavare  
vultus , manus , pedes : poculum miscere : le-  
ctum sternere , stando ministrare. Porro au-  
tem sex sunt genera officiorum , quæ partim  
mulierum debent , partim non debent facere :  
molere : pulmenta condire ; panem coquere :  
liberos nutrire : jumento pabulum appo-  
nere.

VIII. Atque officia debita viro præstabit  
mulier etiam menstrualis : de poculo autem  
miscendo , sternendo lecto , vultu , manibus  
& pedibus lavandis , metuendum est ne vir  
in



in eam incidat cogitationem, qua adducatur, ut cum uxore corpus misceat. Menstrualis igitur mulier lectum sternit absente viro: poculum enim miscebit; viro autem in manum, ut fere fit, non dabit: super solo, vase, mensa apponet, unde vir illud per se capiat.

IX. Mulier si vasa frangat domi opere faciendo, impune sit: quod quidem jus non est; sed decretum. Atque ni ita constituas, pax domi sit nunquam: mulier enim plerumque ab opere deterreatur, ex quo jurgium existat inter ipsam & virum.

X. Mulier si quid horum, quæ debet efficere, operum aspernetur, adhibitis etiam verbis id facere coërceatur. Sin autem mulierem opus aliquod fugere vir dicat, ipsa neget, aut socia mulier ipsis adjungetur, aut vicinorum aliquis. Atque hac de re quid fieri possit iudex viderit.

II. Mulieri dum est partus sui nutrix minuatur labos, victus augeatur vino, atque eorum genere, quod maximè lacti conducit. Nam victus ei maximè accommodatus cum decerneretur, si cibi plus etiam, aut genus aliud appeteret (est enim insana quædam appetitio tum mulieri visceribus inhærens) de suo sibi compararet quid & quantum liberet. Nec enim est, quod vir occurrat, mulier siumat plus satis, aut esca vescatur mala, interitum esse partum: quia enim proprii doloris ratio potior est.

XII. Mulier si pariat geminos, invita quidem nutrix ambobus non erit, sed eorum

L



alteri; alteri vir mercede nutricem conducet. Mulieri familiaris suæ filium simul cum suo nutrire volenti vir obstat, & impedit, ne cum suo nutriat & alium.

XIII. Mulier si voti sponsionem fecit non suo se partui fore nutricem, invita cogetur, ut nutriat tum puerum, tum puellam, donec menses exegerit vincti quatuor: si partui suo nutrix esse velit mulier, vir nolit uxorem suam esse nutricem ideo, ut ne sordescat; mulieri mos sit gerendus, ut etiam ancillæ ei fuerint bene multæ. Habet enim magnum dolorem, separari ab suo partu mulierem.

XIV. Mulier per se ipsa si sit inops, quæ quidem partui suo nutrix esse debet, & vir opulentus, cuius uxorem non convenit esse nutricem, quamvis nulla sit ancilla mulieri, siquidem nutrix esse nolit, vir aut nutricem conducatur, aut ancillam emat, quæ nutriat. Nam per virum dignitas uxoris ut non minuitur, sic contra per eundem augetur.

XV. Uxor si ait virum suum eum esse quem conveniat conducere aut emere ancillam, ipse neget; uxoris est probare quod intendit, nec est iurijurando locus.

XVI. Cui repudium est renuntiatum mulieri, ea nutrix esse partus sui non cogitur. Nam si est, ut nutrix esse velit, à viro dabitur ei merces: sin autem ipsa partum nutrire non vult, patri reddet, qui curam ejus sustineat. Sic enim res se habet, siquidem partum non lactavit adeo, ut jam ipsam nosset: ubi verò novit, deinceps à matre sua non sepa-



rabitur, non, si cæcus sit: non est enim periclitanda partûs salus. Cogetur igitur mulier nutrire partum ad exactos menses viginti quatuor.

XVII. Jam cui nuntius est remissus mulieri, post hac, cùm sit filij sui nutrix, à viro tamen alimentum debetur nullum: verùm præter mercedem huic dederit quod puero est necessarium ad vestitum, ad escam & potionem, ad unctionem, & horum similia. Prægnanti verò si nuntium remiserit, vir nihil quidquam dederit. Atque mensibus exactis remotum à lacte puerum infantem si velit etiam retinere repudiata mater, nec ab ea separetur ante, quàm totos sex annos compleverit, & apud matrem moranti victum interea loci cogatur puero præbere pater. Postea verò est, quod dicat pater cum matre confidenti victum præbere nolo. Puella verò à matre discedat nunquam, nedum sextum post annum.

XVIII. Itaque pater si fuerit is, quem deceat de re familiari indigentibus impertiri, ab eo vel invito exigatur id quod æquum sit, quo puella sustentetur apud matrem. Quin etiam si viro cum alio nupta mater sit, tamen nihilominus cum ea commoretur filia, cui nomine eleemosinæ victum præbeat pater dum vivat. Qui cùm diem suum obierit, filia de bonis ab eo relictis aletur etiam apud matrem ex pacto dotali. Quæ si mater liberos suos à lacte remotos secum habere nolit, neque pueros, neque puellas, licet eos aut patri

L ij



restituatur, aut si jam patre sint orbi, civitati tradat, quæ habeat curam eorum.

## CAPUT SECUND. ET VICESIMUM.

I. **O**Mnino uxoris hæreditas ad virum pervenit ante omnes: jus autem hæditarium venit simul ac è patris in viri potestatem & ditionem concessit uxor, ut nondum etiam fuerit deducta ad thalamum.

II. Ut si viro, virive procuratoribus pactam mulierem ejus pater ipse, aut procuratores à patre tradiderint, tum itinere faciendo diem suum obierit mulier ante, quàm esset deducta ad thalamum, cùm sit etiam dos ejus ad patrem, jure tamen hæditario viro obveniat. Similiter cùm deducenda uxore vir mulieris patrem, patrisve procuratores habuerit itineris comites, atque uxorem in itinere domum in aliquam introduxerit, ubi esset nuptiarum nomine cum sola solus, tum mulier extincta sit, hæreditas ejus ad virum perveniat. Nam si mulieris pater comes esset viro cùm uxorem duceret domum (eadem omnino est ratio si patris procuratores comitarentur virum, aut procuratores ejus:) atque in diversorio cum ea sic, uti viatores solent, pernoctaret; quoniam mulieri & pater, vel ejus procuratores essent etiam adjuncti comites, necdum vir fuisset nuptiarum nomine cum sola solus, ejus morte si dos jam esset ad virum translata, tamen ad patrem lege redeat.



III. Jam si virgo pubes, orba, vidua per se ipsa discedat à patre ad virum, quem nec ipsum itineris socium habeat, neque ejus procuratorem, atque itinere faciendo morte occumbat, hæreditas ejus viro non veniat.

IV. Qui uxorem duxerit sibi interdictam, huic, cum sit potestas mulieris ejus dicandæ, mortuæ hæreditas utique veniat. Et qui duxit uxorem natu minorem, cum ejus sint infirmæ nuptiæ, tamen & huic uxoris à se funere elatæ veniat hæreditas. Homo sanus si surdam duxerit uxorem, non ad eum mulieris emortuæ hæreditas perveniat: rursusque surdus si sanam duxit uxorem, illi veniat mortuæ uxoris hæreditas. Nam mulier animi compos, quoniam sua sponte & voluntate viro nupsit isti, simul habendæ rei familiaris suæ jus tribuit.

V. Virgo si natu minor sit viro dicata sciente & volente patre, atque eodem inscientem nupta, pater seu præsens, seu absens fuerit tum, cum nuptiæ fierent, infectas, irritasque reddiderit, quemadmodum supra disseruimus. Nec verò si de nuptiis factis siluit pater, morte mulieris hæreditas ad virum perveniat. Etenim pater nuptias filiæ velit, oportet.

VI. Ægrotantem mulierem, cum petat à viro, ut nuntio remisso sine donatione propter nuptias discedat, eo videlicet consilio, ut si mortem occumbat hæreditas ejus viro ne veniat, magistri decreverunt non audiendam esse, ne si dicat quidem, ego virum odio

L iij



habeo, confidere cum eo nolo, nec de ea sic, tanquam de contumaci muliere statuendum: quod iudicium sanè quàm præclarum est.

VII. Omnium, quas habet mulier, possessionum, seu certarum & stabilium, seu caducarum atque fragilium fructus omnis, dum mulier in vita manet, viro percipiuntur: quarum earundem, simul ut mulier decedat, omnis hæreditas viro veniat. Itaque mulier cum viro nupta si possessiones vendiderit caducas etiam eas, quæ ante quàm desponderetur, obvenissent, quamdiu illi vita supetet, tamdiu vir harum possessionum fructus ab emptoribus auferet: non ita fundos. Nimirum in possessionum caducarum solum ipsum vir, dum mulier vivat, omnino jus habet nullum. Nam si mulierem vir effèrat, idem ab emptoribus fundos quoque auferat, ne pretio quidem emptionis restituto. Quod si eadem ipsæ, quæ fuerunt ab emptoribus repræsentatæ, pecuniæ restent etiam, reddantur emptoribus oportet. Nec est, quod vir dicat, forte fortuna mulier eas reperit.

VIII. Sic enim statuitur de mulieris possessionibus, quæ sunt viro cognitæ: mulier autem si possessiones & in regione longinquas, viroque ignotas vendiderit, venditio firma, rata sit. Et sponsa si possessionem ante nuptias vendiderit, venditio rata fuerit: nec enim quidquam juris habeas in possessiones sponsæ, donec ipsam domum deduxeris.

IX. Mulier si prius quàm viro nuberet sua alicui aut propinquo, aut alieno universa bo-



na scripto dedisset, etsi donatio, sicut tractatu de donis explicabitur, infecta sit ubi missa fiat, aut vidua mulier: tamen nec viro percipiuntur bonorum fructus, neque hæreditas veniat tum, cum ab ipso sit uxor funere elata, ob hanc ipsam causam, quia ante, quam ei nuberet, mulier bona sua dono dederat. Sed enim cum uxorem vir extulerit, tum denique donato quæ data fuerant rite parta sint: neque hoc tantum, sed etiam mulier si nuptias ante suas aut universa bona, aut partem eorum aliquam cuiquam dedisset scripto, in quo donato ita diceret, ab hoc die mea tibi res sit parta cum ego velim, ubi quidem certè donatio firma non est, donecum mulier velit; tamen neque rei donatæ fructus viro capiantur dum vivat mulier, nec morte ejus veniat hæreditas.

X. Quidquid boni obtigit mulieri levirum manenti, hoc illa vendat, dono det. Nec levir usque, dum domum deduxerit fratricem, capiat possessionum fructum, ne fixarum quidem & stabilium, quas illa fratri demortuo apportaverat. Nam fratricem levirum manentem si vita deficiat, paternis hæredibus ejus caducæ possessiones jure hæreditario obveniant, & hæredibus extincti viri cum mulieris donatio propter nuptias, tum dimidia pars possessionum stabilium. Atque hæredes viri sepultura mulierem afficere jus est.

XI. Jam mortui viri omnia omnino bona opperienti levirum mulieri pro donatione propter nuptias oppignerantur. Itaque levir nec

L iiij



ante, nec postquam deduxit domum fratrem quidquam ex fratris extincti possessionibus vendiderit. Qui si possessiones ejus aut vendidit, aut dono dedit, aut cum cæteris fratribus partitus sit, nihil horum ratum fuerit, quia possessiones illæ prorsus oppositæ sunt pignori viduæ mulieri, cui quidem inde dissolvenda est donatio propter nuptias.

XII. Cùm fratrem duxit domum levir, cujus frater mortuus fructus quosdam radicibus hærentes reliquit, his ille fundum emet, ex quo fructus percipiat.

XIII. Idem rursus frater extinctus si fructus evulsos reliquit, si pecuniam, si quamvis rem mobilem, tota pertinet ad levirum. Nec verò mulier ipsum impediat, quominus his ad arbitrium abutatur eò, quod de re quidem mobili donatio propter nuptias mulieri non persolvitur nisi ex decreto magistrorum. Non est autem hujus decreti ea vis, ut levirum istiusmodi re fraterna excludat, & obster, quominus hac ipse utatur ad contrahenda negotia.

XIV. Quod si non donata propter nuptias fratria fuerit, si donationem remiserit, possessiones leviro ita adquiruntur, eas ut divendere ad arbitrium suum, & donare queat: & cùm fratrem suam domum deducet, perscribet ei nummos denarios centum pro donatione, cui donationi pignori opponentur omnino leviri possessiones omnes, sic, ut cunctis cum mulieribus donationem propter nuptias habentibus agitur.



XV. Mulier si viro, vel alieno aliquam harum possessionum stabilium aut vendidit, aut dono dedit, infectum, irritumque fit: & vir si de bonis uxoris cum stabilibus, tum caducis fundum vendidit, nihil actum habetur.

XVI. De re autem mobili bonorum etiam stabilium, eam etiam si vir vendiderit citra potestatem, rata tamen est venditio. Nam caducis de facultatibus si quid simul venderint ambo, ratum erit: nec verò quidquam refert, utrum à viro id prius, quam ab uxore coemptum fuerit, an secus.

XVII. Similiter mulier si bona caduca viro vendidit ipsi, donoque dedit, cum venditio, tum etiam donatio firma sit: nec est quod dicat mulier, ego nihil aliud volui, quam viri animum permulcere. Est autem, quod dicat in altero bonorum genere.

XVIII. Mulier ergo si aut ex illo genere bonorum stabili seu vendidit viro, seu donavit fundum, vel res mobiles, vel quem sibi vir agrum pro pignore donationis propter nuptias tradiderat, vel qui donationi suæ æstimatione habita addictus à viro erat \* *Vel qui erat sibi alio pro agro suo à viro substitutus*, id neutiquam viri proprium erit. Etenim uxor si quid ultro viro vendidit, tamen quo tempore cunque libeat, id recuperabit: si enim existimandum est, ab uxore viro, nisi ad pacem inter se concilandam, donari, vendi nihil. Quapropter viro sic, ut ante diximus, in uxoris bona alia, quam caduca, omnino nulla est actio.

\* Quod de potestremo agri genere dicitur, hoc desideratur apud exemplar in parvo folio editum 1574.



XIX. Mulier si quid ex bonis illis perpetuis amissum aut subreptum viro condonavit, & hic idem mulierem stipulatione alligavit, hîc, ut mihi quidem videtur, non est, quod dicat, ego viri animum mitigari volui. Quid enim? Quid differt hoc ab illo, si cum uxore vir tranfigat, ut res sua ipsi ne obligetur? Si mulier bonorum genus illud perpetuum reddat caducum? Neque enim id nunc vir agit, ut sibi liceat ab uxore quid auferre, aut possessiones ejus habere; verum ut à repetitæ rei solutione liberetur. Nam ex eodem bonorum genere perpetuo si quid etiam mobile quod adhuc existat viro donavit uxor, infecta dona funto: est enim, quod dicat, virum ego volui placatum effici.

XX. Vir si ejus, quod uxoris est, prædij vendidit usum & fructum, nihil actum habetur: neque enim viro bonorum ad uxorem pertinentium usus & fructus decernitur alia de causa, nisi ut sit sumptuum domi faciendorum compendium. Quare si usum fructum vendidisset eò, ut argento inde comparato ad mercaturam faciendam uteretur, omnino mos illi gereretur.

XXI. Pecuniam mulieris vir implicaverit: nempe eam, quæ sit bonorum ex genere perpetuo: nam pecuniæ illæ caducæ quæ vocantur, seu viro portarentur ab uxore tunc ipsum cum duceretur, seu jure hæreditario obvenirent mulieri jam nuptæ, seu dono datæ essent, his fundum emi convenit, unde vir fructum percipiat. Atque eadem est ratio rei



mobilis, quæ mulieri post nuptias aut hæreditate venisset, aut fuisset dono data.

XXII. Similiter homines alieni si mulierum cum viro nuptæ plagam inflixissent, quod ab his ei multæ nomine dependeretur argenti, eo mercaretur agrum, ex quo vir fructus caperet. Sed hac de re tractatu de plagis.

XXIII. Mulieri si jure hæreditario obvenirent servi, quamvis senes, non veniunt; quippe qui laudi sunt paternæ ejus familiæ. Sin obvenerint vineæ, olivæ, nihil autem quidquam agri his obfiti, eandem ob causam, quia honori sunt paternæ ejus familiæ, non venduntur, si modò sit operæpretium eas colere: sin minus, lignorum pretio oportebit ut emat agrum, ex quo fructum vir percipiat.

XXIV. Mulieri si veniant hæreditate fructus radicibus etiam hærentes, viri sunt: sin autem fuerint jam evulsi, vendantur; tum eorum pretio comparetur ager, à quo fructum vir capiat. Nam si tunc ipsum cum vir nuntium remittat uxori, eidem fructus existant radicibus adhuc hærentes, ad uxorem pertinent: ad virum verò, si jam evulsi fuerint.

XXV. Servis uxoris & bestiis, siquidem è genere bonorum caduco sunt, victum & cultum vir præbeat necesse est: & hi viro opus faciant: porro capiat vir fructum ex ipsis. Itaque partus ancillæ, quæ sit è caduco bonorum genere, viri est: itemque fœtus bestię, quæ sit eodem è bonorum genere.



Et si uxor, cum evenit discessio, partum velit ancillæ pretio redimere, quoniam id paternæ ejus familiæ honori sit, gerendus est illi mos.

XXVI. Jam si vir ab uxore, cum duceretur, accepisset sub ratione boni perpetui aut vasa, aut mancipia duo, quæ addicerentur ei drachmis omnino mille, tum pretium eorum augeretur ad summam duorum millium drachmarum, atque cum uxore vir divortium faceret, ea mancipiorum aut vasorum alterum pro mille drachmis recipiat: alterum si velit pretio redimere, quia familiæ ejus paternæ laudi sit, mos ei geratur,

XXVII. Vir si donasset uxori seu agrum, seu argentum, quo agrum mercaretur ipsa, is ex hoc quidem dono fructus caperet nullos. Et extraneus si quid mulieri dono daret ea lege, ut fructus ex eo caperet non vir; sed mulier, atque his suum ad arbitrium uteretur, nullos omnino vir ex eo dono fructus perciperet. Si mulier suam donationem propter nuptias cuiuspiam pretio venderet, ista quidem pecunia mulieris esset, nec vir perciperet ex ea fructus.

XXVIII. Qui subripuit pullum pecoris ejus, quod esset perpetuo bonorum è genere, eum oportet in duplum ire: hoc igitur mulieri manet: neque enim hic est, quem Sapientes viro decernunt, fructus. Et si quis suæ vulnus impegit uxori, quidquid argenti pro damno dato, pro dolore, pro dedecore dependendum est, item mulieri maneat, nec



fructum quidem ex eo vir ullum percipiat.

XXIX. De agro quem vir uxori venderit, siquidem illæ viro perspectæ atque exploratæ fuerant pecuniæ, quibus emeretur ager, mulieri bene comparatus est, vir ex eo fructum capiat. Sin autem de pecunia ista vir celatus esset, emptio irrita sit. Est enim, quod vir dicat, ego nullam aliam ob causam agrum ei vendidi, nisi ut indicaret mihi pecuniam, quam me celatum voluit. Itaque pecunia hac comperta fundus emetur, ex quo vir fructum percipiat.

XXX. Mulier si dicat dono sibi datam esse quam habeat pecuniam, remque mobilem: vir autem opere quæsitam, atque adeo ad se pertinere, fides sit habenda mulieri. Atenim hoc est viro in manu, ut diras obnuntiet ei, qui contrà, quàm quod res est, intendit: tum deinde ager ea re emetur, ex quo agro fructum vir capiat: sin mulier ita dicat, data mihi res est ea lege, ne quidquam potestatis in eam vir haberet, sed eam ego meum ad arbitrium tractarem, dictum ipsa confirmet, necesse est. Nam quid rei cunque apud mulierem invenitur, in viri est potestate eatenus, ut fructus ex eo omnes capiat, donec potestatem eam mulier rationibus infirmet.

XXXI. Sin viro dicat mulier, tute mihi id donasti, conceptum illud iusjurandum dabit id sibi donatum à viro, qui prorsus nullos ex eo fructus capiet.

XXXII. Nemo sinat apud se deponi quid-



quam à muliere, à servo, à natu minori.  
 Quod si quis perperam mulieri permisisset,  
 ut apud se deponeret aliquid, eidem ipsi  
 reddat depositum, oportet: Ea si è vivis  
 excessit, viro: si quis sineret aliquid à servo  
 apud se deponi, reddat depositum servo: aut  
 ejus hero, siquidem servus mortem appetiit.  
 Si quis sivit, ut apud se quid deponeret natu  
 minor, aut rei pretio ematur ei \* volumen il-  
 lud Legis, aut ejusmodi quid, ex quo fructum  
 percipiat. Qui quidem singuli si morientes  
 dicant, depositum hoc hujus illius est, atque  
 hic qui depositum tenet existimat idoneos  
 esse, quibus credatur, fiat quod jusserunt: sin  
 fide minus digni videantur, depositum ho-  
 rum hæredibus reddatur.

\* Ex quo vi-  
 delicet divina  
 oracula popu-  
 lo prælegi in  
 synagogis so-  
 lent: nam id  
 passim liber  
 Legis nuncu-  
 patur: Penta-  
 teuchus autem  
 Judæis dicitur  
 lex Moy-  
 sis typis excu-  
 sa.

XXXIII. Mulier cùm pecuniam habeat  
 eam, ex qua conveniat virum percipere fru-  
 ctum, & eidem ista pecunia emi aliud, aliud  
 viro placeat, efficiendum erit, ut compare-  
 tur id, quod fructus ferat multum, sumptus  
 parum requirat: neque quidquam refert,  
 utrum viri an mulieris ex sententia fiat: jam  
 id solum comparabitur, ex quo novum usque  
 proventum existat; cavendum est enim ne vir  
 rem totam consumat, atque pereat ipsa fors.

XXXIV. Mulier si viro capram attulit, ex  
 qua lac traheret, ovem, cujus vellera tonderet,  
 palmam ex qua dactylos decerperet, etiam-  
 si rerum istarum fructus soli ad mulierem  
 pertinent, nihilominus vir eos caperet dum  
 res ipsas conficeret. Eadem si pro bono cadu-  
 co viro portavit utensile, eo quidem ad vesti-



tum, ad stratum, ad operimentum abutetur usque, donec res tota conficiatur. Qui si nuntium uxori remittat, eum trita rerum caducarum persolvere jus non est.

XXXV. Et perpetuis illis è rebus, quæ viro imminuuntur, si quod instrumentum restaret quamvis tritum, dummodo suum ad opus etiam esset idoneum, magistri illi voluerunt à muliere sic, uti est, recipi: si porro nihil ad opus suum valeret, perinde esse, ut si subreptum aut perditum sit, atque adeo à viro dissolvi, quo ipsi pretio tum esset adductum, cum uxorem duceret. Atqui hæc consuetudo pervagata est: & quicumque ex hac consuetudine uxorem ducit, de dote infecti damni promittit. Ut verò vir rei diminutionem explere non debet, sic nec amplificationem, si forte pretium auge scat, demere. Porro ex hac consuetudine viro est in manu, ut cogat ex uxoris servis & ancillis aliquot sibi servire, etiam in alterius, quam duxit, uxoris domo. Neque enim quidquam interest, utrum illa mancipia res caduca, an perpetua fuerint. Eadem mancipia in aliam urbem invita uxore deportare, id verò marito non licet.

---

### CAPUT TERTIUM ET VICESIMUM.

I. **M**ulier si cum viro conditionem instituit eam, ut earum, quæ viro debentur ab uxore, rerum remitteret aliquam,



idque sponsæ vir ante nuptias perscripserit, nihil est quod porro stipulatione alligetur; quod perscripserit, ratum est: idem hoc si post nuptias demum uxori perscripserit, stipulatione alligetur etiam, necesse est.

II. Quæ mulier cum viro conditionem instituit eam, ut suarum possessionum causa nihil ad illum pertineret, hæc si quid postea vendiderit, omnino venditio rata sit: verum dum possessiones ipsi manent, fructum ex his vir percipiat. Quæ si sponsa adhuc cum viro transegit, nihil ut juris haberet in facultates suas, hic quidem certè de possessione tota decessit: quamobrem ex ea nihil unquam fructus percipiat, ne tum quidem, cum de sua illa concessione ita contenderit, non ille mihi fuit unquam transigendi animus, ut ne fructus quidem uxoris è possessionibus caperem; sed ut si quid ipsa venderet, venditio rata foret: nam uxorem, nisi cum re, ducit nemo. Enimvero hic audiendus non est.

III. Vir si cum muliere constitueret se de possessionibus ejus fructus nullos esse percepturum, hic fructus ipsarum quidem non absumeret; sed his possessio comparabitur, cujus fructus denique percipiet; quippe qui de possessionum illarum fructibus solum decesserat.

IV. Nam si cum muliere vir constitueret se nec quidquam fructus è possessionibus ejus capturum, neque porro ex harum fructibus, tum possessionum fructibus ager emetur,



tur, cujus agri fructibus & alter sit emendus ager, ex quo denique vir fructus capiat, qui quidem existent ex fructuum fructibus. Sic, sic est enim usque dum vir paciscatur se neque possessionum, neque harum fructuum fructus unquam esse capturum: tum videlicet vir è possessionibus mulieris, quamdiu ea in vita manet, fructus omnino capiat nullos: eidem emortuæ mulieris hæreditas, quanta quanta erit, tota veniat.

V. Quod si cum muliere vir constituisset se illius hæreditatem non aditurum, omnino hic ex ejus hæreditate nihil capiet: capiet autem bonorum fructus quoad mulier vivat. Eodem modo si cum muliere vir constituisset se ejus hæredem ex parte duntaxat esse futurum; si pepigisset, ut, si mulier nec ullis ex se procreatis liberis moreretur, bona ejus ad paternam familiam redirent, ratum erit.

VI. Sic est enim si vir cum uxore necdum domum ducta constituit se hæreditatem ejus non aditurum: scilicet hoc cuilibet concessum est, ut familiæ non suæ, sed alienæ hæreditatem necdum ad se pertinentem constituat se omnino nunquam aditurum: sin autem post factas nuptias demum ita cum uxore pactus est, pactio sit irrita, adeoque mulieris item, ut supra disserui, ad eum veniet hæreditas.

VII. Jam si post nuptias denique pacto convenisset, nihil ut juris potestatisque vir haberet nec in uxoris possessiones, neque in harum fructus, neque porro in fructuum fructus ad infinitum, idque nec viva, nec

M



mortua muliere : omnino hic de possessionibus uxoris fructus capiet nullos ; attamen idem si efferat uxorem hæreditatem ejus sic , ut ante \* differui , accipiet.

\* Apud exemplar in folio magno editum 1524. mendosum est hoc verbum.

VIII. Vir si in uxoris possessiones illas caducas impensas egit , videndum non erit , utrum plus fecerit sumptus , quàm fructus ceperit , an secus. Nam ex his si caricam vel unam comedit via & ratione liberali , aut ratione minus ingenua comedit id , quod esset denarij : immo etiam si de fructibus nihil aliud , quàm sarmentorum omnino fasciculum unum cepit , nihilo plus , quàm quod cepit , pro sumptibus feret.

\* Hoc loco variaz sunt lectiones. In folio magno legere est , possessiones : in parvo autem , pecunias , secutus sum posterius.

IX. Similiter si \* pecuniæ mulieri obtigissent in loco adeo longinquo , atque maritus ejus multos fecisset sumptus , uti has aut deportaret , aut è manu tenentis extorqueret , tum his agrum mercaretur , unde fructus percepisset ad dictum paulò ante modum , nihil aliud , quàm quod cepisset , pro sumptibus ferret. Idem si nihil omnino fructus inde cepisset , aut cepisset intra modum , habita æstimatione compendij rogandus erit quid sumptus fecerit : si est , ut impensas superet emolumentum , per apprehensum volumen illud Legis quàm maximè desiderabilis jurabit in summam impendij , quod inde demet : sin autem emolumentum excedit sumptus , nihil quidquam nisi summam emolumenti pro sumptibus feret , nec hoc quidem nisi dato illo , quod ante diximus , jurejurando.

X. Sic est enim si nuntium mulieri vir re-



mittat. Nam viro cum mulier advenferur, quamvis multos ille fructus cepisset, habita æstimatione fructuum summa fiet, & deducetur ex eo, quod ob factos sumptus illi rependendum erit. Nimirum dato illo jurejurando repræsentantur huic impensæ, quas neutiquam mulieri voluit adquisitas eo, ut has ea sponte sua discedens abriperet. Et qui sumptus fecit in possessiones uxoris adhuc parvæ, eundem si mulier adulta renuat, videndum erit quid fructus ceperit, quid fecerit sumptus, quid compendij. Hic enim habetur itidem, ut olitor qui pro parte fructuum colendum suscepit hortum; quippe qui data facultate ad tractationem istius rei descendit.

XI. Consuetudo dotis est multiplex & varia: in quibusdam locis dos solet in instrumento nuptiali perscribi sic, ut tertia, aut quinta, aut dimidia parte augeatur: ut si denarij dotis sint omnino centum, mulier ad augendam rem in vulgus scribatur ad virum detulisse denarios dotales centum & quinquaginta, eidemque postmodum dotem exigenti nihilo plus denariis centum dissolvatur: in aliis contrà dos scripto extenuatur: si viro doti dixerit mulier vasa denariis centum valentia, oportet illi det ea quæ sint denariorum centum & viginti, neque tamen plus centum denariis perscribitur in litteris nuptialibus: in aliis autem quantum rei cunque doti datur, tantundem solet adscribi: porro in aliis consuetudo est, ut pro dote dicta sponsus in ornatum argenti certum quiddam tribuat spon-

M ij



ſæ, quo ſibi comparet odores, & horum ſimilia : porro in aliis & ſponſus quoque de ſuo ſolet ſponſæ quid afferre, quo doti conjuncto ambo unâ fruantur.

\* Eſt hic parvum mendum apud exemplar in folio magno 1524. conſulatur aliter in folio parvo 1574.

XII. Qui duxit uxorem nec ullam fecit de re ſua mentionem, ab eo mulieri pecuniam pro conſuetudine regionis perſcribi ac \* perſolvi oportet. Et mulierem quæ cum viro conſtituit ſe dotem ad ipſum eſſe delaturam, ex regionis conſuetudine dare convenit : cui dotem exigenti id quod in litteris nuptialibus perſcriptum erit ſolvetur item ex regionis conſuetudine : ſi tamen hæc eadem conſuetudo ſit in omnem regionem pervagata.

XIII. Sponſus & ſponſa ſi ipſi inter ſe ſic egerint, tu mihi hoc aut illud deferes, & tu hoc illud mihi dabis, vel hoc illud mihi perſcribes : item ſi parentes ita pacifcantur pro liberis, tu hoc illud filio tuo, & tu hoc illud filiæ tuæ dabis, continuòque fiat dicatio, his etſi nihil inter ſe tranſegerunt, tamen recte adquiſita ſunt ea, quæ dicta fuerant. Nimirum hæc illa ſunt, quæ dicto adquiruntur.

XIV. Sic ſe res habet ſi filiæ pater ſeu natu minori, ſeu majori, & ex altera parte pater itidem filio pactus ſit aliquid in nuptias videlicet primas : quia enim pater inclinatione voluntatis eſt propenſus in filium, cujus primis nuptiis latatur adeo, ut illi quidquid ſpondit vel dicto prorfus adquiſitum eſſe ex animo velit. Nam frater ſi quid ſorori promiſit, mater ſi filiæ, idem eſt judicandum de



propinquis cæteris : immo & pater si filio vel filia quid promisit in nuptias secundas , nisi pollicentem se hoc illud datum ire stipulatione alligarint , nihil quidquam adquisitum erit.

XV. Jam quod in nuptias à patre promissum est filia , donec ea fuerit à viro deducta domum , nihil adquisitum erit ; neque filio donec sponsam duxerit domum. Etenim quisquis in matrimonium promittit aliquid , ea lege promittit , si domum ducatur uxor. Si quis igitur argentum suo pollicitus sit genero , tum hic idem diem suum obierit ante , quàm domum duxisset uxorem , eaque ducenda sit fratri superioris ex lege illa levirum tenente , sponsæ pater leviro dixerit isti , equidem fratri tuo hoc argentum dare volui , tibi non item. Nec verò quidquam facit ad causam si superior ille rudis & hebes , posterior fuerit literatus ; ut etiam hunc puella expetat.

XVI. Sponsæ pater si genero quid argenti pactus fuit , atque in terram abiit aliam , hoc sponsa habet dicere sponso , egomet ipsa tibi de me recepi nihil , quid vis faciam , vel indotatam me ducas domum , vel missam facias. Nam sponsa si quod sponso promisit ipsa præstare nequeat , eam oportet domi sedere interea , dum invenit id , quod sponso pacta fuerat , aut dum mortem occumbit : neque enim istam vinculo jugali solvat contumacia : quia sponsa contumax ea demum est , quæ verò volentem se domum ducere sponsum aspernatur : hanc autem , nisi quod promisit

M iij



exolvat, rejicit sponsus, cum sponsum ipsa velit, siquidem ita prædicat, tu domum me duc, aut me missam fac. Sic enim agitur cum sponsa majori: at enim natu minor si quid sponso de se ipsa recepit, eam aut indotatam ducere, aut missam facere sponsus cogatur.

XVII. Si quis uxorem duxit ea conditione, ut hujus filiam ex alio viro natam hoc illo annorum numero aleret, eum totidem annos, quot in se recepit, puellam alere jus est. Sic est enim, si conditio jam tum institueretur, cum fieret dicatio: alias omnino nulla erit, nisi aut stipulatione virum alligarit, aut conditio in instrumento perscribatur, aut quid horum simile denique fiat sic, ut tractatu de emptione & venditione disputabitur. Jam si vir intra præfinitum de nutrienda puella temporis spatium repudium mulieri renuntiet, ea nubat alteri, quicum item paciscatur, ut suam hanc eandem filiam hoc illo nutriat annorum spatio; neque superior ille dixerit, ego puellam si veniat ad me nutriam; verum deferat alimentum ejus ad matrem: neque porro dicant ambo, nos eam pariter alemus; sed enim eorum alter puellæ subministrabit alimentum, alter pro alimento pretium dabit.

XVIII. Jam si puella collocatur in matrimonium intra constitutum illud tempus, suus illi vir alimentum præbeat oportet: horum autem duorum vitricorum quisque pretium pro alimento solvat. Cum verò diem suum obierunt hi duo qui privignæ sponponderunt



se se alimentum præbituros esse, si stipulatione, si litteris obstricti tenerentur, privigna itidem, ut qui pecuniam per singrapham credidissent, de bonis etiam obligatis victum suum ad præfinitum tempus abriperet. Nam si uxore dicanda victum privignæ sponderint quidem; at enim stipulatione alligati non sint, hoc scilicet negotium litteris consignatum esse nolebant, adeoque privigna suum in alimentum abriperet nihil.

## CAPUT QUARTUM ET VICESIMUM.

I. **Q**ui uxorem duxit sterilem, si nec ullos liberos habet, \* neque uxorem aliam, cui det operam ad propagandam generis stirpem, conjugem missam facere cogatur, quæ conjux conditione sit eadem, atque cunctæ mulieres: nempe cum donatio illa propter nuptias, cæteraque pacta dotalia mulieri rectè sunt acquisita, tum viro hæc eadem quæ & ab alia quavis conjuge.

\* Hic in exemplari in folio magno mendum est: est enim pronomen pro negatione positum.

II. Nam si non nimis cognita ducta fuit uxor, tum ea reperiatur aut sterilis esse, aut ex illis, quæ sunt interdictæ, vetito, mulieribus una: itemque si secundaria seu nota, seu ignota viro collocata fuit, nec fors donationis propter nuptias isti, neque reliquis è pactis dotalibus quidquam persolvetur: persolvetur autem id quod sorti donationis propter nuptias ultrò vir addidit. Rursus ei nihil à viro ne mortuo quidem ad victum & cultum sub-

M iiij



ministrabitur : & cū divortium facere vir cogitur, ab eo, quos cepit fructus è re conjugis, ij neutiquam exiguntur.

III. Quod autem fors donationis propter nuptias his mulieribus adimitur, accessio non adimitur, hæc est causa & ratio : quia sortem donationis propter nuptias uxori decreverunt Sapientes ideo, ut viro ne facile esset missam facere conjugem : unde fit, ut fœminæ sterili, quando minus cognita viro collocata fuit, omnino fors donationis propter nuptias non dependatur : accessionis enim sponte sua se vir alligavit stipulatione, dum uxor sibi præsto esse vellet : atqui conditioni stetit mulier, viro se se fruendam permisit, atque etiam parata illi adest. Atenim istac homini Lege interdictum est : quid autem mulier faciat ? Accipiet igitur id quod donationi propter nuptias ultro vir addidit : neque enim mulier commisit, ut post nuptias demum viro propter mores suos interdiceretur, sed jam ante interdicta illi fuit.

IV. In secundariis autem cognita non discernitur ab ignota : interdixerunt autem ne istiusmodi mulieri fors donationis propter nuptias persolveretur usquam : hæc enim non est interdicta, nisi ex institutis Sapientum, qui suum edictum adeo confirmarunt. Jam si de mulieribus vetito interdictis aliqua juncta sit viro satis cognita, itemque si mulierum jussu interdictarum aliqua seu nota, seu ignota viro data fuerit in nuptias, his sit persolvenda donatio propter nuptias, hanc vide-



licet ob causam, quod interdictam vetito mulierem qui sciens prudens in matrimonium duxit, is sane nihil aliud voluit, quàm suis eam sumptibus alere: & de qua muliere iubendo sancitum est, hujus interdictio adeo levis est. Harum igitur mulierum utrique si virum mors occupaverit ante, quàm cum ipsa divortium fecit, postea victus sit præbendus. Et utraque si vel tum, cùm vir peregrè esset, in victum aliquid mutuata fuerit, hoc ille dissolvat oportet: porro etiam quidquid fructus ex utriusque facultatibus vir ceperit, ab eo repetatur cùm uxorem missam facere cogitur.

V. Et illi, quæ virum renuat, mulieri fors donationis propter nuptias non solvitur; solvitur accessio: cujus è re vir si quid fructus cepit, ab eo non exigitur. Quæ si cùm esset etiam subjecta viro mulier ab aliis in victum mutuata quid fuisset, tum postea renueret, alimentum hoc à viro non repeteretur.

VI. Jam infamis adulterij labe mulier excluditur & sorte donationis propter nuptias, atque accessione, & reliquis etiam pactis dotalibus, quippe quæ de flagitiis suis viro sit interdicta.

VII. Quid autem de dote harum mulierum judicetur? Nempe dos dum existat, mulier etiam adultera discedens suum auferat. Nam secundariæ, & mulieris jussu interdictæ tum notæ, tum ignotæ, & sterilis, & interdictæ vetito mulieris satis cognitæ item, ut de dote cunctarum mulierum statuitur.



VIII. Omnino bonorum stabilium damnum uxori virum præstare jus est : de caducis autem quidquid subreptum , aut perditum est , uxori perditum est , vir nil rependat : verum cum uxorem vir duxerit sterilem , aut ex interdictis aliquam minus cognitam , tum is , quidquid ex bonis uxoris stabilibus perditum , subreptum , quidquid ætate confectum ac contritum fuerit , nihil restituat : quippe cui mulier bona sua permiserat omnia. Idem hic , si caducis è rebus aliquid perditum , subreptum sit , uxori restituat. Fit autem in ista contra atque in cunctis mulieribus , quia conubium istiusmodi non habet eam vim , ut hoc nomine viro adquiratur mulieris caduca res.

IX. Jam mulieri virum renuenti , quod ejus è rebus absumptum est , neutiquam restituatur. Nimirum quod hujus è rebus tum caducis , tum stabilibus perditum aut subreptum est , à viro non repetitur : verum enim si quid etiam existat , id hæc discedens auferat.

X. Nam mulier illa , quæ lectum jugalem polluit , illa privatur sorte & accessione donationis propter nuptias : porro autem à viro non repetitur quod perditum aut subreptum fuerit illius è rebus stabilibus : nam è caducis ne dici quidem necesse est : neque hæc tantum quæ fœdus violavit conjugale ; sed etiam quæ commiserit contra Legem Moyfi , contra Judæorum morem , & quæ infamiae causa missa fiat , excludatur tum sorte & accessione donationis propter nuptias , tum cunctis pa-



etis dotalibus : atque harum quæque dotis  
suar quidquid extiterit discedens auferat; quod  
imminutum fuerit ac perditum, id à viro re-  
stitui jus non est.

XI. Hæc igitur sunt quorum si quid fece-  
rit mulier, contra Legem Moyfi commisit: si  
nudato capillo in publicum prodisset: si se  
jurejurando obligasset, aut voti sponsione,  
nec steterit promissis: si menstrualis cum esset  
lecto geniali uteretur: si placentam illam è  
massa farinaria non exemisset: si cibaria viro  
vetita apposuisse, ea videlicet, unde decimæ  
nondum fuissent ablata: nam abominanda, re-  
ptilia, morticina, nec dici quidem necesse est.  
Sed hæc quemadmodum sciri queunt? Nempe  
si viro dicit uxor fruges istas expeditas & pa-  
ratas reddidit hic ille sacerdos, hæc illa mulier  
ex ista farinaria massa ritè mihi placentam  
exemit, sapiens hic ille maculam sanguinis  
menstrui nomine suspectam mihi declaravit  
esse mundam, vir escam comedit, mulierem  
subagitat, sapientem rogitat, hic rem perne-  
gat. Eadem est ratio mulieris, quæ cum in  
vicinia pro menstrualis putaretur, marito dixit  
se mundam esse, atque ab eo subacta fuit.

XII. Jam more Judæorum intelligitur ho-  
nestus ille pudor qui viget in fœminis Israëli-  
ticis. Ecce autem ea, quorum si quid fecerit  
mulier, morem Judæorum violaverit: si pro-  
cessit in plateam, immo etiam in angiportum  
pervium, nec esset accommodata capiti ca-  
lantica, qua fere operiuntur mulieres, etsi  
capillus linteo obvolveretur: si cum neret in



publico rosam aut simile quid ornandi vultus gratia ad frontem, ad malam apposuisse sic, ut lascivæ solent mulieres ethnicae: si cum in publico neret brachia ostentasset, cum juvenibus lusisset: si ut navaret sibi operam à viro tam elata voce petisset, ut de re venerea loquentem vicinia facile exaudiret: si audiente viro focerum suum execrata esset.

XIII. Esdras quidem sanxit, ut modestiæ causa mulier domi quoque cingulo præligata semper esset. Quæ si mulier discincta fuit, tamen nec fecit contra Legem Moyse, nec donationem propter nuptias perdidit. Porro nec illa mulier quæ nudato capite prodiit ex ædibus aliis in alias intra idem angiportum sitas, siquidem capillus linteo obvolutus erat, nec illa contra Judæorum morem fecit.

XIV. At verò quæ contra Legem facit mulier, eam oportet præsentibus testibus admoneri prius, quam perdat donationem propter nuptias. Nam si qua intra domesticos parietes Legem violavit, vir novit, reprehendit mulierem nec ullis adhibitis testibus; rursusque hæc contra Legem committit, vir appellat, ait mulierem post admonitionem etiam contra Legem fecisse, illa negat se fecisse quidquam contra Legem, aut à marito fuisse sceleris admonitam; si est, ut vir mulierem velit missam facere, huic postquam iusjurandum dederit se non fecisse contra Legem, numerabit pecuniam donationis propter nuptias: mulier enim si confitetur se post admonitionem commisisse



contra Legem, omnino nihil ei debetur.

XV. Jam infamiæ causa missa fit mulier, si testes sint ab ea factum esse turpiter adeo, ut satis cognoscere liceret commissum esse flagitium, quanquam de complexu venereo nihil testimonio confirmetur: ut si qui ex ædibus, ubi mulier sola resideret, unguentarium cernentes exeuntem continuo introissent, mulierem offenderent è lecto surgentem, femoralia induentem, cingulum præligantem: iidem si in superna tori parte humidum quasi sputum invenirent; si mulierem & unguentarium ex tenebricoso quodam loco simul exeuntes; si vicissim è fovea se trahentes, & horum similia: si tunicæ reticulatæ limbum unguentarium osculari mulieri viderent: si viderent eos inter se suaviantes & amplexantes: porro si viderint illud, horum alterum abisse conclave in aliquod, alterum illico esse consecutum, ubi huc abissent, ostium operuisse, atque horum similia, vir ubi velit nuntium mulieri remittat, discedenti de donatione propter nuptias dependat nihil. Etenim hanc nec admoneri quidem flagitij necesse est.

XVI. Atqui cum uxore, quæ contra Legem Moysei commisit, aut contra morem Judæorum, quæque fecit turpiter, vir invitus divortium facere non cogitur: scilicet viro est in manu, uxor ne discedat: quæ ut à viro non discedant: tamen privantur illa donatione propter nuptias. Nam donationem propter nuptias Sapientes uxori decreverunt



ideo, ut viro ne facile videretur esse conjugem missam facere: porro laborarunt Sapientes fœminis Israëlitis prospicere castis & integris; impuris autem istis nequiquam consultum voluerunt; sed facile esse viro istas missas facere.

XVII. Si quis vel ipse suis oculis uxorem mœchari vidit, vel audivit de aliquo ex suis mulierisve propinquis, cujus fide atque auctoritate adductus esset, ut crederet uxorem suam mœchatam esse, seu vir esset ille qui scelus prædicaret, seu fœmina; siquidem marito sic persuasum esset, esse rem veram; oporteret uxorem missam faceret: porro cum ea corpus miscere prohiberetur: donationem propter nuptias ei repræsentaret. Nam mulier si viro confitetur se mœchatam esse, sine donatione propter nuptias discedat. Cùm igitur vir ipse deprehendit uxorem in adulterio, jubebit istam per apprehensum volumen Legis quàm desiderabilis jurare se conjugij fidem non violasse, tum deinde denique numerabit isti pecuniam donationis propter nuptias: alia verò de causa mulierem ad jusjurandum vir non adiget, nisi cum ea paraverit.

XVIII. Mulier si viro enuntiat ipsa se voluntate suum lectum genialem contaminasse, nihil istius verba nos movent: suspicamur autem ab ista alij viro oculum adjectum: verum enim donationem propter nuptias perdidit sortem & accessionem: perdidit & trita rerum suarum, ut quæ fatetur adulterium à se commissum esse. Qui si mulierem vera



prædicare vir credat, nec possit animum inducere, ut de dictis ejus ambigat, hic istam oportet missam faciat. Consilium autem ob ejusmodi rem uxori nuntium remittere cogit neminem: nisi si testimonium accedat duorum, qui dicant se præsentibus & inspectantibus istam hujus illius mulierem voluntario se stupro contaminasse: tum verò vir missam facere mulierem cogitur.

XIX. Mulier nupta si se viro dedit alieno imprudens, si per vim fuit ab aliquo stuprata, etiam conjugii est suo permissa. Nimirum quod est in Lege, *Et ipsa non fuerit\* violata*, colligitur eam marito licitam esse mulierem, quæ violata fuerit seu ab homine ethnico, seu ab Israëlita. Porro si stuprum per vim principio oblatum lubens efficeret mulier: immo si ita diceret, mittite hominem istum, quem ego, nisi mihi vim intulisset, mercede conduxissem; nihilominus tamen marito etiam permissa esset. Nimirum ex vi principio illata mulierem extrema libido isthæc incescit.

XX. Quas prædones abripuere mulieres itidem, uti quæ bello captæ, per vim stupratæ esse dicuntur, atque maritis sunt etiam permissæ. Nam si relinquentes se prædones sponte sua secutæ fuerint mulieres, istæ videlicet voluntario se stupro contaminasse judicentur, atque viris adeo sunt interdictæ. Jam mulieris imprudentia, & vi nefaria temerata jus idem atque eadem est ratio: est enim aliquatenus imprudentia conjuncta vis.

*Num. 5. 13.*

\* Atqui verbo Hebraico gemina vis est subiecta: primum enim significat *deprehensam* sic, ut vulgata exprellit: deinde *violatam*, ut noster hic scriptor interpretetur ex auctoritate Talmudis.



XXI. Sic est enim mulier si nupta cum viro plebeio fuerit : sacerdotis vero conjux seu imprudentia seu vi temerata sit, viro interdicitur : nimirum mulier ut ut temerata fuit, tamen evasit meretrix, qua, ut tractatu de concubitibus vetitis differetur, sacerdoti interdictum est.

XXII. Etenim cum plebeij hominis, tum etiam sacerdotis uxori, quæ per vim stuprata fuit, donatio propter nuptias maneat, fors & accessio: nihil ea quidquam de donatione propter nuptias perdiderit. Sacerdos igitur representare donationem propter nuptias, atque mulierem missam facere cogitur.

XXIII. Si conjugii sacerdoti mulier ultro dicat, ego per vim, per imprudentiam viro ab alieno subagitata sum, nihil est, quod verbis hujus conjux moveatur : quia enim mulier forte virum in alium conjecit oculos. Idem hic si conjugem putet dignam, cui fidem habeat, missam faciat mulierem, pecuniam donationis propter nuptias numeret.

XXIV. Si presentibus testibus duobus uxori maritus edixisset, ne cum hoc illo se viro abderet, tum inspectantibus hominibus duobus ista se cum illo abdidisset aliquò ac commorata esset ad temerandum satis, mulierem dum aquis illis amarissimis pertentandam vir curasset, interea hac ei interdiceretur, quemadmodum tractatu de muliere suspecta adulterij explicabitur. Sin vir mortem obisset ante, quam curasset mulierem eo potu probandam, privaretur illa donatione propter nuptias ;  
tamen



tamen etsi præterea nihil turpe comparuisset, quia hoc ipso turpius est nihil. Hodie verò quoniam aqua nusquam est illa, qua possit adulterij suspicio dilui, perpetuū marito interdicitur ista muliere: discedet igitur, atque donatione propter nuptias multabitur, sorte & accessione: videlicet ista mulier commisit ipsa, ut marito interdiceretur.

XXV. Porro ne cum hoc illo se viro secluderet si maritus uxori edixisset solus soli, atque vidisset mulierem cum illo se secludere, ac commorari satis ad patrandum flagitium, sane hac interdiceretur viro his temporibus cum nusquam habeatur aqua illa ad suspicionem adulterij diluendam constituta. Vir igitur oporteret mulierem missam faceret, atque exolveret donationem propter nuptias: nisi si mulier post edictum viri se seclusisse confiteretur, discederet sine donatione propter nuptias. Quocirca istam mulierem ad iusjurandum adigeret, tum deinde denique donationem propter nuptias exolveret.

---

#### CAPUT QUINTUM ET VICESIMUM.

I. **S**I quis uxorem duxisset nihil suspicans mali, atque votis obligatam inveniret, ista quidem discederet, & multaretur donatione propter nuptias, sorte & accessione: sic habetur ea videlicet quæ vovit se se abstinenturam carne, vino, pigmento, omni rerum genere, quibus se fere expoliunt ejus

N



loci mulieres : verum enim ob votum aliud ab istis nihil quidquam mulier perdiderit.

II. Similiter mulier si bona fide in matrimonium duceretur , atque reperiretur in ea horum , quibus temerari mulieres supra commemoravimus , vitiorum aliquod , neque vir illud ipse novisset , neque porro ex alio audisset atque mulierem etiam voluisset ; & ista quoque discederet atque multaretur donatione propter nuptias , sorte & accessione. Si quis igitur oppidum habitet balneis instructum , in quo eodem propinquas habeat , non est , quod dicat , ego vitia conjugis ista non noveram , ne si fuerint occulta quidem : scilicet isti hoc in manu erat , ut uxorem priusquam domum duceret per fœminas sibi propinquas perlustrandam curaret. Quare sic habetur hominem vitiorum monitum uxorem voluisse tamen : si oppidum balneis destitutum ; item si homini in eo propinqui sint nulli , de occultis vitiis uxorem appellet. Jam comitali morbo certis temporibus affligi vitiis ex occultis unum est. Nam de vitiis apertis uxorem in jus vocare non convenit : apparent , prædicantur , sic habetur , hominem audisse de istis , & manum dedisse. Atque hoc quidem satis intelligitur , iudicium id in his demum fieri locis , ubi mos sit mulieribus in publicum nudata facie prodire sic , ut singuli norint singulos , atque prædicent , hæc est hujus filia , hæc illius soror , ut nunc ferè sit in oppidis \* Idumæis : si moris sit loci , ut omnino virgines in publicum procedant nunquam ,

\* Id est Christianorum , qui à Judæis Idumæi usurpantur : degebat enim scriptor hic apud Arabas.



aut si qua nonnunquam in balneum eat, eat vesperi, porro se se occultet, nec sinat se præter propinquas contemplari neminem, hic & de vitiis apertis vir uxorem in iudicium adducat: ita est enim ubi loci balneum sit nullum, nullamque fœminam propinquam vir habeat, cui mandaret, ut virginem in matrimonium ducendam contemplaretur. Nam in oppido balneis instructo, ubi nudata facie procedere fœminas consuetudo non fert, si quis propinquam habeat aliquam, huic uxorem de vitiis in jus vocandi nullus relinquitur locus, quippe cùm in balneo omnes nudam videre mulierem liceat: nisi forte mulieres & in balneo quoque se se obtegant atque occultent, virgines noctu lavent usque, aut usque solæ in quodam balnei quasi gynæceo, ne conspectæ agnoscantur; hîc verò vir uxorem de vitiis etiam apertis appellet: hoc enim à ratione præscriptum, nihil in Lege scripta sancitum est.

III. Atque horum magistrorum quidam volunt dictum hoc Sapientum, *Quia viro in manu erat, sui ut in uxorem inquirerent propinqui*, complecti non propinquos modò, sed etiam necessarios: ut si quis instructum balneo oppidum habitet, ubi prorsus ei nullus sit homo propinquus, tamen non possit uxorem de vitiis appellare: neque enim fieri posse, ut oppidanorum nulli consuetudine sint ei conjuncti: ageret igitur cum aliquo eorum, quibus familiariter uteretur, ut ejus aut uxor, aut soror in hanc illam inquireret:

N ij



quare sic existimandum, hominem de vitiis audisse, atque animum ejus esse conciliatum. Mihi verò sententia hæc non probatur: quia enim his de rebus, nisi propinquis suis, animi sensum expromit nemo: neque porro his de rebus quisquam nisi propinquis suis multam fidem habet.

IV. Si quis igitur uxori de vitiis litem intendat, de vitiorum genere videndum erit quale sit: si est, ut addubitari non possit, quin vitia in muliere fuerint ante, quam viro desponderetur, ut si digito redundet, vel quid hujus simile, opus erit, ut mulieris pater rationibus confirmet aut hoc, vitia nosse virum, & nihilominus uxorem expetisse, aut illud, opinionem esse virum ea vitia cognita habuisse. Quod si non efficere possit, uxor discedet sine donatione propter nuptias. Si est autem, ut vitia sint ea, quæ post sponsalia potuerint etiam in muliere nasci, sic erit: si vitia reperiantur in muliere postquam ad virum est traducta, vir convincat mulierem fuisse hisce vitiis contaminatam ante, quam sibi desponsa erat, adeoque \* emptione sua dolum malum inesse: sin autem reperiantur vitia in muliere etiam ad patrem commorante, patris sit probare post desponsatam filiam hæc in ea vitia fuisse demum exorta; ita quasi eluvionem in agro viri accidisse.

V. Quod si vir rationibus confirmarit in muliere necdum desponsa fuisse vitia, aut hoc idem confiteatur mulier, pater autem ejus probet, vel virum cum vitia virginis

\* Dicitur enim ad principium hujus tractatus viro mulierem emendam esse.



perspexisset filuisse, atque conciliatum esse, vel ita putari hominem ea vitia cognovisse, ac conciliatum esse, iste quidem certè persolvat uxori donationem propter nuptias oporteat.

VI. Qui cum uxore cubarit, & multis post diebus confederit, is si deinde litem intendat se in uxore offendisse vitium quod sibi nunquam ad hunc diem visum fuerit, audiendus non sit, non, si vitium illud in rugis, in planta pedis extiterit: ut enim putatur neminem è cyato potare, quin eum probè perlustarit; sic & hominem istum existimandum est vitium illud novisse, & uxorem voluisse tamen.

VII. Si mulieri cum viro nuptæ nec sint statim menses, nec quidquam suboleat usque eò, dum sanguis ille menstruus apparuit, hæc sui potestatem viro nunquam faciat, quin  
\* testes illos observandi sui gratia adhibeat duos: unum ante complexum venereum, alterum post. Et viri testis, quo videlicet ipse se detergat, numerandus in his non est, quemadmodum in tractatu de concubitibus vetitis edisseretur.

VIII. Atque hoc vitium quamvis magnum mulieri damnum affert nullum, quippe quæ se se exploret priùs, quàm officio jugali fungatur. Mulier rite se observarit, atque viro sui copiam fecerit, tum se detergentes alteruter in linteo teste suo sanguinem invenerit, idque tribus deinceps vicibus proximè consequentibus acciderit, ista porro cum marito considerare vetatur, &

N iij

\* Est hæc consuetudo Judæis mulieribus & viris ut post complexum venereum puro quodam linteo se quisque separatim detergat, menstruum sanguinem explorantes: hæc igitur linteæ testes appellantur.



discedens omni donatione propter nuptias, forte, & accessione privatur: itemque cunctis pactis dotalibus; quippe quæ ad officium jugale non est idonea. Quam vir cum amittit, non reducet unquam: alioquin usu veniat, ut, si mulier sanetur, vir intendat se cum repudium uxori renuntiaret, prorsus cum ea divortium non fecisse: eandem hanc ut alter in matrimonium ducat, permittum est, qua de re in ratione mulieris menstrualis tractanda explicabitur.

IX. Sic se res habet siquidem ab initio connubij illico mulier ab primo complexu venereo item, uti postea, sanguinem vidit: Nam mulierem post nuptias affici, quasi agrum viri eluvione disturbari est. Itaque mulier si viri post concubitum vel unicum nihil invenit sanguinis, porro autem invenit quo tempore cunque cum viro rem habuit, vir eam sic, ut paulò ante dictum est, dissoluta donatione propter nuptias amittat, nec reducat unquam.

X. Idem est statuendum de quocunque vitio post nuptias in muliere exorto adeo, ut si scabie tentetur uxor, viro nihilo secius sit in manu, ut eam vel retineat, vel numerata donatione propter nuptias amittat.

XI. Vir autem si post nuptias afficitur, si manu, si pede sit mutilatus, si privatus oculo, nihilo magis vi cogitur invitus uxorem porro cum ipso confidere nolentem amittere: mulier enim cum eo commorabitur: sin minus, discedat sine donatione propter nuptias:



quod quidem iudicium de quavis muliere contumaci redditum est. Rursus vir, cui fœditas odoris intorabilis in ore, in naso oborta, qui legere caninum stercus insuevit, qui æs è terra effodere penitus abditum, qui coria perficere, is invitus uxorem amittere cogitur, & representare donationem propter nuptias: uxori contrà concessum est, ut si lubeat viro cum isto commoretur.

XII. Quem verò virum mala scabies urgeat, hic vi cogitur uxorem amittere, & representare donationem propter nuptias: nec mulier audienda si cum hoc considerare velit: verum alter ab altero distrahetur ea re, quia viro sic affecto mulier tabem adfert miserandam. Quæ si mulier dicat se testes adhibituram quominus secum vir consuefcat, audienda sit.

XIII. Quæ mulier cum viro collocata fuit eo, qui ore, qui naribus malè oleret, qui caninum stercus legeret, qui quid horum simile faceret, atque morte huius in potestatem venit leviri eodem modo affecti, huic illa dixerit, fratrem ego tuum ferre potui, te non possum: itaque calceus erit ritè detrahendus, & dissolvenda donatio propter nuptias. \* *Videas filiorum filios, pax sit Israël.*

\* Est hoc scriptorum Hebræorum solenne ut disputationibus suis clausulam aliquam addant bene precantem, eamque plerumque ex sacris litteris petitam: hoc idem fecit Majemonides noster ad finem huius tractatus de connubiis: quàm verò commodè aliorum sit iudicium. *Psal. 128.*

*Finis huius tractatus.*

N üij





SEQUUNTUR ILLÆ FORMULÆ,  
de quibus per totum hunc tractatum  
passim mentionem fieri in procæmio  
dixi: has ego ex variis Majemonidæ  
dissertationibus huc in unum transtuli  
sic, ut sunt editæ apud exemplar in  
folio parvo, quod anno 1574. excu-  
sum est: excipe nomina propria, quæ  
à me sunt exempli causâ posita.

\* Majemoni-  
des tractatu  
de divortiis,  
folio 49. p. 2.

\* *Hæc est formula divortiorum.*

**H** O c die hebdomadæ, qui dies est hîc  
ille mensis hujus, anno hoc illo vel à  
mundo constituto, vel ab epocha con-  
tractuum secundum istam computandi ratio-  
nem, quam hîc loci observare consuevimus,  
Ego Phares Danielis filius ex loco N. & si  
quod aliud nomen ac cognomen mihique,  
parentibusque meis, sedique meæ, atque sedi-  
bus parentum meorum, inclinatione volunta-  
tis, nulla adhibita vi assero, mitto, repudio te  
Sephoram Nephtalis filiam, quæ es ex loco N.  
& si quod aliud nomen & cognomen tibi,  
parentibusque tuis, sedi tuæ, aut sedibus pa-  
rentum tuorum, quæ fuisti antehac uxor mea,  
nunc assero, mitto, repudio, ut in tua pote-  
state, & tui juris sis deinceps, & nubas cui



FORMULÆ PERSCRIPTIONUM. 201  
viro cunque visum fuerit, nec quisquam te  
meis verbis impediat ab hoc usque die in  
posterum : En tu permissa sis cunctis viris.  
Hic tibi sit à me libellus repudij, libertatis  
assertio, divortij litteræ secundum Legem  
Moyſis & Israëlitarum.

GABRIEL Judæ filius, testis.

RAPHAEL Saduci filius, testis.

---

*Formula renuendi.*

*Majemonides  
ibid. fol. 79.  
p. 2.*

**H**Oc die, qui dies est hic ille mensis hu-  
jus, anno hoc illo ad istam computan-  
di rationem renuit Lia Sibæ filia nobis præ-  
sentibus, atque ita dixit. Mater mea, frater  
meus impulerunt me etiamdum parvam,  
atque nuptum dederunt, aut dedicaverunt  
Isboseto Nabalis filio. Nunc igitur volunta-  
tem meam aperio vobis : hunc ego nolo : cum  
eo non manebo. Nobis igitur in hanc Liam  
inquirentibus compertum est parvam eam  
fuisse. Qua de causa has scripsimus & subſi-  
gnavimus, dedimusque ei pro jure, & testi-  
monio valituras.

DAVID Nahumi filius, testis.

GERSON Baruchi filius, testis.





Majemonides  
tractatu de le-  
viro disca-  
ceando & fra-  
tria jure affi-  
nitatis ducen-  
da, fol. 97.  
p. 1.

*Formula litterarum divortij, quas vulgò per-  
scribunt fratris, qua levirum discalceavit.*

**H**oc die, qui dies est hic ille mensis hu-  
jus, anno hoc illo à constituto mundo,  
ad illam computandi rationem, quam hîc  
loci observare consuevimus; Nos judices,  
qui partim his litteris subscripsimus, tres unâ  
in judicio confedimus. Adiit nos Sara Joæ  
filia, vidua Manassæ: tum adiit nos vir qui-  
dam, cui nomen Miphiboset Sedecia filius.  
Atque Sara ita dixit: Iste Miphiboset ex eo-  
dem patre Sedecia frater est Manassæ viri  
mei, cui juncta connubio eram. Is enim oc-  
cubuit, vitamque Rabbini ac cunctis Israë-  
litis reliquit, nec ullum ex se reliquit filium,  
aut filiam, aut hæredem, aut nomen ejus inter  
Israëlitas suscitantem. Atque ab hoc Miphi-  
boseto ejus fratre jure affinitatis duci me con-  
venit. Vos igitur, Rabbini, jam nunc edicite  
illi, ut si ducere me velit, ducat: sin minus,  
expediat mihi pedem suum dexterum inspe-  
ctantibus vobis, & extraham calceum ejus è  
pede, & in faciem ejus inspuam. Nos com-  
perimus Miphibosetum Manassæ emortui ex  
eodem patre fratrem esse: ediximus ei, si vis  
mulierem in matrimonium ducere, ducas: si  
nolis, expedi illi præsentibus nobis pedem  
tuum dexterum, & extrahat calceum tuum  
à pede tuo, & in faciem tuam conspuat: tum  
is respondit, atque ita nobis dixit: non ego




FORMULÆ PERSCRIPTIONUM. 203

ducere hanc volo : nos confestim jussimus  
 Saram legere versum hunc : *Renuit levir meus* *Deut. 25. 7.*  
*suscitare fratri suo nomen inter Israëlitas, no-*  
*luit ducere me :* Et istum quoque Miphibose- *Ibid. v. 8.*  
 tum jussimus legere versum hunc , *Nolui ac-*  
*cipere eam.* Post hæc expedivit dexterum pe-  
 dem suum , & mulier calceum ejus è pede  
 extraxit , & ad faciem ejus conspuir sputum ,  
 quod nos spectavimus ab ore ejus ad terram  
 usque. Rursus hunc Miphibosetum jussimus  
 legere versum hunc , *Sic fiet viro , qui non edi-* *Ibid. v. 9.*  
*ficabit domum fratris sui :* Porro eundem Mi-  
 phibosetum jussimus legere & istum versum ,  
*Et vocabitur nomen ejus in Israël domus ex-* *Ibid. v. 10.*  
*tracti calcei :* tum nos ipsi judices , & quicun-  
 que sub conspectu nostro subsederant post  
 ipsum ter respondimus , *Extracti calcei ,*  
*extracti calcei , extracti calcei.* Quod cum  
 factum esset nobis inspectantibus , permisi-  
 mus Saræ isti , ut deinceps nuberet cui viro  
 cunque visum fuerit , nec eam absterreat quis-  
 quam ab hoc die in posterum. Sara enim ista  
 poposcit à nobis litteras divortij videlicet  
 hoc calceo extrahendo facti , quas nos scri-  
 psimus , subsignavimus , mulierique pro jure  
 suo dedimus secundum Legem Moyse &  
 Israël.

PHINEES Simeonis filius , testis.

ISSACHAR Mardochei filius , testis.





Majemonides  
ibid fol. 97.  
p. 1.

*Formula instrumenti nuptialis, quod leviri  
vulgò perscribunt fratriis, quas jure affi-  
nitatis in matrimonium ducunt.*

Deut. 25. 5.

Ibid. v. 6.

**H**Oc die, qui dies est hic ille mensis hu-  
jus, anno hoc illo secundum putandi  
rationem, quam hic loci usurpamus, cum  
nos adisset Ephraim Nahumi filius ita locu-  
tus est. Meus ex patre frater occubuit, vitam  
Rabbinis, atque universo Israëlitarum po-  
pulo reliquit, nec reliquit ex se filium, filiam,  
hæredem, & suscitantem nomen ejus inter  
Israëlitas, idemque reliquit uxorem, cui no-  
men Anna Salomonis filia. Hanc me ducere  
jure affinitatis ex Lege convenit. Videmus  
enim in Lege Moyfi scriptum, *Levir ejus  
coibit cum ea.* Anna enim ista voluit jure affi-  
nitatis duci Ephraimo Nahumi filio leviro  
suo, ut fratri nomen suscitaret inter Israë-  
litas, id quod in Lege scriptum est, *Quemque  
primogenitum enixa fuerit, is in fratris emortui  
nomen concedito.* Ephraim enim levir mulieri  
isti fratriæ suæ perscripsit denarios nummos  
ducentos, qui illi conveniebant, quas ei pro  
donatione propter nuptias vir ejus superior  
perscripserat: porro hic Ephraim de suo mu-  
lieri addidit hoc illud: mulier dotem appor-  
ta- vit leviro hanc, & reliqua pro cæteris formulis  
instrumentorum nuptialium.





*Formula instrumenti nuptialis.*

*Majemonides  
Ibid. p. 2.*

**H**Oc die, &c. David Elchananis filius dixit sponsæ suæ virgini Noëmæ Joannis filiæ, esto mihi uxor secundum Legem Moyſis & Israël. Atque ego per verbum Dei colam & observabo te, sustentabo, nutriam, alam, operiam, uti solent viri Judæi observare, nutrire, alere, & operire uxores suas sincerè. Jam pro virginitate tua dono tibi denarios nummos ducentos, quibus conficiuntur argenti denarij viginti quinque, qui tibi ex Lege conveniunt: porrò autem dabo victum & vestitum, cæteraque ad vitam necessaria, ac tecum consuetudine communi consuescam. Placuit igitur Noëmæ isti uxorem esse Davidis hujus, qui sponte sua ad sortem donationis propter nuptias addidit hanc illam summam. Jam Noëma dotem hanc illam apportavit: eam sponsus hic accepit totam: venit ipsi in manum, & permessa fuit ejus potestati: omniaque sic tanquam creditum & debitum in se recepit. Itaque nobis dixit David sponsus iste, instrumenti hujus universam obligationem, fortis illius donationis propter nuptias, dotis, & additionis, cæterorumque conventorum dotarium in me recipio, & hæredes meos post me, in pulcherrimum quodque fortunarum & possessionum, quæ mihi sunt subter cælo, quæ mihi sunt acquisitæ & acquirendæ: fundi



206 FORMULÆ PERSCRIPTIONUM.  
mei & cum fundis res quoque mobiles, omnia  
sint arrhaboni & pignori opposita toti huic  
nuptiali contractui, doti, sorti, & accessioni  
donationis propter nuptias, ut inde dissol-  
vantur, tam vivente, quàm mortuo me: imò  
& de pallio quod erit meis impositum hume-  
ris: Atque hæc, quæ supra sunt descripta &  
nuncupata à Davide isto adquisita sunt ad-  
quisitione perfecta, non ratione levi, non  
exemplari primæ cujusque perscriptionis, sed  
pro omnium firmamento & robore illo con-  
tractuum nuptialium, qui usurpantur inter  
Israëlitas, atque etiam ex more & instituto  
Rabbinorum nostrorum piæ memoriæ. Sub-  
signauimus autem hoc instrumentum nuptia-  
le tempore supra dicto. Ac totum hoc ratum,  
fixum, firmum sit.

FINIS.


2.6.213



207

2.6.213








209

2.6.213








211

2.6.213








213

2.6.213









215

2.6.213































005647063



